

# Sabo Fange I

## *Sabo 1 - 41*

### 1

<sup>1</sup> Haha t'indaty tsy mañavelo  
am-panoroa' o lo-tserekeo\*,  
nahò tsy mijohañe an-dala'  
o beihakeoo,  
vaho tsy miambesatse am-  
pitoboha' o mpañinjeo;

<sup>2</sup> Fa ty Hà' IEHOVÀ  
ro mampinembanembañ' aze,  
ninihe'e handro an-kaleñe i Hà'ey  
<sup>3</sup> Ie ho hambañe aman-katae namboleñe  
añ'olon-torahañe eo,  
mamoà an-tsa'e nahò  
tsy miheatse o rave'eo,  
miraorao ze hene anoe'e.

<sup>4</sup> Tsy manahake zay o lo-tserekeo,  
fa hambañe amo kafokafo  
aboelen-tiokeo.

<sup>5</sup> Toly ndra tsy haha-fitroatse amy zakay  
o tsivokatseo,  
ndra ami'ty fivori' o vañoño  
o mpanan-tahiño.

<sup>6</sup> Arofoana' IEHOVÀ ty fañaveloa'  
o vantaño,  
fe ho modo ty fandenà'  
o tsivoatsoloo.

---

\* **1:1** rasà: tsy aman-Kake, lo-tsereke

## 2

### *Ty Fañorizan' Añahare i Jinobo'ey*

<sup>1</sup> Ino ty fidabasida' o kilakila ondatio\*,  
naho ty fikililia' ondatio  
raha tsy vente'e.

<sup>2</sup> Mijohañe o mpanjaka' ty tane toio,  
naho mitrao-kinia o mpifeheo  
hiatreatre am' IEHOVÀ naho i Noriza'ey†,  
manao ty hoe:

<sup>3</sup> Antao handrafadrafatse  
o talirandra' iareoo,  
le hahimpan-tika o rohi' iareoo.

<sup>4</sup> Miankahake i mpiambesatse  
an-dindiñey;  
mitsikike iareo t'i Talè. <sup>5</sup> Fa ho trevohe'e an-  
keloke,

vaho hampinevenevere'e am-pifombo'e:

<sup>6</sup> Toe zaho ty nañoriñe ty Mpanjakako e Tsiône‡  
ao amy vohiko miavakey.

<sup>7</sup> Sokireko ho lily:

hoe t'IEHOVÀ amako:  
ANAKO rehe, anindroany  
ty nampiareñako azo. <sup>8</sup> Mihalalia amako le

hampandovaeko

Azo o fifeheañeo,  
naho ho fanaña'o o olon-taneo.

<sup>9</sup> Ho pozahe'o am-bodam-by;  
Hampijeñahe'e hoe siniharam-panao  
valañe-tane.

<sup>10</sup> Aa le mahihira ry mpanjakao;

---

\* **2:1** Mat 4:25-26; Dan 2:44, 7:13-28, Kag 2:22, Zek 14:9, Ben 11:15; 19:19 † **2:2** Nañiliane Solike : i Norizañey zay ‡ **2:6** Ierosalaime

Mimetea oke  
ry mpizaka' ty tane toio.

<sup>11</sup> Toroño am-pañeveñañe t'IEHOVÀ,  
vaho mirebeha am-pineveneverañe;

<sup>12</sup> Ondroho i Anakey  
tsy mone hiviñera'e,  
vaho hihomak' an-dalañe ey nahareo;  
fa mete hisolebatse aniany ty fifombo'e.  
Hene haha ze mitsolok' ama'e.

### 3

*Sabo' i Davide t'ie nirifatse ty lay hisitak' amy  
Absolome\* Ana'e* <sup>1</sup> Ry IEHOVÀ, Akore ty fitombo'a  
o mpamorefore ahikoo !

Maro ty miongake hiatreatre ahy.

<sup>2</sup> Lako ty manao ty hoe ty amako : Tsy ama'e ty  
fandrombahan' Añahare. Selà

<sup>3</sup> Fa Ihe, ry IEHOVÀ,  
ro kalan-defo mañohoñ' ahy, ty engeko  
naho ty Mpampiandra ty lohako.

<sup>4</sup> Ie koiheko am-peo t'IEHOVÀ,  
le janjiñe'e amy vohi'e miavakey. Selà

<sup>5</sup> Mandre raho vaho miroro; tsekake amy te  
mpañimba ahy t'IEHOVÀ.

<sup>6</sup> Tsy hembrañako i lahiale  
miarikoboñe hiatreatre ahikoy.

<sup>7</sup> Miongaha, ry IEHOVÀ! Rombaho raho ry  
Andrianañahareko,  
fa fonga tinampifi'o ty valañorà'  
o rafelahikoo;  
vaho pinekapeka'o ty nife'

---

\* 3: Absolome: raem-panintsiañe

o lo-tserekeo.

<sup>8</sup> Am' IEHOVÀ ty fandrombahañe;  
naho am'ondati'oo ty fitahia'o. Selà

## 4

*Ho a i Talèn' Tsakeray; Ho titiheñe ami'ty  
Marovany, Sabo' i Davide* <sup>1</sup> Ry Andrianañaharen-  
kavañonako

toiño raho te mikanjy Azo  
fa Ihe ty nañivake ho ahy te nalovilovy;  
isoho vaho janjiño o halalikoo.

<sup>2</sup> O ry ana'ondatio, Sikala 'mbia ro  
hafote' areo ho inje ty asiko?

ty hikoko ty tsy vente'e,  
hitsoeke ty famañahiañe? Selà

<sup>3</sup> Fe fohino te navaha' IEHOVÀ  
ho ama'e i vañoñey;  
ho janjiñe' IEHOVÀ te kanjiekoo.

<sup>4</sup> Minevenevera, le ko mandilatse;  
mañereñerea añ'arofo an-tihi'o eo, vaho mian-  
jiña. Selà

<sup>5</sup> Mañengà soron-kavantañañe,  
vaho miatoa am'IEHOVÀ.

<sup>6</sup> Maro ty mivola :  
Ia ty hampiboake hasoa amantika?  
Ry IEHOVÀ, onjono ama'ay  
ty hazavan-dahara'o.

<sup>7</sup> Ihe nampipoke haehake an-troko ao,  
mandikoatse te  
an-tsàm-pamokara' iareo  
ampemba naho divay.

<sup>8</sup> Hândre an-kanintsin-draho le hiroro  
amy te Ihe avao ry IEHOVÀ

ro mampimoneñe ahy am-pitsolohañe.

## 5

*Ho a i Talèn-tsakera : an-Tsoly Sabo' i Davide*

<sup>1</sup> O ry IEHOVÀ, toloro ravembia

o volakoo;

ereñereo o toreokoo.

<sup>2</sup> Haoño ty feon-koiko ry Mpanjakako

naho Andrianañahareko :

Ihe ro ihalaliako.

<sup>3</sup> Handro ty hijanjiña'o ty feoko r'IEHOVÀ;

Maraindrañe te honjoñeko vaho hiandra.

<sup>4</sup> Tsy mahafale azo ry Andrianañahare ty hara-  
tiañe;

mbore tsy hañialo ama'o ty haloloañe.

<sup>5</sup> Tsy hijohañe añ'atrefam-pihaino'o

o mpirebodrebokeo;

fonga heje'o ze mitolon-draha kafoake.

<sup>6</sup> Ho rotsahe'o ze mivolam-bande;

heje' IEHOVÀ

t'indaty mampiori-dio naho ty mamañahy.

<sup>7</sup> Fe naho zaho, i fo ferenaiña'o fonitsey ty

himoahako añ'anjomba'o ao, vaho hi-

ambane mb'añ'anjomba'o

miavake mb'eo, fa mañeveñ' ama'o.

<sup>8</sup> Ry IEHOVÀ, Iaolò ami'ty hatò'o

ty amo mivoñoñe ahikoo;

avantaño añatrefako eo ty lala'o.

<sup>9</sup> Tsy am-pahitiañe ty vava' iareo;

hatsivokarañe ty an-tro'e ao;

kibory misokake o tretra'eo,

ie mitsiriry am-pameleke.

<sup>10</sup> Ozoño iereo, ry Andrianañahare,

hikorovok' ami'ty fikililia'iareo;  
soiho aña ami'ty habeim-piolà'iareo  
amy t'ie niody ama'o.

<sup>11</sup> Hene hirebeke ze mipalitse ama'o, hiriñariña  
an-kobaiñe nainai'e;

le ampialofo,  
handia taroba ama'o o mpikoko ty tahina'oo,

<sup>12</sup> Toe ihe ty mampanintsiñe o vantaño,  
ry IEHOVÀ, ohoñe'o fañisoña  
hoe te am-pikalan-defoñe.

## 6

*Ho a i Talèn-tsakeray ampititiheñe, Titiheñe  
an-Tali-valo; Sabo' i Davide* <sup>1</sup> Ry IEHOVÀ, ko  
endaha'o ami'ty haviñera'o,  
le ko mandilo ahy an-keloke.

<sup>2</sup> Tretrezo, ry IEHOVÀ, fa minike;  
jangano ry IEHOVÀ

fa minevenevetse o taolakoo.

<sup>3</sup> Loho mangebahebake ty troko:  
Fa ihe ry IEHOVÀ—hombia?

<sup>4</sup> Mibaliha, ry IEHOVÀ, Hahao ty fiaiko;  
rombaho ty amy fiferenaiña'o.

<sup>5</sup> Tsy mahatiahy Azo ty an-kavilasy;  
ia ty hañandriañ' Azo an-tsikeokeok' ao?

<sup>6</sup> Mahamàmak' ahy ty fiñoñoeko;  
ampigoribagoribañoeko haleñe  
ty kidoriko,

ampitranaheko rano maso  
ty fandreako.

<sup>7</sup> Mitike o masokoo ami'ty haemberako;  
mihamodo ty amo rafelahy iabio.

<sup>8</sup> Soike ry hene mpanao ratio;  
fa nahajanjiñe ty feon-tañiko t'IEHOVÀ.

<sup>9</sup> Jinanji' IEHOVÀ ty halaliko;  
no' IEHOVÀ ty filolofako.

<sup>10</sup> Fonga ho salatse naho hangebahebake  
o rafelahikoo;  
Ampipolieñe iereo,  
vaho hiambovoa' ty fimeñarañe.

## 7

*Nisaboa' i Davide aman'Añahare ty amy  
saontsi' i Kosy nte-Beniamine* <sup>1</sup> Ry IEHOVÀ Andri-  
anañahareko,

Ihe ro fitsolohako, avotsoro  
amo mañoridañe ahikoo, le hahao;

<sup>2</sup> Tsy mone ho ritaritae'e  
hoe liona ty fiaiko,  
hirofodrofota'e tsy  
amam-pañolotse.

<sup>3</sup> Ry IEHOVÀ Andrianañahareko,  
naho nanoeko zao :

lehe an-tañako ty hatsivokarañe,

<sup>4</sup> naho vinaleko haratiañe ty rañeko;  
hera nivoloseko tsy amam-poto'e  
ty nañembets' ahy;

<sup>5</sup> Le ho hotrohe' ty rafelahiko, hiambotraha'e;  
ho lialia'e an-tane ty haveloko, vaho hado'e an-  
debok' ao  
ty engeko. Selà

<sup>6</sup> Miongaha, ry IEHOVÀ, an-kaviñera'o,  
miavota ty amo fitrotrofiaha'

o rafelahikoo.  
mivañona ty amako amy zaka kinoi'oy.

<sup>7</sup> Hiarikatok' ama'o ty fivori' ondatio,  
vaho mibaliha hifehea'o  
boak'añ'abo ey.

<sup>8</sup> Ry IEHOVÀ Mpizaka o kilakila 'ndatio;  
zakao raho ry IEHOVÀ, ty amy havantañako naho  
ty havañonako an-trok' ao.

<sup>9</sup> Hijihetse ty haratia' o lo-tserekeo  
naho hajado'o o vañoño, o  
fa mpitsòke arofo naho ova  
t'i Andrianañahare vantañe.

<sup>10</sup> Aman'Añahare ao ty fikalako  
Ie mpandrombake o vañon-trokeo.

<sup>11</sup> Mpizaka to t'i Andrianañahare,  
Eka, torifike boak' andro  
t'i Andrianañahare;

<sup>12</sup> Aa naho tsy mimpoly t'indaty: le ho sioña'e i  
fibara'ey;

fa navoho'e ty fale'e  
vaho nihajarie'e;

<sup>13</sup> Fa nihentseñe'e fialiañe mahafate,  
ampibelabelae' afo o ana-pàle'eo.

<sup>14</sup> Hehe t'ie tsongoen-tsihavokarañe,  
ie nampiareñe kilily

vaho hiterake i remborake;

<sup>15</sup> Nihaly kobon-dre naho nampigorabahe'e,  
vaho tafajorobo amy hinali'ey.

<sup>16</sup> Toe hibalik' an-doha'e avao  
ty fikitroha'e raty,

vaho hivotrak' an-kevo'e eo  
i nandovia'ey.

<sup>17</sup> Andriañeko t'IEHOVÀ  
ty amy havantaña'ey,  
ho bangoeko an-tsabo ty tahina'  
IEHOVÀ Andindimoneñe.



## 8

*Ho a i Talèm-Pititike, Anoeñe maro-taly, Sabo' i Davide* <sup>1</sup> Ry IEHOVÀ, Talè'ay, Oakitia!

ty havolonahe' i Tahina'oy  
manitsike ty tane toy,  
napò'o ambonen-dikerañe eñe ty enge'o!

<sup>2</sup> Boak'am-bava' o ajaja-mena  
naho o ajaja minonoo  
ty nampijadoña'o haozarañe,  
ty amo malaiñe Azoo,  
hampiànjiña'o o rafelahio naho o mpamale-  
fateo.

<sup>3</sup> Ie haraharaeko o likera'oo, ty fitoloñan-  
drambom-pità'o,  
i volañey naho o vasiañe najado'oo.

<sup>4</sup> Ino ondatio, te itsakorea'o?  
Naho ty ana-ondaty, te haoñe'o?

<sup>5</sup> Fe nanoe'o ambanevane' o anjelio\*,  
naho sinabàka'o engeñe naho asiñe.

<sup>6</sup> Nampifehè'o aze o tolom-pità'oo;  
kila narongo'o ambanem-pandia'e ao,

<sup>7</sup> Ze hene añondry naho añombe;  
eka, o biby an-kivokeo:

<sup>8</sup> O voron-dikerañeo, o fian-driakeo,  
ze misoroke o lalan-driakeo.

<sup>9</sup> Ry IEHOVÀ, Talè'ay, Oasirity!  
ty volonahen-Tahina'o  
manitsike ty tane toy.

---

\* **8:5** Elohim: Andrianañahare, o ndrahareo

## 9

*Ho a i Talèn' Tsakera, Sabo' i Davide, ami'ty feo: Ty havilasi' i Ana-dahiy* <sup>1</sup> Rengeko an-

kaliforan-troke rehe r'IEHOVÀ;  
ho talilieko iaby o halatsa'oo.

<sup>2</sup> Hifaleako naho hirebehako,  
ho saboeko i tahina'oy,  
ry Andindimoneñe.

<sup>3</sup> Ie mimpoly o rafelahikoo,  
le mikorovoke vaho mibaibay  
añ'atrefa'o ey.

<sup>4</sup> Fa nitohañe'o i naseseko mahitiy,  
ihe miambesatse am-piambesa'o eo,  
mizaka an-kavantañañe.

<sup>5</sup> Nendaha'o o kilakila 'ndatio, rinotsa'o o lo-  
tserekeo;

finaopao'o kitro katroke ty añara' iareo.

<sup>6</sup> O ry rafelahio, fa nampigadoñeñe  
an-koak'ao kitro katroke;  
fa nombota'o o rovaio,  
fa momoke ty fitiahiañe iareo.

<sup>7</sup> Toe am-piambesa'e eo nainai'e t'IEHOVÀ,  
fa nihentseña'e ho an-jaka i fiambesa'ey;

<sup>8</sup> an-katò ty fizaka'e ty voatse toy,  
ho zakae'e an-kahiti'e ondatio.

<sup>9</sup> Kijoly abo te amo forekekeñeo t'IEHOVÀ,  
fitsolohañe an-tsan-kasotriañe;

<sup>10</sup> Hiantok' azo o mahafohiñe  
ty tahina'oo,

amy te tsy aforintse'o ze mipay Azo,  
ry IEHOVÀ,

<sup>11</sup> Misaboa am' IEHOVÀ ry mpimoneñe  
e Tsiône ao!

tseizo am' ondatio o fitoloña'eo!

<sup>12</sup> Toe ihaoñe' i Mpamale Fatey; tsy haliño'e ty fikoiaha' o mpisotrio.

<sup>13</sup> Isoho raho, ry IEHOVÀ !

Vazohò ty haoreako am-pità' o malaiñe ahio;

Ihe Mpañonjoñe ahy boak' an-dalam-bein-kavilasy ao,

<sup>14</sup> ho talilieko iaby ty enge'o

amo lalam-bei'

i anak-ampela' i Tsiôneio,

hirebehako o fandrombaha'oo.

<sup>15</sup> Nijoroboñe amy koboñe

hinali'iereoy o fifeheañeo;

finandri' ty harato naeta'iareo

o fandia'iareoo.

<sup>16</sup> Fa nam pandrendre-batañe t'IEHOVÀ

fa nametsake zaka:

tsepaheñ' amo satan-tañã'eo avao

ty lo-tsereke.

[mahantseñantseñe, Selà]

<sup>17</sup> Himpoly mb'an-tsikeokoek' ao

o tsivokatseo,

ze kilakila' ondaty mandikok'

an'Andrianañahare.

<sup>18</sup> Fe tsy ho haliño nainai'e o rarakeo

vaho tsy ho modo kitro añ'afe'e

ty fisalalà' o mpisotrio.

<sup>19</sup> Miongaha ry IEHOVÀ,

ko anga'o handrekets' ondatio;

Ho zakaeñe am-pivazohoa'o eo

o fifeheañeo !

<sup>20</sup> Apoho am' iareo ty fangebahahebañe,

ry IEHOVÀ

ampahafohino o kilakila'ndatio  
t'ie ondaty avao ! Selà

## 10

<sup>1</sup> Akore te Ihe mijohañe aña, ry IEHOVÀ?  
Ino ty ietaha'o an-tsan-kasotriañe?

<sup>2</sup> Am-pirengevohañe ty añaoridaña'  
o raty tserekeo o rarakeo;  
f'ie tsepaha' o fikitroha'eo avao.

<sup>3</sup> Sengè' i tsivokatsey o fañirian-tro'eo,  
tata'e ty fatitiañe, naho inje'e t'IEHOVÀ.

<sup>4</sup> Ty tsivokatse amy fitoeboran-tarehe'ey,  
tsy mitsoek' aze;

ty hoe avao ro fitsakorea'e:  
Tsy eo ze o Andrianañahare zao.

<sup>5</sup> Miraorao nainai'e o sata'eo;  
kanao mitiotiotse ambone,  
tsy am-pahaisaha'e eo o fizakà'oo,  
le fonga ibohaboha'e o malaiñ' azeo.

<sup>6</sup> Hoe ty aereñeren-tro'e :  
Tsy hasiotse raho,  
ndra an-tsa an-tsa tsy ho ampoheke ka.

<sup>7</sup> Pea haterañe naho katramo  
naho fisenge-hery i falie'ey;  
kilily naho haloloañe  
ty ambane' i famele'ey.

<sup>8</sup> Itoboha'e o fivoñañañe an-drovao  
amo fietahañeo  
hamonoa'e ty vantañe;  
jilovilovem-pihaino'e  
ty tsy amam-pañimba.

<sup>9</sup> Ie mitingañe añaetak' ao  
hoe liona ami'ty fitsifira'e;

mitampoñe hitsepake ty rarake,  
hiambotrak' amy'ty mpisotry,  
hikozozota'e amy harato'ey.

<sup>10</sup> Mibotreke re, mifinake;  
vaho mikorovok' amy figorea'ey  
i pìtso-pañolotsey.

<sup>11</sup> Hoe re an-troke ao :  
Fa nandikofan' Añahare,  
fa naeta'e ty lahara'e; tsy ho vazoho'e ka.

<sup>12</sup> Miongaha ry IEHOVÀ;  
ry Andrianañahare, zonzò ty Fità'o;  
ko amoea'o o mpirekeo.

<sup>13</sup> Akore te ati' o tsivokatseo  
t'i Andrianañahare,  
ie manao an-tro'e ao ty hoe :  
Tsy ipaia'e?

<sup>14</sup> Toe vazoho'o; eka fa oni'o  
ty ampoheke naho ty embetse  
le ho valeam-pità'o,  
ihe ro iatoa' ty tsy aman'imba;  
vaho mpañimba ty bode-rae.

<sup>15</sup> Pozaho ty sira' o tsivokatseo naho i piaroteñey,  
karafo ty haratia'e ie tsy nilefe tsikaraheñe.

<sup>16</sup> Mpanjaka nainai'e t'IEHOVÀ;  
fa mongotse an-tane'e eo o fifeheaño.

<sup>17</sup> Ry IEHOVÀ,  
fa jinanji'o ty halali' o tretram-poo;  
hafatraro ty arofo' iareo  
atokilaño o ravembia'oo;

<sup>18</sup> Hañomea'o to o bode-raeo  
naho o forekekeño,  
tsy hampinevenevera' ondaty  
an-tane atoio ka.

# 11

*Ho a i Talèn-tsakeray, Sabo' i Davide* <sup>1</sup> Amy

IEHOVÀ ao ty fipalirako;  
akore ty ivolaña' areo an-troko ty hoe :

Mivoratsaha hoe voroñe  
mb'am-bohi'o mb'eo;

<sup>2</sup> Hehe te mampibitsoke fàle  
o lo-tserekeo,

le fa ginao' iereo an-taly  
o ana-pale'eo,

hahiriri' iereo añ'ieñe ao  
mb'amo vantañ'arofoo;

<sup>3</sup> Naho rotsake o manàntaño, ino ty lefe' o vañoño hanoeñe?

<sup>4</sup> Añ'anjomba'e miavake ao t'IEHOVÀ,  
an-dindiñe ao ty iambesara' IEHOVÀ;

mivazoho o fihaino'eo,  
mitsoke o ana' ondatio o vohomaso'eo.

<sup>5</sup> Tsohe' IEHOVÀ o vantaño, fe heje' ty arofo'e ty lo-tsereke,  
naho i piaroteñey.

<sup>6</sup> Hampifororoaha'e vaen'afo mirekake  
o tsivokatseo;

afo naho ponde vaho tio-mae  
ty ho anjaram-pitovi' iereo.

<sup>7</sup> Amy te vantañe t'IEHOVÀ;  
kokoa'e ty havañoñañe  
ho isa' o mahitio ty lahara'e.

# 12

*Ho a i Talèn-tsakeray; an-Tali-Valo, Sabo' i Davide* <sup>1</sup> Rombaho, ry IEHOVÀ,  
fa tsy eo ondaty matarikeo;

mimosaoñe amo ana' ondatio  
o migahiñeo.

<sup>2</sup> Hene mifandañitse aman-drañetse  
ondatio, reke-tsoñy mitsiriry  
nahy troke-miroe-rehake.

<sup>3</sup> Haitoa' IEHOVÀ  
ze hene fivimby mandomboke,  
nahy ty fameleke mitrè fibohabohañe,

<sup>4</sup> amy ty hoe: O lela'aio ro handreketa'ay; anay o  
soñi'aio;

ia ty mpifehe anay?

<sup>5</sup> Ty fampisoañe o rarakeo,  
nahy ty fitoreova' o mpisotrio,  
ty iongahako henaneo, hoe t'IEHOVÀ,  
Fa hampipalireko amy isehasehà'ey.

<sup>6</sup> Fetse ki'e o fepè' IEHOVÀo,  
volafoty nitsoheñe an-toñan-tsini-hara;  
nitranahene im-pito\*.

<sup>7</sup> Arovo irezay ry IEHOVÀ,  
ambeno amy ty tariratse toy  
nainai'e donia,

<sup>8</sup> Mitsapiotsapioke mbeo' mbeo  
o tsivokatseo,  
nahy onjoneñe amo ana' ondatio  
ty haloloañe.

## 13

*Ho a i Talèn-tsakera; Sabo' i Davide* <sup>1</sup> Pak'  
ombia, ry IEHOVÀ?

Ho haliño'o nainai'e hao raho?  
Pak'ombia ty hañetaha'o laharañe amako?

---

\* **12:6** Sab 18:30, 119:140, Rzs 30:5

- 2 Sikal'ombia ty hitsakoreako an-troko ao ty haoreako, ie añ'ovako ao lomoñandro? Ampara' te ombia ty hañonjonañe ty rafelahikoo ambone ahy?
- 3 Vazohò, naho toiño raho, ry IEHOVÀ Andrianañahareko; hazavao o masokoo; tsy mone hiroroako ty firoron-kavilasy;
- 4 Vaho hanao ty hoe i rafelahikoy: rinebako re; ke hirebeha' o malaiñ' ahikoo t'ie mibolatitse.
- 5 Fe fiatoako ty figahiñan' arofo'o; hirebeha' ty troko i fandrombaha'oy.
- 6 Ho saboeko t'IEHOVÀ, amy te nampibodobodoe'e.

## 14

- 1 Ho a i Talèn-tsakera; Sabo' i Davide Hoe ty mineñe an-tro'e ao: Tsy eo ze o Andrianañahare zao. Lo-tsereke irezay, mitoloñe an-kativañe; leo raike tsy manao soa.
- 2 Misary o ana' ondatio hirik'an-dikerañ' ao t'IEHOVÀ, hahoniña'e ke eo ty mahilala mpitsoeke an' Andrianañahare.
- 3 Sindre mandifike, mitrao-kaleorañe; tsy eo ty manao soa, leo raike.
- 4 Songa tsy aman-kilala o mpitolon-karatiañeo, o mampibotseke ondatikoo manahake ty filintseña'e mofo, vaho tsy mitoka IEHOVÀ.



<sup>5</sup> An-gebahebak' ao iereo,  
fe amy tariratse vañoñey  
t'i Andrianañahare.

<sup>6</sup> Ho naoveove' areo ty fikabijà' o rarakeo,  
fe fitsoloha'iareo t'IEHOVÀ.

<sup>7</sup> Toe hiboake Tsiône ao  
ty fandrombaha' Israele !  
ie ampitolihe' IEHOVÀ  
ty fandrohizañe ondati'eo;  
le hirebeke t'Iakobe,  
vaho hifale t'Israele !

## 15

*Sabo' i Davide* <sup>1</sup> RyIEHOVÀ, ia ty himoneñe  
an-Kivoho'o ao?

Ia ty hañialo am-bohi'o miavake eo?

<sup>2</sup> Ty mañavelo an-kavantañañe,  
naho mitoloñe an-kavañonañe;  
vaho mitaron-to an-tro'e,

<sup>3</sup> ty tsy miteratera am-pamele'e,  
naho tsy mañinje i rañe'ey,  
vaho tsy mifosa ondatio.

<sup>4</sup> Mavo am-pihaino'e ty lo-tsereke,  
fe iasia'e o mpañevehne am' IEHOVÀo;  
ie mifanta ndra te mijoy vatañe  
vaho tsy ivaliha'e;

<sup>5</sup> Tsy mitake ana'e t'ie mampisongo drala, tsy  
mandrambe vokañe  
haneseke ty vantañe;  
le lia'e tsy hitroetroe ty manao zay.

# 16

*Onin-tsabo' i Davide* <sup>1</sup> Tambozoro raho, ry  
Andrianañahare,  
toe ama'o ty fitsolohako.

<sup>2</sup> Ty hoe ty tinaroko am' IEHOVÀ:  
Ihe ro Talèko, zaho tsy aman-kasoa  
nahy tsy ama'o.

<sup>3</sup> O noro'e an-tane atoio:  
ie ro talango'e,  
toe mampinembanembañe ahiko.

<sup>4</sup> Hampitomboeñe ty hasotria' ze  
mihitrike mb'an-tsamposampo'e aña;  
tsy hailiko ty engan-dranon-dio'iareo,  
le tsy ho rambesen-tsoñiko  
o añara' iareoo.

<sup>5</sup> IEHOVÀ ro anjara-lovako  
nahy ty fitoviko.  
Tohañe'o ty navike ho ahiko.

<sup>6</sup> An-toetse fanjaka ty nipoha' o taly  
ho ahikoo; Eka, soa i lovakoy.

<sup>7</sup> Andriañeko t'IEHOVÀ mpamere ahiko,  
ie haleña, anare' ty troko.

<sup>8</sup> Najadoko aoloko nainai'e t'IEHOVÀ.  
Ie ty an-tañako havana eo,  
tsy higavingaviña.

<sup>9</sup> Aa le tsy mahay avao ty troko,  
vaho mirebeke ty havokarako;  
mierañeraña ka ty sandriko,

<sup>10</sup> amy te tsy hapo'o an-tsikeokeok' ao ty fiaiko,  
vaho tsy hado'o hahani-pihomahaña i Masi'oy.

<sup>11</sup> Ampaharofaana'o ahiko  
ty lalan-kaveloña;  
lifotse hafaleaña ty añatrefa'o;

haravoravoañe nainai'e  
ro am-pitàn-kavana'o.

## 17

*Halali' i Davide* <sup>1</sup> Janjiño ty fahiti'e, ry IEHOVÀ,  
haoño ty fitoreoko,  
anoloro ravembia ty halaliko  
boak'an-tsoñy tsy amam-pitàke!  
<sup>2</sup> Ampionjono boak' añatrefa'o eo  
ty añomezan-to ahiko !  
Ampivazoho mahity o fihaino'oo !  
<sup>3</sup> Fa nitsohe'o ty troko,  
nahonitilihe'o te haleñe  
nahonadiñe'o,  
vaho tsy nahavazoho  
ty tsy mañeva miakatse am-bavako.  
<sup>4</sup> Aa ty amo sata' ondatio,  
o tsaram-pivimbi'oo ro nambenako  
tsy hombàko ty lala' o masia-menaos.  
<sup>5</sup> Fa mifahatse amo lala'oo o liakoo, tsy midora-  
sitse o tombokoo,  
<sup>6</sup> Ho kanjiekorehe, amy te toiñe'o  
ry Andrianañahare;  
atokilaño mb'amako o  
ravembia'oo, janjiño o tarokoo.  
<sup>7</sup> Aboaho an-kasoa ty fiferenaiña'o,  
Le rombaho am-pità'o havana  
amo miatreatreo, o mitsolok'ama'oo.  
<sup>8</sup> Faharo raho hoe te saintem-pihaino'o!  
aetaho añalon-talinjon-ela'o ao;  
<sup>9</sup> ty amo lo-tsereke mamaokeo,  
o rafelahiko mpañoho-doza  
miarikoboñe ahikoo.

- 10 Nakiti' iereo o tro' iareo vondrakeo;  
mivola firengevohañe o vava' iareoo.
- 11 Fa sinarokoho' iareo o lia'aio henaneo;  
nikirofeñe maso hametsake anay an-tane eo;
- 12 Manahake ty liona  
milelalela t'ie handrimitse,  
hoe liona tora'e mipiapia añ'etak' ao,
- 13 Miongaha, ry IEHOVÀ,  
atreatréo, goreo ambane!  
Hahao amo lo-tserekeo ty fiaiko,  
amy fibara'oy,
- 14 am'ondatio—am-pità'o ry IEHOVÀ—  
am' ondati' ty tane toio,  
fa an-kaveloñe atoy avao ty anjara'e;  
ie vontsiñe'o amo vara'oo o fisafoa'eo; henek'  
anake iereo; vaho ampandova' iareo an-  
tiri' iareo ty nivokara' iareo.
- 15 Naho zaho, ho treako an-kavañonañe ao ty  
lahara'o; hifale raho te tsekake  
mahatrea ty vinta'o.

## 18

*Ho a i Talèn-tsakera. Sabo' i Davide mpitoro' IEHOVÀ; nitaroñe'e am' IEHOVÀ ty onin-tSabo toy amy andro nandrombaha' IEHOVÀ aze am-pità' o rafelahi'eo naho am-pità' i Saole; Hoe re :*

<sup>1</sup> Kokoako rehe ry IEHOVÀ, haozarako.

<sup>2</sup> Ry lamilamiko, kijoly fipalirako,  
naho mpañaha ahiko; r'IEHOVÀ,  
ry tseram-bato fitsolohako, fikalan-defoko vaho  
tsifam-pandrombahañe ahiko,  
fitilik' aboko t'i Andrianañahareko.

<sup>3</sup> Kanjiekò t'IEHOVÀ, fa mañeva ho rengèñe;  
vaho votsotse amo rafelahikoo.

<sup>4</sup> Vinandibandi' o vahen-kavilasio,  
le ho nandimpotse ahy

ty fisorotombaha' i Beliale\*;

<sup>5</sup> Namolonkoñe ahy  
o vaham-pihomahañeo,  
niatreatre ahy o fandrìn-kavilasio.

<sup>6</sup> Nikoike IEHOVÀ t'ie nalovilovy,  
nikaik' imba aman' Añahareko;  
jìnanji'e an-kivofo'e ao ty feoko;  
vaho niheo añatrefa'e an-dravembia'e,  
ty toreoko.

<sup>7</sup> Niezeñezeñe vaho nihitikitike  
amy zao ty tane;  
niozoñozoño naho nanginikinike  
ty faha' o vohitseo amy fifombo'ey.

<sup>8</sup> Niforoake hatoeñe o fiantsona'eo  
naho boak' am-palie'e ao  
ty afo nahaforototo,  
nahasolebatse ty forofo.

<sup>9</sup> Nazè'e ka i likerañey vaho nizotso;  
ieñe mangonkòñe  
ty tambane' o fandia'eo.

<sup>10</sup> Niningira'e ty kerobe† le nitiliñe;  
eka nibiririñe añ'ela' i tiokey.

<sup>11</sup> Nanoe'e fietahañe  
ty hamoromoroñañe;  
ho kibohotse hañohok' aze,  
ty hangonkòn-drano,  
ty rahoñe migoboñe an-dikerañe ey.

---

\* **18:4** Beliale: Halò-tserehañe, i mpañinjeý † **18:10** kerobe:  
anjely masiñe zoke'e

- 12 Niboroboñak' amo rahoñe milodolodoo ty  
 havandra naho foroha mirekake  
 amy fireandreañe añatrefa'ey,  
 13 Nañàmpiñe an-dikerañe ao t'IEHOVÀ,  
 nampipoña-piarañanañañe  
 t'i Andindimoneñe;  
 havandra gadaboñe  
 naho foroha mirebareba.  
 14 Nahi'e mb'eo o ana-pàle'eo,  
 le nampivarakaihe'e;  
 nampiriaria'e ty helatse  
 vaho nampivalitsikotahe'e.  
 15 Niboak' amy zao o kadahan-dranoo, nikoren-  
 dake o faha' ty tane toio,  
 ami'ty fitrevo'o ry IEHOVÀ,  
 ami'ty fitorotosi' ty kofòm-piantsona'o.  
 16 Nirahe'e boak'añ'abo eñe,  
 le rinambe'e raho;  
 sininto'e boak' an-drano maro.  
 17 Rinomba'e amy rafelahiko maozatsey,  
 amo malaiñe ahikoo,  
 amy t'ie nifatratsé te amako.  
 18 Natretre' iereo amy andro naha-ampohek'  
 ahikoy, fe nañolots' ahiko t'IEHOVÀ.  
 19 Nampionjone'e mb'an-toetse  
 mangadagadan-draho,  
 hinaha'e amy te no'e.  
 20 Nanambe ahiko ami'ty  
 havantañako t'IEHOVÀ;  
 ami'ty halio tañako ro nañavaha'e ahiko.  
 21 Amy te ambenako o lala' IEHOVÀo;  
 vaho tsy mivik' aman'Añahareko  
 am-bodongeron-draho.  
 22 Hene tañatrefako o taro'eo,

le tsy nampisitaheko amako o fañè'eo.

<sup>23</sup> Tokan-tro ama'e raho,  
vaho milie-batañe tsy hanao sida;

<sup>24</sup> Aa le tinambe' IEHOVÀ amy havañonakoy,  
ami'ty falio-tañako am-pivazohoa'e.

<sup>25</sup> Ami'ty mitretre  
ro iboaha'o ho mpiferenaiñe,  
ami'ty vañoñe

ro iboaha'o ho vantañe,

<sup>26</sup> ami'ty mikanitsoke

ro iboaha'o ho ki'e.  
vaho ami'ty mengoke

ro iboaha'o ho minironiroke.

<sup>27</sup> Toe rombahe'o ty tretram-po,  
fe arè'o o maso mitahèbokeo.

<sup>28</sup> Ihe ro mamiañe ty jiroko,  
mampazava o iekoo  
ry IEHOVÀ Andrianañahareko.

<sup>29</sup> Ihe ro hañoridañako  
ty firimboñan-dahin-defoñe;  
mahavokon-jolok' ahy  
t'i Andrianañahareko.

<sup>30</sup> Aa naho i Andrianañahare!  
hiringiri'e ty lala'e‡,

niventeañe§ o fepè' IEHOVÀo;  
Ie ty Mpañaro' ze hene miato ama'e

<sup>31</sup> Ia t'i Andrianañahare  
nahy tsy IEHOVÀ?

Ia ty lamilamy nahy tsy  
i Andrianañaharen-tikañey?

<sup>32</sup> T'i Andrianañahare mpanikiñe  
ahy an-kaozarañe,

---

‡ 18:30 Sab 12:6, 119:140, Rzs 30:5    § 18:30 am-pitranahañe  
añ'afy ao

vaho mpamantañe ty liako.

<sup>33</sup> Ampanahafe'e amo tombom-panalokeo\* o  
tombokoo,  
avotra'e amo haboakoo.

<sup>34</sup> Aò'e hifandrapake o tañakoo,  
mahavohotse fale torisike o sirakoo.

<sup>35</sup> Natolo'o ahy ka  
ty fikalan-defom-pandrombaha'o;  
nahò nanozañe ahy  
ty fitàn-kavana'o,  
nampionjoñe ahiko  
ty hamoran' arofo'o.

<sup>36</sup> Nihalavae'o ty fandingañako ambaneko eo, fe  
tsy nidorasitse o tombokoo.

<sup>37</sup> Nihoridañeko o rafelahikoo le nahatratse,  
tsy himpoly raho nahò tsy t'ie fonga rotsake.

<sup>38</sup> Ie tinomboko tsy hiongake ka,  
nikorovok' ambane' tomboko eo.

<sup>39</sup> Fa nampidiañe'o amako ty haozarañe hialiako  
nahò ampiandalie'o amako  
o miatreatre ahikoo.

<sup>40</sup> Nampitolihe'o amako ty hàto'  
o rafelahikoo,  
vaho rinotsako o malaiñ' ahikoo.

<sup>41</sup> Nikaike iereo,  
fe tsy amam-pandrombake—  
am'IEHOVA, fe tsy tinoi'e.

<sup>42</sup> Aa le dinemodemoko ho deboke,  
haboelen-tioke iereo,  
nariako hoe litsak' an-dalañe ey.

<sup>43</sup> Vinotso'o ami'ty fioliñoliña' ondatio raho, le  
nampifehè'o ahy o fifelehañeo;

---

\* **18:33** hebreo: diera vave'e



mitoroñe ahy ondaty nofikoo.

<sup>44</sup> Vata'e mahajanjiñe iereo,  
le manoiñe ahy.

mitsolofiñe amako o anan-drenetaneo.

<sup>45</sup> Minik' avao o anan'ambahinio,  
le mihondrahondra t'ie miakatse  
am-pitsifira'e ao.

<sup>46</sup> Veloñe t'IEHOVÀ !  
Andriaño i lamilamikoy!  
onjoneñe t'i Andrianañaharem-  
pandrombahañe ahiko,

<sup>47</sup> i Andrianañahare mpamale-fate  
ho ahiy,

naho mampiandaly ondatio  
ambaneko eo,

<sup>48</sup> Haha'e amo rafelahikoo raho,  
toe onjone'o ambone'  
o mpitroatse amakoo,  
vaho avotso'o am' ondaty  
mitrotrofiakeo.

<sup>49</sup> Aa le handriañeko amo fifeheañeo rehe ry  
IEHOVÀ;

vaho ho saboeko ty Tahina'o.

<sup>50</sup> Ra'elahy ty fandrombahañe  
atolo'e amy mpanjaka'ey;  
vaho iferenaiña'e i noriza'ey,  
i Davide naho i tarira'ey nainai'e donia.

## 19

*Ho a i Talèn-tsakera; Sabo' i Davide* <sup>1</sup> Tseize'  
i likerañey ty engen'Añahare,  
misenge o tolom-pità'eo i lañelañey.

<sup>2</sup> Handro an-kandro t'ie midoan-tsaontsy,

haleñ' an-kale te mitaron-kihitse.

<sup>3</sup> Tsy aman-dañonañe tsy aman-tsara,  
tsy janjiñeñe o fiarañanaña'eo.

<sup>4</sup> Fe manitsike ty tane toy o tali' iareoo,  
pak'añ'olo-ty voatse toy o talili'eo;  
napo'e ama'e ao ty kivoho' i àndroy.

<sup>5</sup> Manahak' i mpañenga miakatse i akiba'ey,  
mitreñe hoe fanalolahy  
miherereake an-day.

<sup>6</sup> Hirik'angadon-dikerañ'eñe i fionjona'ey  
nahy ty fiaria'e pak' añ'olo'eo,  
vaho tsy eo ty mahafietake amy hatrovoha'ey.

<sup>7</sup> Ki'e t'i Hà' IEHOVÀ,  
mañavao ty haveloñe;  
to ty taro' IEHOVÀ,  
mampahihitse ty sotra;

<sup>8</sup> Mahity o fañè' IEHOVÀo, mampirebek' arofo;  
hiringiri'e ty fandilia' IEHOVÀ,  
mpañazava fihaino;

<sup>9</sup> Malio ty fañeveñañe am' IEHOVÀ,  
tsy mb'ia ho modo;  
vantañe o fizakà' IEHOVÀo  
hene mahity;

<sup>10</sup> Mahasinda te amo volamenao,  
eka ndra volamena maro hiringiri'e;  
vaho mamy te amo tantele  
nahy papi'e miorikeo;

<sup>11</sup> mbore hatahatae'e i mpitoro'oy,  
ra'elahy ty tambe t'ie oriheñe.

<sup>12</sup> Ia ty mahatsikarake o hila'eo?  
Liovo amo hakeo mietakeo raho.

<sup>13</sup> Afofio amo mpitoro'oo o fisengeañe,  
tsy mone hamehe ahy.

Halio tahiñe amy zao raho,  
vaho ho hahañe ami'ty fiolañe losotse.

<sup>14</sup> Ho no'o añ'atrefa'o abey  
o fivolam-bavakoo,  
nahy ty fitsakorean-troko  
ry IEHOVÀ, lamilamiko\*  
nahy mpijebam-piaiko.

## 20

*Ho a i Talèn-tsakera. Sabo' i Davide*

<sup>1</sup> Hanoiñ'azo an-tsan-kasotriañe t'IEHOVÀ,  
hañonjoñ' azo ankaboañe ey  
ty tahinan' Añahare' Iakobe.

<sup>2</sup> Hañitrifa'e imba  
boak'amy toe-miavakey  
hanohañ' azo hirik'e Tsiône ao.

<sup>3</sup> Ho tiahi'e o enga-mahakama iabio, vaho hi-  
antofa'e o fisoroña'oo! Selà

<sup>4</sup> Hatolots' azo ze salalan' arofo'o  
le ho henefeñe iaby o ereñere'oo.

<sup>5</sup> Ho poñafe'ay rebeke ty fandrombaha'o,  
ty tahinan' Añahare'ay  
ro añelachelà'ay kobaiñe;  
ho henefa' IEHOVÀ abey o halali'oo.

<sup>6</sup> Apotako henaneo,  
te ho rombahe' IEHOVÀ i noriza'ey;  
ho toiñe'e boak' an-dindi'e masiñe ao,  
amy haozaram-pandrombaha'  
i fitàn-kavana'eiy.

<sup>7</sup> Miato an-tsarete o ila'eo,  
an-tsoavala ka ty ila'e;  
fa ho tiahi'ay ty tahina' IEHOVÀ

---

\* **19:14** ndra: haozarako

Andrianañahare'ay.

<sup>8</sup> Nibokoke iereo naho nikorovoke mitroatse zahay vaho mijohañe.

<sup>9</sup> Rombaho, ry IEHOVÀ; hanoiñe abey i mpanjakay te kanjie'ay!

## 21

*Ho a i Talèn-tsakeray, Sabo' i Davide*

<sup>1</sup> RyIEHOVÀ, mirebeke ty haozara'o i mpanjakay; mandia taroba amy fandrombaha'oy.

<sup>2</sup> Fa natolo'o aze ty nainañ' arofo'e, le tsy nangazoña'o ama'e o halalin-tsoñi'eo. Selà

<sup>3</sup> Salakae'o am-pitahian-tsoa; apo'o añ'ambone'e eo ty sabaka volamena ki'e.

<sup>4</sup> Nihalalia'e haveloñe, le natolo'o aze, eka, halava andro kitro añ'afe'e.

<sup>5</sup> Mañonjoñe ty enge'e o fandreketa'oo, nanampeza'o asiñe naho volonahetse.

<sup>6</sup> Nampiraoraoe'o nainai'e; Ampirebehe'o ami'ty hafaleañe añ'atrefa'o.

<sup>7</sup> Iatoa' i mpanjakay t'IEHOVÀ, ie tsy ho ronjeronjeñe ty amy fiferenaiña' i Andindimoneñey.

<sup>8</sup> Ho onim-pità'o ze hene rafelahi'o; ho takarem-pitàn-kavana'o o malaiñe azoo.

<sup>9</sup> Hampanahafe'o ami'ty toñake mirekake iereo

an-tsam-piforoforoa'o;  
 hagodra' IEHOVÀ an-kaviñerañe,  
 vaho ho forototoe' ty afo.

<sup>10</sup> Ho mongore'o an-tane atoy  
 o tarira' iereo,  
 naho o tiri'iareeo amo ana'ondatio.

<sup>11</sup> Nikilily raty azo iereo,  
 nikitroke haratiañe ama'o,  
 f'ie tsy ho lefe,

<sup>12</sup> Hampiambohoe'o iereo  
 Ampibitsohe'o fale o lahara'eo.

<sup>13</sup> Mionjona ry IEHOVÀ an-kaozara'o !  
 Ho saboe'ay naho ho bangoa'ay  
 ty hafatrara'o!

## 22

*y Ho a i Talèn-tsakera ami'ty feo: Ty  
 Hirañe\* ami'ty manjirik'andro Sabo' i Davide*

<sup>1</sup> Andrianañahareko,  
 Andrianañahareko,  
 ino ty namorintseña'o ahiko?  
 Ihe nitotse ami'ty fañimbàn'ahy,  
 amo volam-pitoreovakoo?

<sup>2</sup> O Andrianañahareko,  
 koiheko handro, fe tsy toiñe'o;  
 haleñe, fe tsy mijanjiñe.

<sup>3</sup> Toe masin-dRehe,  
 imoneña'o ty fandrengea' Israele.

<sup>4</sup> Ama'o ty niatoan-droae'ay;  
 niantoke iereo, le navotso'o.

<sup>5</sup> Nikoaik' ama'o, le nihahañe;  
 niato ama'o, le tsy nisalitse.

---

\* 22: Heb: diera

6 Oletse raho, fa tsy ondaty;  
fosae' raolombelo, naho mavoe' ondatio.

7 Mañinje ahy am-piankahafañe  
hene mitari-tsoñy ze mahaoniñ'ahy,  
vaho mikofikofi-doha, ami'ty hoe:

8 Angao hiatoa'e t'IEHOVA!

Ie ro hañaha aze;  
apoho hasinta'e kanao noro'e!

9 Fa Ihe ro nañakatse Ahy an-koviñe ao;  
naho nampatokisa'o  
tam-patroan-dreneko eo.

10 Nafetsak' ama'o raho te niterake.  
Andrianañahareko rehe  
tan-kovin-dreneko ao.

11 Ko mitotse amako,  
fa antitotse o feh' ohatseo,  
vaho tsy amam-pañolotse.

12 Mañarikatok' ahiko o añombe-lahio;  
o maoza' i Basaneo ro mañarikoboñ' ahy.

13 Itañataña' iareo vava,  
manahake ty fireñetan-diona mañaolo.

14 Nadoañe hoe rano raho,  
mikalitroke iaby o taolakoo;  
fa karafo' tantele ty troko,  
mitranak' añ'ovako ao.

15 Mipike hoe tsilam-balañe-tane  
o ozakoo,  
mipitek' an-dañilañiko ty lelako;  
le nampandrea'o an-debo-kavilasy ao.

16 Miarikoboñe ahy o amboao;  
misarokohok' amako  
ty kidim-panao raty;  
fa trinofa' iereo o tañakoo  
naho o tombokoo.

17 Mahaiake o taolako iabio raho,  
sambae' iareo, harefe' iareo.

18 Ifanjarà' iareo o sikikoo,  
ifanoe'iereo tsato-piso i sarokoy.

19 F'ihe, ry IEHOVÀ, ko mihak' amako,  
ry Mpañimba, malisà hañolots'ahy!

20 Avotsoro amy fibaray ty fiaiko,  
ty troko sarotse  
ami'ty fisorodidian' amboa.

21 Hahao raho am-bavan-diona!  
Toiño ty amo tsifan-drimoo!

22 Ho taroñeko an-drolongoko  
ty tahina'o;  
ho rengeako añivo' i fivoriy.

23 Ry mpañeveñe am' IEHOVÀo : irengeo !  
ry hene' tiri' Iakobeo, ijejò,  
irevendreveño, ry afe' Israeleo.

24 Amy te tsy nimavoe'e, tsy nampangorý aze ty  
hasotria' o misotrio;  
naho tsy nañetaha'e laharañe,  
vaho jinanji'e t'ie nitoreo.

25 Boak' ama'o ty saboko  
am-pivory bey ao;  
havahako añatrefa' ze mañeveñ'  
ama'o o nifantàkoo.

26 Hikama o rarakeo le ho anjañe;  
ho rengè' o mipay azeo t'IEHOVÀ;  
ho veloñe nainai'e ty arofo' areo !

27 Songa hahatiahy naho hitolik' am'  
IEHOVÀ o olon-taneo,  
sindre hitalaho añatrefa'o  
ty hasavereña' ze kila' ondaty.

28 A IEHOVÀ i fifeheañey,

Ie ty mpameleke o kilakila ondatio

<sup>29</sup> Hikama naho hitalaho  
ze hene miraorao an-tane atoy;  
fonga hibokok' añaatrefa'e  
o mizotso mb'an-debokeo;  
vaho ze tsy mahatam-beloñe.

<sup>30</sup> Hitoroñ' Aze ty tiri'e;  
ho talilieñe amy tariratse  
manonjohiy i Talè,

<sup>31</sup> Homb'eo iereo hitalily ty havantaña'e  
am'ondaty mbe hasamakeo—  
t'ie nahafonitse.

## 23

*Sabo' i Davide* <sup>1</sup> Mpiarak' ahy t'IEHOVÀ,  
tsy hieran-draho;

<sup>2</sup> Ampandrea'e an-dovoke maindoñe ao,  
tehafe'e mb'añ'olon-drano  
mipendreñe mb'eo.

<sup>3</sup> Vaòe'e ty fiaiko,  
iaoloa'e mb'an-dalam-bantañe,  
ty amy tahina'ey.

<sup>4</sup> Ndra t'ie miranga i vatanen-  
talinjon-kavilasiy,  
tsy ho hemban-karatiañe  
amy te Ihe ro amako;  
mpañohò ahiko ty kobai'o  
naho ty fitoño'o.

<sup>5</sup> Halànkañe'o fandambañañe aoloko añaatrefan-  
drafelahiko eo;  
añiliña'o solike ty lohako,  
mandopatse ty fitoviko.

<sup>6</sup> Toe hañorik' ahy amo hene andro



hivelomakoo ty hasoa naho  
 ty fiferenaiñañe;  
 le hitobok' añ'anjomba' IEHOVÀ ao  
 nainai'e.

## 24

*Sabo' i Davide* <sup>1</sup> A IEHOVÀ ty tane toy naho ty  
 halifora'e, ty voatse toy,  
 naho o mpimoneñe ama'eo;

<sup>2</sup> Fa najado'e ambone' o riakeo,  
 vaho naore'e am-pisorotombahañe eo.

<sup>3</sup> Ia ty hahafitroatse  
 mb'am-bohi' IEHOVÀ ey?  
 Ia ty hijohañe an-toe'e miavake ao?

<sup>4</sup> Ty amam-pitàñe malio  
 naho amañ'arofo ki'e,  
 tsy mañonjoñe ty fia'i'e  
 mb'ami'ty tsy vente'e,  
 vaho tsy mifanta am-pamañahiañe.

<sup>5</sup> Handrambe fitahiañe am' IEHOVÀ re,  
 naho havantañañe amy Andrianañaharem-  
 pandrombahañe azey.

<sup>6</sup> Zay ty tarira' o mipay Azeo,  
 ie mitsoeke ty lahara'o—

Iakobe 'nio. Selà

<sup>7</sup> Ampiandrao o loha' areoo, ry lalambey! Mion-  
 gaha, ry lalañe haehaeo!

Hiziliha' i Mpanjaka rengeñey.

<sup>8</sup> Ia i Mpanjaka rengeñey?

IEHOVÀ maozatse naho fatratse,  
 IEHOVÀ Lahifhatiy.

<sup>9</sup> Ampiandrao o loha' areoo,  
 ry lalambey !

Eka, miongaha, ry lalañe haehaeo!  
 Hiziliha' i Mpanjaka rengeñey.  
 10 Ia i Mpanjaka rengeñey?  
 IEHOVÀ' i Màroy,  
 Ie ty Mpanjaka rengeñe. Selà

## 25

*Sabo' i Davide* 1 ✠ Ihe, ry IEHOVÀ !  
 ro añonjonako fiainē.  
 2 ☞ O ry Andrianañahareko,  
 ihe ro fiatoako,  
 ko anga'o ho salaren-draho; ko apo'o ho giohe' o  
 rafelahikoo.  
 3 ☞ Eka ndra ia ia mitamà azo  
 tsy hiolitsolitse; fe hilolidolitse  
 o mamañahy tsy aman-dengo'eo.  
 4 ☞ Ampahafohino ahy o lala'oo,  
 ry IEHOVÀ,  
 anaro ahy o oloñolo'oo.  
 5 ☞ Iaolò ami'ty hatò'o, le anaro;  
 Ihe Andrianañaharem-  
 Pandrombahañe ahy;  
 Ihe ro fitamàko lomoñandro.  
 6 ☞ Tiahio ry IEHOVÀ ty fiferenaiña'o  
 naho ty hafatram-pikokokoa'o,  
 ie fa toe haehae.  
 7 ☞ Ko tiahie'o o hakeom-paha-torakoo  
 naho o fiolàkoo,  
 fe tiahio ankalèn'arofa'o,  
 ami'ty hatrentra'o, ry IEHOVÀ,  
 8 ☞ Soa naho vantañ'arofa t'IEHOVÀ,  
 zay ty anoroa'e o manan-tahiñeo  
 i lalañey.

- 9 𐀀 Iaoloa'e ami'ty hatò o mpirèkeo, vaho  
anare'e amo sata'eo ty tretram-po.
- 10 𐀁 Songa fiferenaiñañe  
nahò figahiñañe o lala' IEHOVÀO,  
amo mpiambeñe i fañina'ey  
nahò o taro'eo.
- 11 𐀂 Amy tahina'oy, ry IEHOVÀ,  
apoho o hakeokoo, fa bey.
- 12 𐀃 Ia ty' ndaty mañeveñe am'IEHOVÀ?  
ho toroa'e ty lalan-tsoa ho joboñe'e.
- 13 𐀄 Hiaiñ'añ'oleñañe ty fai'e;  
handova i taney o tarira'eo
- 14 𐀅 Avere' IEHOVÀ o mañeveñe ama'eo;  
le ampahafohine'e iareo i fañina'ey.
- 15 𐀆 Mitolike mb'am' IEHOVÀ  
nainai'e o masokoo,  
amy te Ie ro mañakats' o tombokoo  
ami'ty harato.
- 16 𐀇 Mitoliha amako le iferenaiño, fa mijoriñe  
nahò misotry.
- 17 𐀈 Miebotse ty haemberan-troko,  
afaho amo hasosorakoo.
- 18 𐀉 Vazohò ty hasotriako  
nahò ty falovoloiaiko;  
vaho apoho o hakeokoo.
- 19 𐀊 Vazoho o rafelahikoo, te maro;  
heje' iareo am-palai-mena raho.
- 20 𐀋 Ambeno o fiaikoo, hahao,  
le ko ado'o ho salareñe,  
amy te Ihe ro fipalirako.
- 21 𐀌 Hañaro ahy o havañonañeo  
nahò o havantañañeo;  
fa mitamà Azo raho.

22 ▢ Jebaño t'Israele,  
ry Andrianañahare  
amo haembera'e iabio

## 26

*Sabo' i Davide* <sup>1</sup> Meo to raho, ry IEHOVÀ,  
fa mitrantràñe ami'ty havañonako;  
tsy nifejofejo ty fiatoako am' IEHOVÀ,  
vaho tsy hasiotse raho.

<sup>2</sup> Biribirio raho ry IEHOVÀ vaho tsoho;  
hotsohotsò ty añ'ovako naho an-troko.

<sup>3</sup> Aolo' o masokoo ty fiferenaiña'o,  
vaho manjotik' amo figahiña'oo raho.

<sup>4</sup> Tsy fitraofako toboko o mpamañahio, naho tsy  
fiharoako fijelanjelañe  
o soamiatrekeo.

<sup>5</sup> Hejeko ty fifañosoña' o tsivokatseo,  
vaho tsy fitraofako toboko  
o lo-tserekeo.

<sup>6</sup> Hanasa tañañ' an-kalio tahin-draho,  
vaho harikohoeko ty kitreli'o ry IEHOVÀ,

<sup>7</sup> Ho poñafeko ty feom-pañandriañañe,  
ho talilieko iaby o fitoloña'o fanjakao.

<sup>8</sup> Ry IEHOVÀ, teako ty fimoneñañe  
añ'anjomba'o ao,  
naho i kivofo fañialoañ' enge'oy.

<sup>9</sup> Ko aharo'o fitontoñe amo  
mpanan-kakeoo ty troko,  
ndra ty fiaiko am'ondaty mampiori-dioo;

<sup>10</sup> o mitan-kilily an-taña'eo,  
ie pea vokàñe ty an-taña'e havana ao;

<sup>11</sup> Aa naho zaho, hitsontik' an-kalio-tahiko; je-  
baño,

vaho matariha amako.

<sup>12</sup> Mijohañe an-tane mira ty tomboko;  
andriañeko am-pivory ao t'IEHOVÀ.

## 27

*Sabo' i Davide* <sup>1</sup> Hazavàko naho fandrombaha-  
hako t'IEHOVÀ, ia ty ihembañako?

Fipaliram-piaiko t'IEHOVÀ,  
ia ty hirevendreveñako?

<sup>2</sup> Ie niambotrak' amako o lo-tserekeo hampibot-  
seke o nofokoo;

le nitsikapy vaho nikorovoke  
o malaiñ'ahio naho o rafelahikoo.

<sup>3</sup> Ndra te hitobe hiatreatre ahy  
ty firimboñañe,

tsy ho vorombeloñe ty troko;  
ndra te hitroatse amako ty hotakotake, mbe  
hitam-patokisañe.

<sup>4</sup> Raha raike ty nihalalieko am' IEHOVÀ,  
zay ty ho paiaeko :

ty hitobohako añ'anjomba' IEHOVÀ ao

ze hene andro ivelomako,  
hahatrea ty hasoa-vinta' IEHOVÀ,

vaho hañontàne añ'akiba'e ao.

<sup>5</sup> Ampipalira'e an-kijà'e ao t'ie  
an-tsam-poheke,

akafi'e am-poreforetan-Kivoho'e ao;  
ampitongoa'e andigiligin-damilamy eo.

<sup>6</sup> Aa le honjoneñ' ambone' o rafelahiko mi-  
ariseho ahio ty lohako.

vaho ho banabanako soroñe  
an-drebeke mb'an-kivoho'e ao;  
ho saboako, eka ho rengèko

an-tsabo t'IEHOVÀ.

<sup>7</sup> Janjiño ry IEHOVÀ, naho ikaihako am-peo!

Iferenaiño vaho toiño.

<sup>8</sup> Nitaroñe' o ami'ty foko ty hoe:

Paiao ty tareheko;

toe ho tsoeheko ty vinta' o, ry IEHOVÀ.

<sup>9</sup> Ko aetak' amako ty lahara' o;

ko apo' o an-kaviñerañe ty mpitoro' o,

Ihe mpañolotse ahy ;

le ko aitoa' o, naho ko farie' o

ry Andrianañaharem-

pandrombahañe ahiko.

<sup>10</sup> Ndra t'ie nadon-drae naho rene,

ho rambese' IEHOVÀ.

<sup>11</sup> Anaro ahy ty lala' o, ry IEHOVÀ

vaho tehafo mb'an-dalañe mira

ty amo rafelahikoo.

<sup>12</sup> Ko asese' o an-tsatri'

o malaiñ' ahio;

fa atretréo o mpanara vandeo,

naho o mikofòke hasiahañeo.

<sup>13</sup> Hete! atokisako te ho treako

an-tanen-kaveloñe ao

ty hasoa' IEHOVÀ—

<sup>14</sup> Itamao t'IEHOVÀ, mihaozara,

le mihafatrara arofo; eka, liñiso t'IEHOVÀ.

## 28

*Sabo' i Davide* <sup>1</sup> Ihe, ry IEHOVÀ ro kanjiekoo,

ry Lamilamiko, ko mañovok' ahy,

kera, hianjiñe,

le hanahake o mizotso

mb'an-tsikeokeok' aoo raho.

<sup>2</sup> Janjiño ty feon-kalaliko

naho itoreovako,  
ie añonjonako sirañe  
mb'amy anjomba'o miavakey.

<sup>3</sup> Ko kororohe'o hitraok' amo  
lo-tserekeo, amo mpanao raty  
mivolan-kanitsiñe an-drañe'eo,  
te mone fikinian-draty ty am-po'e ao.

<sup>4</sup> Ondroho mira amo sata'eo,  
naho hambañe ami'ty haratia' o fitoloña'eo; eka,  
avaho mira  
amo satan-tañã'eo;  
valeo ama'e ty mañeva.

<sup>5</sup> Amy te tsy haoñe' iareo  
o tolon-draha' IEHOVÀ, ndra o fitoloñam-pità'eo.  
ho rotsahe'e iereo, le tsy hatroa'e ka.

<sup>6</sup> Andriañeñe t'IEHOVÀ,  
fa jinanji'e ty feon-kalaliko!

<sup>7</sup> IEHOVÀ ro haozarako naho fikalako,  
ty fiatoa' ty troko,  
toe fa nimbaen-draho,  
aa le irebeha' ty troko  
vaho rengèko an-tsabo.

<sup>8</sup> Haozara'iareo t'IEHOVÀ,  
kijolim-pandrombahañe i noriza'ey.

<sup>9</sup> Rombaho ondati'oo,  
naho ampanintsiño o lova'oo;  
Araho iereo vaho otroño nainai'e.

## 29

*Sabo' i Davide* <sup>1</sup> Atoloro am' IEHOVÀ,  
ry anam-panalolahy\*,  
manoloro engeñe naho haozarañe am'IEHOVÀ.

\* **29:1** anan'Añahare, ndra firimboñañ' Anjely

Mañengà volonahetse mañeva i tahina'ey,  
 mitalahoa am' IEHOVÀ ami'ty hafanjakam-  
 piavahañe.

<sup>3</sup> Ambone' o ranoo  
 ty fiarañanaña' IEHOVÀ,  
 mangotroke i Andrianañahare rengeñey;  
 ambone' rano mihenehene t'IEHOVÀ.

<sup>4</sup> Maozatse ty fiarañanaña' IEHOVÀ;  
 lifotse volonahetse  
 ty fiarañanaña' IEHOVÀ.

<sup>5</sup> Mampipozapozake o tezao  
 ty fiarañanaña' IEHOVÀ,  
 eka mamatsimpatsike o mendorave'  
 i Lebanoneo t'IEHOVÀ.

<sup>6</sup> Ampitsamboañe'e hoe tarabao  
 hoe te anan-drimo t'i Lebanone  
 naho i Sirione.

<sup>7</sup> Mampiriaria lel' afo  
 ty fiarañanaña' IEHOVÀ.

<sup>8</sup> Ampanginikinihe' ty fatram-bey  
 ty fiarañanaña' IEHOVÀ,  
 ampihondrahondrae' IEHOVÀ  
 ty fatrambei' i Kadese.

<sup>9</sup> Mampiterake o dierao  
 ty fiarañanaña' IEHOVÀ,  
 vaho ampikorendahe'e o alao;  
 le añ'anjomba'e ao,  
 songa miredoñe ty hoe : Engeñe!

<sup>10</sup> Niambesatse ambone' i fiepoepoañey  
 t'IEHOVÀ.  
 eka miambesatse ho  
 mpanjaka nainai'e t'IEHOVÀ.

<sup>11</sup> Ho tolora' IEHOVÀ faozarañe ondati'eo;  
 ho tolora' IEHOVÀ fañanintsiñe ondati'eo.



## 30

*Sabo; Saboeñe ami'ty Fañorizañe i Anjombay; a i Davide* <sup>1</sup> Honjoneko rehe ry IEHOVÀ, ami'ty nañongaha'o ahy, vaho tsy napo'o hitohàke amako o rafelahikoo.

<sup>2</sup> Ry IEHOVÀ, Andrianañahareko, nitoreovako le jinanga'o;

<sup>3</sup> Ry IEHOVÀ, naonjo'o boak' an-tsikeokeok' ao ty fiaiko; nahatam-beloñe ahy rehe tsy hizotsoako mb'an-koboñe ao.

<sup>4</sup> Sabò t'IEHOVÀ, ry ondaty noro'eo, andriaño i tahina'e masiñey.

<sup>5</sup> Amy te aniany avao ty haviñera'e, pak'an-kaveloñe heneke ty fañosiha'e; mete mahaporea' ty maraindray ty firovetañe, fe ho tendreke maraiñe ty firebehañe.

<sup>6</sup> Le hoe raho, te niraorao : tsim-bia hasiotse.

<sup>7</sup> Ry IEHOVÀ, ty fañisoha'o ro nampijadoña'o i vohikoy; ie naeta'o ty lahara'o le nimarimarike.

<sup>8</sup> Ihe ry IEHOVÀ ty nikoihako, naho i Talè ty nihalaliako;

<sup>9</sup> Ino ty tombo'e amo liokoo, t'ie higodoñe mb'an-koboñe ao? Hibango Azo hao o debokeo? Ho talilie'e hao ty figahiña'o?

<sup>10</sup> Janjiño ry IEHOVÀ, le tretrezo raho, ry IEHOVÀ, vaho imbao!

<sup>11</sup> Nafote'o ho tsinjake o fandalakoo;

hinalo'o amako o gonikoo, vaho sinaro'o  
 hafaleañe,  
<sup>12</sup> Soa te hisabo Azo ty engeko  
 le tsy hitsiñe;  
 Ry IEHOVÀ, Andrianañahareko,  
 handriañeko nainai'e.

## 31

*Ho a i Talè; Sabo' i Davide* <sup>1</sup> Ama'o ao, ry  
 IEHOVÀ, ty fitsolohako;  
 ko apoho ho salaren-ka,  
 hahao amo havantaña'oo.  
<sup>2</sup> Atokilaño amako ty ravembia'o, imbao masika,  
 t'ie ho lamilamy fipalirako,  
 kijolim-pandrombahañe ahy.  
<sup>3</sup> Toe Ihe ro lamilamiko naho kijoliko;  
 i Tahina'oy ro hanehake naho hiaolo ahy.  
<sup>4</sup> Akaro amy harato naeta'iareo amakoy,  
 amy te Ihe ro fitsolohako.  
<sup>5</sup> Am-pità'o ao ro anolorako troke,  
 fa nijebañe ahy rehe ry IEHOVÀ,  
 Andrianañaharen-kavantañañe.  
<sup>6</sup> Hejeko\* o mpañaoñe  
 ty hakoafan-dRemborakeo;  
 IEHOVÀ ro iatoako.  
<sup>7</sup> Hifale naho hirebeke  
 amo fiferenaiña'oo raho,  
 fa nihaoñe'o o hasotriakoo;  
 naho niarifoana'o  
 ty haferenaiñako,  
<sup>8</sup> tsy napo'o an-tañan-drafelahiko ao;  
 fa navotra'o an-tane mangadagadañe

---

\* **31:6** ndra: Heje'o

eo o tombokoo.

<sup>9</sup> Tretrezo ry IEHOVÀ, fa tokoen-draha;  
nabotsem-pihontoke o masokoo,  
eka, ty fiaiko naho ty sandriko.

<sup>10</sup> Fa niri-ty hontoke ty fiaiko,  
naho ty fiselekaiñañe o taokoo,  
milesa ty haozarako ty amo tahikoo,  
vaho minike o taolakoo.

<sup>11</sup> Toe finjèn-draho ty amo rafelahikoo,  
mentsake o mpiharo-tanàñ' amakoo,  
fañembañañe o rañekoo,  
mibotitsik' amako ze mahaoniñ' ahy  
an-dalañe ey.

<sup>12</sup> Haliño hoe lolo raho,  
tsy amam-betsevetse;  
manahake ty karabiba.

<sup>13</sup> Tsinanoko ty bisibisi' i màroy,  
harevendreveñañe mb'etia mb'atia,  
mikinia ahy,  
ikililia'e ty hañè-doza amako.

<sup>14</sup> Fe zaho, Ihe ro fiatoako ry IEHOVÀ  
hoe raho: Ihe ro Andrianañahareko.

<sup>15</sup> Am-pità'o o androkoo;  
avotsoro an-taña' o rafelahikoo,  
naho amo mpanao samporerakeo.

<sup>16</sup> Ampaviaho amy mpitoro'oy  
ty lahara'o;  
hahao amo fiferenaiña'oo.

<sup>17</sup> Ko apo'o ho salaren-draho ry IEHOVÀ,  
fa mikanjy Azo,  
fe meñaro o lo tserekeo, ampitsiño an-  
tsikeokeok' ao.

<sup>18</sup> Hampianjiñeñe  
o famelen-dremborake

manotratsotrake o vantaño  
ie mirengevoke naho mañinje.

<sup>19</sup> Akore ty harà' elahin-kasoa'o  
nahaja'o ho amo mañeveñ'ama'oo,  
ie nitsene'o ho amo mpitsolok' ama'o  
añatrefam-pihaino' o ana'ondatio!

<sup>20</sup> Akafi'o am-pipalirañe añatrefa'o iereo, ami'ty  
fikililia' ondatio; ampitsolohe'o an-kivoho  
ao tsy ho vorehe' o famelekeo.

<sup>21</sup> Andriañeñe t'IEHOVÀ,  
fa nilosore'e amako ty fiferenaiña'e,  
an-drova niarikatoheñe.

<sup>22</sup> Aa naho zaho, hoe raho te niendrake: ho  
naitoane aolom-pihaino'o eo.  
fe jinanji'o ty fivolan-kalaliko,  
te nikaiheko.

<sup>23</sup> Kokò t'IEHOVÀ ry noro'e iabio,  
arova' IEHOVÀ o migahiño,  
vaho avarigidi'e amo mpievoñoño ty avake.

<sup>24</sup> Mihaozara naho mihafatrara arofo  
ry hene mpitamà IEHOVÀ.

## 32

*Sabo' i Davide: Fañeretañe* <sup>1</sup> Haha ty nilioven-  
kakeo,  
ty nitakonana-tahiño.

<sup>2</sup> Haha t'indaty tsy anisia' IEHOVÀ tahiño,  
ie po-pamañahiañe an-tro'e ao.

<sup>3</sup> Ie nitsiño raho, le ninike o taolakoo  
ty amo fitoreovako lomoñandroo.

<sup>4</sup> Handro an-kaleño te nivesara'  
ty fità'o,  
nalongaño hoe hafaòsan' asara

ty ranom-piaiko. Selà

<sup>5</sup> Niantofako ama' o hakeokoo,  
tsy naetako o tahikoo.

hoe raho : Ho solohoeko am' IEHOVÀ  
o fiolàkoo; le napo' o

ty halò-tsere' o tahikoo. Selà

<sup>6</sup> Ie amy zao, songa hihalaly

ama' o o vañoño

ami'ty andro hahaoniñañ' Azo,

le tsy hahatakatse aze

ty fisorotombahan-drano bey.

<sup>7</sup> Ihe ro fipalirako;

harova' o t'ie am-poheke;

sabom-pañahàñe ty aňohoña' o ahy. Selà

<sup>8</sup> Hanareko naho ampaharendreheko azo ty lala  
homba' o;

hitoroako, fa ama' o o masokoo.

<sup>9</sup> Ko misare soavala ndra birike

tsy mahilala, ie tsy mahay tsy fehen-daboridy  
viñe ty vava'e,

tsy mone tsy harinea'e.

<sup>10</sup> Lako fihontoke o lo-tserekeo;

fe ohoñe' ty fiferenaiña'

IEHOVÀ ty miato ama'e.

<sup>11</sup> Mifalea am' IEHOVÀ,

mandià-taroba ry vantaño,

ipoñafo rebeke,

ry vañoñ' arofo iabio.

### 33

<sup>1</sup> Mirebeha am' IEHOVÀ, ry vantaño,  
toe mañeva o vañoño ty mandrenge.

<sup>2</sup> Andriaño ami'ty marovany t' IEHOVÀ,

rengeo an-tsabo, mititiha folo-taly.

<sup>3</sup> Isabò sabo vao;  
ititiho am-pahimbañañe,  
am-pipoñañafan-drebeke.

<sup>4</sup> Mahity ty tsara' IEHOVÀ,  
hene am-pigahiñañe o fitoloña'eo

<sup>5</sup> No'e ty havantañañe naho ty hatò:  
àtseke ty fiferenaiña' IEHOVÀ' ty tane toy.

<sup>6</sup> Ty tsara' IEHOVÀ ro nanoeñe i likerañey;  
ty kofom-palie'e i valobohò'ey.

<sup>7</sup> Atonto'e am-botry o ranon-driakeo;  
ahaja'e an-driha ao o lalekeo.

<sup>8</sup> Mirevendreveña am' IEHOVÀ ry tane toy; kila  
mañeveña ama'e  
ry mpimone' ty voatse toy.

<sup>9</sup> Tsinara'e le nifonitse; nandily, vaho nijadoñe.

<sup>10</sup> Koah'e IEHOVÀ ty fikinia' o fifeheañeo; afofi'e  
ty fikilila' ondatio;

<sup>11</sup> Mijadoñe nainai'e ty famerea' IEHOVÀ, pak'an-  
tariran-tariratse  
o fisafirin' arofo'e.

<sup>12</sup> Haha ty fifeheañe naho IEHOVÀ  
ro Andrianañahare'e,  
ondaty jinobo'e ho lova'eo.

<sup>13</sup> Mivazòho boak'  
an-dikerañe aña t'IEHOVÀ;  
oni'e iaby o ana'ondatio.

<sup>14</sup> Jilove'e boak' añ'akiba'e ao  
ze hene mpimoneñ' an-tane atoy;

<sup>15</sup> I mpitsene ty arofo' iareo iaby,  
sindre aharofoana'e ty fitoloña'e.

<sup>16</sup> Tsy ty fitozantoza' i màroy  
ty maharombake i mpanjakay;

tsy i haozara'e ra'elahiy  
ty mahavotsotse ty fanalolahy.

<sup>17</sup> Tsy jefa'e t'ie miato aman-tsoavalan'aly ho  
fiarovañe;  
tsy ty hara'elahin-kafatrara'e  
ty hahafipolitira'e.

<sup>18</sup> Inao, te itoliam-pihaino' IEHOVÀ  
o mañeveñe ama'eo,  
o mitamà i fiferenaiña'eio,

<sup>19</sup> ho votsora'e ty fi'ai' iareo tsy hihomake, vaho  
ho velome'e an-tsan-kerè.

<sup>20</sup> Mandiñe IEHOVÀ o tron-tikañeo;  
Ie ty mpañimba antika  
naho ty fikalan-defon-tika.

<sup>21</sup> Ama'e ty firebehan' arofon-tika,  
fiatoan-tika i tahina'e masiñey.

<sup>22</sup> Ho ama'ay abey ty fiferenaiña'o  
ry IEHOVÀ, fa mpitamà Azo.

## 34

*A i Davide, ie nañova vintañe añañtrefa' i  
Abimaleka, le nienga kanao rinoa'e.* <sup>1</sup> Andriañeko

an-tsà an-tsà t'IEHOVÀ,  
am-bavako ao nainai'e  
ty fandrengeañ' aze.

<sup>2</sup> Mirenge am' IEHOVÀ ty troko;  
ie ho janjiñe' o tretram-poo le hifalea'e.

<sup>3</sup> Antao hañonjoñe IEHOVÀ,  
hitrao-pibango i Tahina'ey.

<sup>4</sup> Nitsoehoko t'IEHOVÀ, le tinoi'e,  
fonga nafaha'e amako ty fangebahebako.

<sup>5</sup> Niandra ama'e iereo le niloeloe,

tsy ho kolopofen-kameñarañe ka ty tarehe' iareo.

<sup>6</sup> Nitoreo ty rarake,  
naho nijanjiñ' aze t'IEHOVÀ,  
vaho rinomba'e amo hasotria'e iabio.

<sup>7</sup> Mitobe mañohoke o mpañevehne ama'eo ty anjeli' IEHOVÀ, vaho haha'e.

<sup>8</sup> Tsopeho vaho mahaisaha  
te soa t'IEHOVÀ;  
fale t'indaty mitsolok' ama'e!

<sup>9</sup> Mañeveña am' IEHOVÀ, ry navahe'eo!  
amy te tampe-draha irieñe  
ze mañeveñ' ama'e.

<sup>10</sup> Mete mililitse vaho mifeake ty kerè  
o liona tora'eo;  
fe tsy ho po-kasoa o mitsoek' IEHOVÀo.

<sup>11</sup> Mb'etoa, ry anake, tsendreño;  
hatoroko anahareo  
ty fañeveñañe am' IEHOVÀ.

<sup>12</sup> Ia t'indaty misalala ho veloñe,  
naho mpitea andro, hahaisaha'e ty hasoa?

<sup>13</sup> Afofio ami'ty raty ty famele'o,  
naho o soñi'oo tsy hivolam-pitake.

<sup>14</sup> Iholiaro ty raty, le anò ty soa;  
mitsoeha filongoañe—le heañe.

<sup>15</sup> Miatreke o vantañe  
ty fihaino' IEHOVÀ,  
naho o fitoreo'eo o ravembia'eo.

<sup>16</sup> Atreatrè' IEHOVÀ an-daharañe  
o mpanao ratio;  
aitoa'e an-tane atoy  
ty fitiahiañe iareo.

<sup>17</sup> Mikaike, le mijanjiñe t'IEHOVÀ,  
ie haha'e amo hasotriañe iabio.



18 Marine' ty mikoretse añ'arofa t'IEHOVÀ,  
vaho rombahe'e o demok' an-trok'aoo.

19 Maro ty mañembetse o vañoño\* ,  
fe avotso' IEHOVÀ ama'e iaby.

20 Ambena'e iaby o taola'eo,  
leo raike tsy rifotse.

21 Havetra' ty haratiañe ty lo-tsereke,  
vaho hafätse ze malaiñe o vantaño.

22 Jebrañe' IEHOVÀ ty fiaï' o mpitoro'eo,  
leo raik' amo mitsolok' ama'eo  
tsy hafätse.

## 35

*Sabo' i Davida* <sup>1</sup> Ry IEHOVÀ, atretréo o mia-  
treatre ahio, mialia amo mifandrapak' amakoo.

<sup>2</sup> Andrambeso fikalan-defoñe  
naho fikala-meso,  
le miongaha hañolotse ahy.

<sup>3</sup> Apontsoaño ty lefo'o naho i fekon' aliy;  
hatreatrè'o o mañoridañ'ahikoo  
saontsio ami'ty fiaiko ty hoe :  
Zaho ro fandrombahañe azo.

<sup>4</sup> Salatse naho po-asiñe  
o mipay ty fiaikoo;  
ampiambohò vaho ampimeñaro  
o mikilily hijoy ahikoo.

<sup>5</sup> Ano ho kafo'e aolon-tioke eo,  
le hatao' i anjeli' IEHOVÀy soike.

<sup>6</sup> Ano haieñe naho halamañe  
ty fombà' iareo,  
horidañe' i anjeli' IEHOVÀy.

<sup>7</sup> Tsy aman-taly ty nañetaha'iareo harato,

---

\* **34:19** Sab 71:20, Ti II 3:11-12

tsy vente'e ty nihalien-koboñe ty fiaiko,

<sup>8</sup> Hivovò ama'e abey ty firotsahañe,  
le ho tsepahe' i harato naeta'ey;  
vaho amy firotsahañey ty hivarinjonjoha'e.

<sup>9</sup> Hirebek' am' IEHOVÀ ty fiaiko,  
hirenge amy fandrombaha'ey.

<sup>10</sup> Hanao ty hoe iaby o taolakoo:  
Ry IEHOVÀ ia ty hambañ' Ama'o?  
Mpandrombake o rarakeo  
amy maozatse te ama'ey;  
Eka, ty poie'e naho ty mpisotry  
amy mpamaok' azey.

<sup>11</sup> Mitroatse o mpitalily tsivokatseo,  
mañody ahy an-draha amoeako.

<sup>12</sup> Valè' iereo raty ty soa;  
mampioremeñe ty fiaiko.

<sup>13</sup> Aa naho zaho, nisaron-gony  
te natindry iereo,  
nirè-batañ'aman-dilitse,  
fe nimpoly an-troko i halalikoy.

<sup>14</sup> Nandenako hoe t'ie nirañeko ndra niraha-  
lahiko; nidròdreke an-kontoke manahake  
te nandala rene.

<sup>15</sup> Fe nirebeke iereo t'ie nikolettra, nifañosoñe,  
nifanontoñe hiatreatre ahy  
o mpamofoke alik' amakoo,  
nandrimitse ahy avao tsy nitroatse;

<sup>16</sup> hoe mpiteratera tsi-aman-Kake  
an-tsabadidake,  
ty ikodrita' iereo nife;

<sup>17</sup> O Talè, pak' ombia te hisamba avao?  
Avotsoro ami'ty fandrotsaha' iereo ty troko; amo  
lionao ty fiaiko.

18 Andriañeko am-pivori-bey ao;  
mijejo azo am-balobohòk' ao.

19 Lonike tsy hirebeha' o rafelahiko tsy amam-  
poto'eo;

tsy hipie maso amako o malaiñe ahy  
tsy aman-tali'eo.

20 Tsy mivolam-pilongoañe iereo,  
te mone mikilily volam-pitake  
amo mianjiñe an-tane atoio.

21 Eka ivañavaña' iereo vava  
manao ty hoe :

Hiy! Hiy! fa nitrea' o maso'aio.

22 Nivazoho'o

ry IEHOVÀ, ko mianjiñe;

ry Talè, ko mitòtse amako

23 Mitsekafa, mivañona hañomea'o to ! Imbao i  
ahikoy ry Andrianañahareko

naho Talèko.

24 Izakao ry IEHOVÀ Andrianañahareko

ty amy havantaña'oy;

le ko apo'o hirebeha' iereo.

25 Ko ado'o hanoe'e ty hoe

an-troke:

Hiry! ty fañiria'ay! ndra ty hoe :

Fa nabea'ay.

26 Atraofo salareñe naho meñareñe o mitohàk'  
amy haemberakoio;

ampisikinen-kameñarañe naho inje

o mirengèvok' amakoo.

27 Hipoñak' an-drebeke naho

handia-taroba

o mifale ami'ty halio tahikoo;

hitolom-panao ty hoe:

Onjono t'IEHOVÀ,

ry mpifale amy fanintsiña' i mpitoro'eiy.  
<sup>28</sup> Hitaroñe ty havantaña'o ty lelako,  
 ty enge'o lomoñandro.

## 36

*Ho a i Talè, Sabo' i Davide, mpitoro' IEHOVÀ*

<sup>1</sup> Mivolañe an-karatiañe an-tro'e ao ty Tsi-vokatse. Toe tsy aolo' o maso'eo ty fañeveñañe aman' Añahare.

<sup>2</sup> Mitsiriry ty vata'e o maso'eo,  
 ie maharendreke te mavoeñe o sata'eo.

<sup>3</sup> Tahiñe naho hakalitahañe  
 o fivolam-bava'eo;  
 nado'e ty hihitse tsy anoe'e ty hasoa.

<sup>4</sup> Mikitro-karatiañe an-tihi'e eo,  
 mijohañ' ami'ty lalañe tsy mahasoa;  
 tsy rihie'e ty haloloañe.

<sup>5</sup> Ry IEHOVÀ, mahatakatse an-dikerañe ao ty  
 fiferenaiña'o,  
 an-drahoñe eñe ty figahiña'o.

<sup>6</sup> Manahake o vohitse ra'elahio  
 ty havantaña'o, miheotse o fizaka'oo,  
 ry IEHOVÀ, Hene ambena'o  
 ndra ondaty ndra biby.

<sup>7</sup> Fanjaka ty fiferenaiña'o, ry Andrianañahare !  
 vaho mipalitse an-talinjon'ela'o ao  
 o ana' ondatio;

<sup>8</sup> Ie anjañe' ty havokara' o anjomba'oo,  
 vaho ampikamae'o añ'oñen-karavoravao'o.

<sup>9</sup> Fa ama'o ty rano itsititahan-kaveloñe;  
 an-kazavà'o ao ro ahaoniña'ay hazavàñe.

<sup>10</sup> Toloño amo mahafohiñ'Azoo  
 ty fiferenaiña'o;

naho amo vañon-trokeo ty havantaña'ò.

<sup>11</sup> Ee te tsy homb'amako

ty tombom-pinevonevoke, vaho tsy hanao soik'  
ahy ty tañan-do-tsereke.

<sup>12</sup> Mifitake ey o mpanao ratio,  
naronje ambane, tsy hitroatse ka.

## 37

*Sabo' i Davide* <sup>1</sup> ✠ Ko embetse amo tsivokatseo,  
vaho ko tsikirihe'ò o mpanao ratio,

<sup>2</sup> F'ie hiforejeje aniany hoe ahetse,  
vaho hiheatse hoe rongo-maindoñe.

<sup>3</sup> ☩ Miatoa am' IEHOVÀ, le anò ty soa;  
imoneño i taney

vaho rañeto ty figahiñañe.

<sup>4</sup> Mifalea am' IEHOVÀ; le hatolo'e azo  
ty fisalalàn' arofo'ò.

<sup>5</sup> ☩ Ampiatò am' IEHOVÀ ty fombà'ò,  
Atokiso, vaho ie ty hitoloñe.

<sup>6</sup> Le hampionjone'e hoe hazavañe  
ty havantaña'ò,

vaho hoe an-tsipinde-mena  
ty havañona'ò.

<sup>7</sup> ☩ Manintsiña am' IEHOVÀ

naho mahaliñisa;

ko ihobira'ò ty miraorao an-tsata'e,  
t'indaty mitoloñ' am-pikitrohan-dratio.

<sup>8</sup> ☩ Fario o habosehañe, naho apoho ty fombo;  
ko embetse kera hañosi-karatiañe.

<sup>9</sup> Toe haitoñe o tsy vokatseo,

fa handova i taney ze mitamà IEHOVÀ \*.

\* **37:9** Sab 37:11,22,29,34, Mat 5:5

- 10 ʎ Aniany le tsy ho eo i lo-tserekey,  
ho tsoehe'o i akiba'ey f'ie tsy ho trea.
- 11 Toe handova i Taney o tretram-poo,  
hifale am-piraoraoañe vokatse.
- 12 † Kililie' i lo-tsereke ty vantañe,  
vaho ampikodrita'e nife.
- 13 Iankahafa' i Talè,  
fa arofoana'e te an-titotse ty andro'e.
- 14 ▯ Fa napontsoa' o tsivokatseo  
ty fibara,  
vaho nampibitsoke fale  
hametsaha'e ambane  
o rarakeo naho o misotrio,  
hañohofa'e loza  
amo an-dala mahitio.
- 15 Hitrofaha' i fibaray ty tro' iareo,  
vaho ho pekañeñe ty fale' iareo.
- 16 ʘ Hamake ty kedekedek' anaña'  
ty vantañe  
ta ty havokara' o tsivokatse maroo.
- 17 Toe ho pozaheñe ty sira' o lo-tserekeo,  
fe tohaña' IEHOVÀ o vañoño.
- 18 ʙ Arofoana' IEHOVÀ ty andro'  
o vantañeo,  
tsy ho modo kitro añ'afe'e ty lova'iareo;
- 19 Tsy ho salatse an-tsan-karatiañe;  
le ho anjañe an-tsam-paosa.
- 20 ʘ Hikoromake o tsy vokatseo,  
le hanahake ty safon' añondry  
o rafelahi' IEHOVÀo,  
ie himosaoñe an-katòeñe,  
toe himiañe.
- 21 ʘ Misongo i tsivokatsey  
fe tsy mañavake;

matarike i vantañey vaho mañomey.

<sup>22</sup> Toe handova i taney o tahie'eo,  
fe haitoañe aña o afà'eo.

<sup>23</sup> 𐀀 Ampijadoña' IEHOVÀ  
ty lia' ondaty, ie no'e i lala'ey.

<sup>24</sup> Ndra t'ie mikorovoke  
tsy hidaboñe,  
fa tohaña' IEHOVÀ am-pitàne.

<sup>25</sup> 𐀁 Nitora'e raho,  
fa antetse henaneo,  
mboe liako tsy nahatrea te  
naforintseñe o vañoño, o keleia'eo.

<sup>26</sup> Matarike lomoñandro re naho  
mampisongo, vaho vokatse o tiri'eo.

<sup>27</sup> 𐀂 Ihankaño ty raty, le anò ty soa,  
vaho himoneñe kitro añ'afe'e.

<sup>28</sup> Tea' IEHOVÀ ty hatò,  
le tsy ho farie'e o mpañorike i Ha'eio;  
soa-fipalitse nainai'e iereo;  
fe haitoañe ty tiri' o lo-tserekeo.

<sup>29</sup> 𐀃 Handova i taney o vañoño, vaho himoneñe  
nainai'e.

<sup>30</sup> 𐀄 Mañaka-kihitse ty falie' o vantaño,  
manao saontsi-to i famele'ey.

<sup>31</sup> Añ'arofo'e ao ty Hàn'Añahare'e†,  
tsy midorasitse o fandia'eo.

<sup>32</sup> 𐀅 Tampone' ty tsivokatse ty vantañe, mipay  
hañè-doza ama'e.

<sup>33</sup> Fe tsy hapo' IEHOVÀ an-taña'e ao,  
vaho tsy hado'e hafàtse an-jaka.

<sup>34</sup> 𐀆 Itamao t'IEHOVÀ,

† 37:31 Its 6:6, Sab 40:8, 119:11, Ies 51:7

naho ambeno i lala'ey,  
le honjone'e handova i taney,  
vaho ho isa'o ty fañitoañe o tsivokatseo.

<sup>35</sup> 𐀀 Fa nitreako ty lahiaga, tsivoatsolo,  
nandrevake hoe hatae maindoñe  
an-tane'e ao;

<sup>36</sup> Fe nihelañe aña, le heheke, tsy eo;  
pinaiko fa tsy nahatrea.

<sup>37</sup> 𐀀 Henteo ty vañoñe, hehe i vantañey, ho soa-  
figadoñe ty mifampilongo.

<sup>38</sup> Fe hatrao-karotsake o mpandilatseo  
vaho ho tomereña ty figadoña'  
ty lo-tsereke.

<sup>39</sup> 𐀀 Boak' am' IEHOVÀ  
ty fandrombahaña o vañoño,  
Ie ty fitsoloha' iareo an-tsàm-poheke.

<sup>40</sup> Imbàe' IEHOVÀ naho votsore'e;  
haha'e amo tsivokatseo vaho rombahe'e,  
amy te Ie ty fipalira' iareo.

## 38

*Sabo' i Davide, Tiahy* <sup>1</sup> Ry IEHOVÀ, ko mitre-  
vok'ahy

ami'ty fifombo'o;  
naho ko andilova'o  
ami'ty fiforoforoa'o.

<sup>2</sup> Fa mitsamantake amako  
o ana-pale'oo,

vaho manindry ahy ty fità'o.

<sup>3</sup> Tararèña ty fiaiko te hatorifiha'o, naho po-  
pijanganaña o taolakoo,  
ty amy tahikoy.

<sup>4</sup> Fa nalipo' o hakeokoo ty lohako,



hoe kilankañe mavesatse tsy leoko.

<sup>5</sup> Mantiñe naho miborake o ferekoo  
ty amy hadagolako.

<sup>6</sup> Mihohokohoke raho naho mibokoke,  
toe mandala lomoñandro.

<sup>7</sup> Lifo-pihobobohañe ty vaniako,  
tsy aman-kajangañe ty sandriko.

<sup>8</sup> Volevole raho, loho demoke,  
miñeoñeñe ty fioremeñan-troko.

<sup>9</sup> O Talè, fonga añatrefa' o eo ty fisalalàko, naho  
tsy mietak' ama' o ty fiselekaiñako.

<sup>10</sup> Midebodebo ty troko,  
milesa ty haozarako;  
naho nieng' ahiko ty hazavà' o masokoo.

<sup>11</sup> Ampiesoñe' i angorosiko  
o mpiamakoo naho o rañekoo;  
naho mitrobàke ey o longokoo.

<sup>12</sup> Nampidreñafe' o mipay ty fiaikoo fandrike  
raho,  
ikililia' o mipay hijoy ahikoo,  
toe ikinia'e hakalitahañe  
lomoñandro.

<sup>13</sup> F'ie manahake te giñe,  
tsy mahatsanoñe raho,  
hoe bobo kanao tsy mahasoka-bava.

<sup>14</sup> Eka, manahake ondaty valagiñe,  
tsy aman-dietse am-palie.

<sup>15</sup> Ihe ry IEHOVÀ ro fisalalàko,  
toe hanoiñe rehe ry Talè  
Andrianañahareko.

<sup>16</sup> Fa inao ty ahy :  
Tsy mone hirebeke iareo,  
ke hirengevoke te  
midorasitse o tombokoo.

17 Toe veka'e hikorovoke raho,  
amako lomoñandro ty fanaintaiñako.

18 Toe iantofako o hakeokoo;  
naho lifo-kasosorañe ty amo tahikoo.

19 Fe maizatse naho mahasibeke  
o rafelahikoo,  
maro ty malaiñe ahy tsy vente'e,

20 aa kanao valea'iareo raty ty soa,  
heje' iareo ty fañorihako ty hasoa.

21 Ko mamorintseñ' ahy ry IEHOVÀ,  
ko mitotse amako  
ry Andrianañahareko,

22 Malisà hañimb' ahy ry Talè,  
Fandrombahañ' ahy.

## 39

*Ho a i Talè, atao Iedotone, Sabo' i Davide* <sup>1</sup> Hoe  
raho: Hambenako o lalakoo,  
tsy mone handilatse an-delako.

hampidiñeko an-daboridy ty vavako  
ie añatrefako eo o lo-tserekeo.

<sup>2</sup> Nimoañe raho naho nitsiñe,  
nijomohòñe, ndra ami'ty soa,  
fe nanjeke avao ty haloviloviako.

<sup>3</sup> Mitsovovoke ty an-troko ao,  
miforehetse i afoy te mitsakore,  
vaho hoe ty fivolan-delako :

<sup>4</sup> Ry IEHOVÀ, ampandrendreho ahy  
ty figadoñako,

naho ty zehe' o androkoo—te ino, ampaharo-  
foano ahy

ty habori' o havelokoo.

<sup>5</sup> Hehe te nanoe'o an-jehe o androkoo,

vaho tsy vente ama' o o taokoo;  
 toe songa hoe kofòke avao  
 ndra te añañ'ay t'indaty. Selà  
 6 Manao firiorion-talinjo ondatio,  
 tsy vente'e ty fihepakepaha'e,  
 hampitoabotoàbotse vara,  
 fe nofi'e ty hangoroñ' aze.

7 Aa inom-bao, ry Talè,  
 ty liñisako henaneo?  
 Ama' o ty fitamàko.

8 Hahao amo fonga fiolàkoo,  
 ko salare' o amo seretseo.

9 Fa mijomohòn-draho  
 tsy manoka-bava; amy te Ihe ty nanao zay.

10 Afaho amako ty angorosi'o;  
 tomontoñe raho ty amy fanindriam-pità'oy.

11 Añ'endake ty andilova' o ondatio  
 ty amo tahi'eo,  
 momohe' o hoe fizara o fisengea'eo.  
 Toe songa kofòke avao ondatio.

12 Janjiño o halalikoo ry IEHOVÀ,  
 vaho toloro ravembia o fitoreoko.  
 Ko mianjiñe ty amo ranomasokoo,  
 fa ambahiny ama' o raho, renetane manahak' an-  
 droaeko iaby.

13 Atoliho tsy hisamba' o ahy, hisomilahako, aolo'  
 ty fiengako tsy ho eo ka.

## 40

*Ho a i Talè, Sabo' i Davide* <sup>1</sup> Nitamàko am-  
 pahaliñisañe t'IEHOVÀ,  
 le nitokilaña'e, vaho jinanji'e ty fitoreoko.

<sup>2</sup> Naaka'e an-koboñe namparikoriko,  
 naho boak' an-dietse nipaletroke,  
 vaho nampitongoà'e ambone  
 lamilamy eo o tombokoo;  
 le nalaha'e o liakoo.

<sup>3</sup> Napo'e am-bavako ao ty sabo vao,  
 fijejoañe aman'Añaharen-tikañe;  
 maro ty hahaoniñe le hañeveñe,  
 vaho hitsolok' am' IEHOVÀ.

<sup>4</sup> Haha ty manao IEHOVÀ ho fiatoa'e,  
 naho tsy mitolike  
 mb'amo mpirengevokeo,  
 vaho tsy mitsile mb'an-dremborake.

<sup>5</sup> Maro, ry IEHOVÀ Andrianañahareko,  
 o fitoloña'o fanjàkao,  
 naho ty fivetsevetse'o anay,  
 tsy eo ty mañirinkiriñe Azo !  
 Naho nitaroñeko naho nilañoñeko,  
 mbe mandikoatse ze mete ho talilieñe.

<sup>6</sup> Tsy mahafale Azo o soroño\* naho  
 o enga-mahakamao;  
 sinoka'o o sofikoo;  
 tsy nipaia'o ty engan-kolorañe  
 ndra ty engan-kakeo.

<sup>7</sup> Le hoe raho : Intoy raho, hamb'eo,  
 fa nisokireñe am-boke-pelek' ao;

<sup>8</sup> Noko, ry Andrianañahareko,  
 ty mitoloñe amo satrin'arofoo;  
 eka, an-troko ato o Tsara'oo†.

<sup>9</sup> Fa nitaroneko am-pivori-bey ao ty talily soan-  
 kavantañañe;  
 tsy ho sebañeko o soñikoo,

---

\* **40:6** Heb 10:5-6 † **40:8** Sab 37:31, 119:11, Ies 51:7, Heb 10:7-9

ry IEHOVÀ, Ihe ro maharofoañañe.

<sup>10</sup> Tsy naetako an-troko ao  
ty havantaña'o;  
fa nitaroñeko ty figahiña'o  
nahy ty fandrombaha'o;  
vaho tsy nakafiko amy fivori-beiy  
ty fiferenaiña'o nahy ty hatò'o.

<sup>11</sup> Ry IEHOVÀ ko hazoñeñ' amako  
ty fitretreza'o;  
añaro ahy nainai'e ty fiferenaiña'o  
nahy ty hatò'o.

<sup>12</sup> Miarikoboñe ahy ty haratiañe tsifotofoto; mi-  
ambotrak' amako o hakeokoo,  
le tsy mahafiandra,  
ie maro te amo volon-dohakoo,  
vaho milesa ty troko.

<sup>13</sup> Ho no'o abey ry IEHOVÀ ty hamotsotse ahy;  
malisà ry IEHOVÀ hañolotse ahy,

<sup>14</sup> Le aharò salareñe nahy meñareñe  
o mipay ty fiaiko hasintake;  
ampiamboho vaho injeo  
o te hijoy ahio.

<sup>15</sup> Ehe ampidabao an-kenatse  
ze manao amako ty hoe: Hiy! Hiy!

<sup>16</sup> Hirebeke nahy hifale ze mipay Azo,  
vaho hitolon-kanao ty hoe  
o mpitea i fandrombaha'oio:  
Onjoneñe t'IEHOVÀ.

<sup>17</sup> Aa kanao rarake nahy misotry raho,  
ee t'ie ho vetsevetse' i Talè;  
Ihe ro mpañimba nahy mpañaha ahy,  
ry Andrianañahareko; ko mihenekeneke.

# 41

*Ho a i Talè, Sabo' i Davide* <sup>1</sup> Haha ty mañaõe  
o rarakeo;

ie ho votsore' IEHOVÀ an-tsan-kankàñe.

<sup>2</sup> Harova'IEHOVÀ le ho tana'e veloñe naho  
hatao'e haha amy taney eo,

naho tsy apo'e an-tsatin-tron-drafelahy

<sup>3</sup> Ho tohaña' IEHOVÀ amy tihy tindria'ey;  
hafote'o ho jangan-dre am-pandream-pisilofa'e  
eo.

<sup>4</sup> Aa naho zaho, hoe ty asako: ry IEHOVÀ,  
Atariho, jangaño ty fiaiko, fa nandilarako.

<sup>5</sup> Manambaitambaiñ' ahy o rafelahikoo: ombia  
t'ie hikoromake,  
hihomaha' i aña'ey?

<sup>6</sup> Ie mitilik' ahy,  
manao rehan-dremborake;  
mangoroñe hakeo ama'e ty tro'e;  
ie miavotse, volañe'e.

<sup>7</sup> Ivesovesoa' o malaiñe ahy iabio,  
mikilily joy, ami'ty hoe:

<sup>8</sup> Mipitek' ama'e ty bilokan-kokolampa;  
kanao mitsilañe re, tsy hitroatse ka.

<sup>9</sup> Eka, ndra i rañeko nianteharakoy,  
i nikama i hanekoiy,  
fa nañonjo tomitse amako.

<sup>10</sup> F'Ihe ry IEHOVÀ, iferenaiño,  
vaho atroaro hamaleako iareo.

<sup>11</sup> Zao ty aharendrehako te no'o,  
t'ie tsy irohafa' o rafelahikoo.

<sup>12</sup> Naho izaho, tozañe'o ami'ty havañonako,  
naho ampañatrefo' o laharañe amako nainai'e.

<sup>13</sup> Andriañeñe t'IEHOVÀ

Andrianañahare'Israele,  
haehae vaho nainai'e donia. Amena naho  
Amena.

## Fange Faha II

*Sabo 42 - 72*

### 42

*Ho a i Talè, Fañereñere' o Ana' i Korao*

<sup>1</sup> Manahake ty fisehasehàn-temboay  
an-torahañe mitsiritsioke  
ty fisañasañan-troko ama'o  
ry Andrianañahare.

<sup>2</sup> Iheahèan-troko t'i Andrianañahare,  
i Andrianañahare veloñey;  
ombia ty hombako hiheo mb'añatrefan'Añahare  
mb'eo?

<sup>3</sup> Filintsako handro an-kale,  
o ranomasokoo,  
ie kizaheñe lomoñandro, ami'ty hoe :  
Aia ze o Andrianañahare'o zao?

<sup>4</sup> Tiahiko o raha zao,  
le haborako ty an-troko ao,  
ie nindrezako lia i màroy,  
ninday iareo nangovovoke  
mb'añ'anjomban' Añahare mb'eo,  
am-peom-pirebehañe  
naho fandrengeañe,  
i lahialeñe mitañ'andro nifotoañeñey

<sup>5</sup> Ino ty ilonjera'o ry fiaiko?  
ino ty ikoreokoreoha'o añ'ovako ao?  
Mitama an'Andrianañahare;  
fa mbe ho andriañe'o,  
ty fandrombahañe añ'atrefa'o.

<sup>6</sup> Ry Andrianañahareko,

Mitsilofiñe añ'ovako ao ty troko,  
 tiahiko rehe boak' an-tane Iordane\* ao,  
 naho an-dengo' i Kermone† eñe,  
 hirik'am-bohi-Mitsarey‡ aña.

<sup>7</sup> Tokave' i lalekey ty laleke  
 ami'ty fitroña' o kinaera'eo.  
 songa mandipotse ahy  
 o onja naho ren-drano'oo.

<sup>8</sup> Hafanto' IEHOVA an-kandro  
 ty fiferenaiña'e,  
 le amako an-kaleñe i sabo'ey,  
 ty halaliko aman' Añaharen-kaveloko.

<sup>9</sup> Hoe raho aman' Añahare lamilamiko:  
 Akore ty nandikofa'o ahiko?  
 Ino ty andalàko ty famorekekèan-  
 drafelahy?

<sup>10</sup> Hoe fañotohotoañe ty an-taolako ao,  
 ty fiteratèra' o rafelahikoo;  
 ie anoa'e ty hoe lomoñandro,  
 Aia ze o Andrianañahare'o zao?

<sup>11</sup> Ino ty ilonjera'o, ty troko tia?  
 Ino ty fivalitsikotahañe añ'ovako ao?  
 Mitamà an'Andrianañahare;  
 fa mbe handriañe'o  
 i fandrombahan-tareheko  
 naho Andrianañaharekoy.

## 43

<sup>1</sup> Meo to, ry Andrianañahare,  
 mañalalaña ho ahy  
 amy fifeheañe tsy aman-Kàkey;

---

\* **42:6** Iordane: sakam-pizakàñe † **42:6** Kermone: natokañe  
 ho rotsaheñe ‡ **42:6** Mitsare: kedeke



hahao am'ondaty mamañahy  
naho mengokeo.

<sup>2</sup> Ihe ro Andrianañaharen-kaozarako;  
Ino ty nifaria'o ahiko?

Ino ty ibokobokoako am-pigoboñañe ao  
ie forekeken-drafelahy?

<sup>3</sup> Ahitrifo ty hazavà'o naho ty hatò'o,  
hiaolo, hanese ahy mb'amy  
vohi'o miavakey mb'eo,  
vaho mb'an-kivoho'o mb'eo.

<sup>4</sup> Le homb'an-kitrelin' Añahare mb'eo,  
mb'aman'Añahare  
mampinembanembañ' ahy,  
vaho ho saboeko ami'ty marovany,  
t'i Abo-Tia, Andrianañahareko.

<sup>5</sup> Ino ty mahalonjetse azo ty fiaiko tia?  
inoñe ty angoihoia'o amako ao?  
Mitamà an'Andriaenañahare;  
fa mbe handriañeko,  
i fandrombaham-piatrefako  
naho Andrianañaharekoy.

## 44

*Ho a i Talèn-tsabo,*

*Sabo o ana' i Korao : Itsakoreañe* <sup>1</sup> Ry Andri-  
anañahare,

fa jinanjin-dravembia'ay, fa natalilin-droae'ay o  
fitoloñañe nanoe'o

tañ' andro' iereeo,  
amo andro faha' matoetoeo.

<sup>2</sup> Ie am-pità'o ty nandroake  
o fifeheañeo le najado'o eo ;  
dinemo'o ondatio, vaho naparatsia'o.

<sup>3</sup> Tsy ty fibara' iareo ty nahazoañe i taney;  
le tsy o fità' iareo ty naharombake,  
fa ty fità'o havana naho ty sira'o,  
vaho ty hazavan-dahara'o  
amy t'ie nisohe'o.

<sup>4</sup> Mpanjakako rehe, ry Andrianañahare;  
lilio fandrombahañe t'Iakobe.

<sup>5</sup> Ihe ro igorea'ay o rafelahi'aio;  
ty tahina'o ty andialia'ay o mitroatse hiatreatre  
anaio.

<sup>6</sup> Tsy iatoako ty faleko,  
tsy maharombak' ahy ty fibarako.

<sup>7</sup> Fa Ihe ro nandrombak' anay  
amo rafelahi'aio,  
nahonanalatse o malaiñe anaio.

<sup>8</sup> I Andrianañahare ro  
firengea'ay lomoñandro,  
vaho andriañe'ay nainai'e ty tahina'o. Selà

<sup>9</sup> F'ie nifarie'o henaneo,  
nahoninje'o;  
tsy indreze'o fionjonañe o lahindefo'aio.

<sup>10</sup> Ampiambohoe'o amo rafelahi'aio,  
vaho mamaok' an-tsatri'e avao  
o malaiñe anaio,

<sup>11</sup> Fa natolo'o ho añondry kamaeñe,  
vaho nampivarakaihe'o amo fifeheaño.

<sup>12</sup> Naleta'o ami'ty minjilite'e ondati'oo,  
tsy nahazoan-tombo'e t'ie naletake.

<sup>13</sup> Nampañinje'o o mpifankarineo, fanivetiveañe  
nahofandraboñañe  
amo mañohok' anaio.

<sup>14</sup> Anoe'o oha-drehake o fifeheaño,  
fikoliñan-doha am'ondatio.

<sup>15</sup> Fañinjeañe lomoñandro ty aoloko eo,

vaho nampikolopok' ahy  
 ty hameñaran-tareheko,  
 16 ami'ty fivola' o mikobike  
 naho mamàtseo;  
 ty amy fiatrefan-drafelahiy  
 vaho i mpamale-fatey.

17 Toe hene nifetsak' ama'ay,  
 f'ie tsy nañaliño Azo,  
 vaho tsy nivalik' amy fañina'oy.

18 Toe tsy niamboho Azo o arofo'aio,  
 vaho tsy niveve amy lala'oy o fandia'aio,

19 f'ie dinemo'o an-toem-panalok' eo, vaho ki-  
 nolopo'o an-talinjon-kavilasy.

20 Aa naho nandikofa'ay  
 ty tahinan'Añahare'ay,  
 ke namela-pitàñe aman-drahare  
 ankafankafa;

21 Tsy ho nitsikarahen' Añahare hao?  
 Kanao arofoana'e ze mikafitse an-trok'ao.

22 Eka, Ihe ro anjamanañe anay  
 handro am-pohatse;  
 volilieñe hoe añondry ho lentañe.

23 Mivañona, ry Talè, Ino ty irota'o?  
 Mitsekafa, ko farie'o  
 kitro katroke zahay.

24 Akore ty ampietaha'o laharañe,  
 naho añaliñoa'o ty hasotria'ay  
 vaho ty halovilovia'ay?

25 Fa mibokok' an-debok' ao ty fiaia'ay;  
 mipitek' an-tane eo ty fisafoa'ay.

26 Miongaha hañolotse anay, vaho jebaño ty amy  
 fiferenaiña'oy.

## 45

*Ho a i Talè: ty amy talifokey; Sabo' o ana' i Korao, Fanoroa, Sabom-Pikokoañe* <sup>1</sup> Andipore' ty troko i talily soay:

Hoe raho: I mpanjakay ro fitoloñako;  
fisokim-panokitse mahimbañe ty lelako.

<sup>2</sup> Tsomerentsereñe ta o ana'ondatio n'Itheo;  
idoañam-pañisohañe

o fivimbi'oo,  
aa le nitahien'Añahare kitro añ'afe'e.

<sup>3</sup> Adiaño an-toha'o ty fibara'o,  
ry Fanalolahy,  
ty enge'o naho volonahe'o.

<sup>4</sup> Mionjona am-pandreketañe  
am-bolonahe'o, hañonjonañe ty hatò  
naho ty halèn-arofo,  
vaho ty havantañañe;  
le hañoke azo an-draha mampañeveñe  
ty fità'o havana.

<sup>5</sup> Masioñe ty ana-pale'o añ'arofon-drafelahi' i  
mpanjakay ao—mihotrakotrak' ambane'o  
ondatio;

<sup>6</sup> Nainai'e donia, ry Andrianañahare,  
ty fiambesa'o;  
kobain-kavantañañe  
ty kobaim-pifehea'o.

<sup>7</sup> Fitea'o ty havañañañe,  
falai'o ty hatsivokarañe\*;  
aa le nañory azo t'i Andrianañahare, Andri-  
anañahare'o,  
an-tsolim-pirebeñañe  
ambone' o rañe'oo.

---

\* 45:7 Heb 1:8-9

8 Ze hene saro'o ro tsotse naho emboke vaho  
mañidè!  
marovany boak' amo anjomba nitemereñe  
nifem-bibio ro ifalea'o.

9 Anak'ampelam-panjaka  
ro amo noro'oo;  
mijohañe am-pitàn-kavana'o eo  
ty tañanjomba'o am-bolamena  
ki' i Ofire.

10 Mitsendreña ry anak'ampela,  
Inao! atokilaño ty sofi'o,  
andikofo o rofoko'oo,  
naho ty anjomban-drae'o.

11 Mahasinda i mpanjakay  
ty hamontramontra'o;  
iambaneo kanao talè'o.

12 Hibanabana ama'e  
ty anak' ampela' i Tsore,  
Hipay fañisoahañ' ama'e o mpañaleale  
am'ondatio.

13 Fanjàka añ'anjomba ao  
ty anak'ampela' i mpanjakay,  
vinahotse am-bolamena o saro'eo.

14 Ho roroteñe mb'amy mpanjakay mb'eo  
an-tsaroñe soa vinahotse,  
hasese ama'o rekets' o somondrara  
mpiama'e mpañotroñe azeo.

15 Amañ'ehake naho an-drebeke  
ro aneseañe iareo; ie ampiziliheñe añ'anjomba'  
i mpanjakay.

16 Handimbe'an-droae'o o ana-dahi'oo;  
horiza'o ho mpiaolo' i tane iabiy iereo.

17 Hampitiahiekio ze hene tariratse  
ty tahina'o,  
hañandriañe azo nainai'e donia ondatio.

## 46

*Ho a i Talè, Sabo o ana' i Korao, saboen' Ampela* <sup>1</sup> Fitsolohañe naho haozaran-tika

t'i Andrianañahare,  
Mpañolotse t'ie ampoheke tendrek' aniany.

<sup>2</sup> Aa le tsy ho hemban-tika  
ndra te migorobañe ty tane,  
ndra midorasitse mb'am-po'  
i riakey o vohitseo.

<sup>3</sup> Ndra te mitroñe  
naho mamore i riakey,  
ndra te miezeñezeñe amy fitoabora'  
o alo'eo o vohitseo. Selà

<sup>4</sup> Eo ty oñe mahafale ty rovan' añañare  
amo fitsiritsioha'eo,  
ty kivoho masi' i Andindimoneñey.

<sup>5</sup> Añivo'e ao t'i Andrianañahare,  
le tsy hasiotse;  
hañimb'aze t'i Andrianañahare  
te manjirik'andro.

<sup>6</sup> Nidabadoa o kilakila ondatio,  
niozoñoñoñe o fifeheaño;  
nipazake i fiarañanaña'ey,  
nitranake ty tane.

<sup>7</sup> Aman-tika t'IEHOVÀ' i Màroy;  
fipaliran-tika t'i Andrianañahare' Iakobe.

<sup>8</sup> Mb'etoa, mahaoniña  
o tolon-draha' IEHOVÀo,  
o raha mampangebahebake  
nanoe'e an-tane atoio.

<sup>9</sup> Ampitsiñe'e sikal'añ'olo-tane aña o alio;  
peñaapeñafe'e o faleo, pozahe'e o lefoño,  
sodora'e añ'afo o sareten-tafikeo.

<sup>10</sup> Mijihera, vaho mahafohina te

zaho ro Andrianañahare;  
onjoneñe amo fifeheaño raho,  
izonjonañe an-tane atoy !

<sup>11</sup> Aman-tika t'IEHOVÀ' i Màroy;  
fipaliran-tika t'i Andrianañahare'  
Iakobe. Selà

## 47

*Ho a i Talè, Sabo' o ana' i Korao* <sup>1</sup> Mitehafa  
fitañe, ry hene ondatio;

poñafo aman'Añahare  
ty fiarañanañam-pirebehañe.

<sup>2</sup> Mampañeveñe t'IEHOVÀ  
andindimoneñe ey,

ie mpanjaka jabahina' ty tane toy.

<sup>3</sup> Ampiambane'e aman-tika ondatio,  
ze kilakila ondaty  
ambanem-pandian-tikañ' ao.

<sup>4</sup> Ie i nijoboñe lova ho antikañey,  
ty firengea' Iakobe kokoa'ey. Selà

<sup>5</sup> Nionjoñe am-pipoñafam-pitreñañe  
t'i Andrianañahare;  
ami'ty fivolan'antsiva t'IEHOVÀ.

<sup>6</sup> Takasio t'i Andrianañahare, isabo;  
takasio i mpanjakan-tikañey, isabo.

<sup>7</sup> I Andrianañahare ro mpanjaka'  
ty tane toy;  
mitakasia an-tsabo soa arake.

<sup>8</sup> Fehen' Andrianañahare o fifeheaño;  
miambesatse am-piambesa'e masiñe  
eo t'i Andrianañahare.

<sup>9</sup> Mifanontoñe o roandria' ondatio;  
ondatin' Andrianañahare' i Avrahameo  
fa an'Andrianañahare

o fikalan-defo' ty tane toio;  
ie onjoneñ' an-tiotiotse ey.

## 48

*Takasy; Sabo' o ana' i Korao* <sup>1</sup> Jabahinake

t'IEHOVÀ,

vaho rengeñe mb'añ'abo;  
an-drovan' Añaharen-tikañe,  
i vohi'e miavakey.

<sup>2</sup> Fanjàka an-toe'e eo,  
ty hafalea' ty tane toy,  
ty vohi' i Tsiône añ'ila'e avaratse ey,  
ty rova' i Mpanjaka hinakinakey.

<sup>3</sup> I Andrianañahare an-kijoli'ey,  
ty nampandrèndreke t'ie ro fipalirañe.

<sup>4</sup> Hehe, nifanontoñe o mpanjakao,  
nitrao-pionjoñe mb'etoañe,

<sup>5</sup> Nioni' iereo; le nilatsa; nangetraketrake, vaho  
nitriban-day.

<sup>6</sup> Namihiñe iareo ty fihondrahondra,  
ninivonivotse hoe ampela mitsongo.

<sup>7</sup> I tiok' atiñanañey ty ampivaletrahe'o  
o lakam-bein-Tarsiseo.

<sup>8</sup> Hambañe amy jinanjin-tikañey  
ty nionin-tika

an-drova' IEHOVÀ' i Màroy,  
an-drovan' Añaharentikañe ao;  
ee t'ie hajadon' Añahare tsy ho modo  
nainai'ey. Selà

<sup>9</sup> Nitsakorea'ay ty fiferenaiña'o  
ry Andrianañahare  
añivo' i anjomba'o miavakey.

<sup>10</sup> Manahake i tahina'oy



ry Andrianañahare,  
 ty fandrengeañe Azo,  
 pak' añ'olo' ty tane toy;  
 lifo-kavantañañe ty fità'o havana.

<sup>11</sup> Ampifaleo i vohitse Tsiôney,  
 ampirebeho o anak' ampela' Iehodào  
 ty amo fizakà'oo.

<sup>12</sup> Mañariaria amy Tsiône,  
 ikariokarioho, volilio o fitilik-abo'eo,

<sup>13</sup> Hehe o kijoli'eo,  
 rangao o fitalakesañ'abo'eo;  
 hahatalilia'o i tariratse mandimbey.

<sup>14</sup> Zay t'i Andrianañahare,  
 Andrianañaharen-tikañey, nainai'e donia.  
 Ie ty hiaolo antikañe pak'an-kavilasy.

## 49

*Ho a i Talè, Sabo' o Ana' i Korao* <sup>1</sup> Janjiño zao,  
 ry kilakila ondatio;

manokilaña ravembia,  
 ze hene mpimone' ty tane toy;  
<sup>2</sup> Ty ambane naho ty ambone,  
 ty mpañaleale miharo ami'ty rarake.

<sup>3</sup> Hivolan-kihitse ty vavako,  
 vaho ho ereñeren-troko ty hilala.

<sup>4</sup> Hatokilako mb'am-  
 pandrazañan-drehake ty sofiko.  
 ho ventareko an-dokanga  
 ty tafatòño,

<sup>5</sup> Ino ty hahahembañ' ahiko  
 an-tsan-kankàñe,  
 ie miarikoboñe ahy ty hatsivokara'  
 o mpañonjo-tomitse amakoo,

<sup>6</sup> o mpiato amo fanaña'eoo,  
vaho mirengevok' ami'ty habei' o vara'eo?

<sup>7</sup> Leo ondaty raiké, ndra manao akore, tsy  
hahavoavily ty ain-dongo'e, ndra hibana-  
bana jebañe

aman'Añahare ho aze—

<sup>8</sup> Loho sarotse ty vilin' ai'e,  
tsy mete tsy hadoke kitro katroke:

<sup>9</sup> —t'ie ho veloñe nainai'e,  
tsy hahaoniñ' i koboñey,

<sup>10</sup> ie oni'e te mihomake o mahihitseo;  
songa mikenkañe ty minè naho i dagola,  
vaho apo'e amo ila'eo ty vara'e.

<sup>11</sup> Ty fitsakorean-tro' iareo t'ie tsy ho modo o  
akiba'eo,

naho ty fimoneña' iareo  
mb'an-tariratse iaby kitro añ'afe'e,  
ie atao'e amy añara'ey i tane'ey.

<sup>12</sup> Toe tsy mahatan-ty asi'e ondatio;  
le manahake o bibio t'ie mate.

<sup>13</sup> Zay ty fombà' o sèretseo,  
naho o mandimbe iareoo,  
ze miantoke ty enta' iareoo. Selà

<sup>14</sup> Hoe añondry iereo  
tinendry ho mb'an-kibory ao,  
ho mpiara'iareo ty havilasy;  
ho fehe' o vañoño te maraindray;  
ho a' i tsikeokeokey ty vinta' iareo  
hihomak' ao, tsy hanaña' iareo akiba ka.

<sup>15</sup> Fe ho jebañen' Añahare  
ami'ty haozara' o kiborio ty fiaiko,  
le ho rambese'e. Selà

- 16 Ko hemban-drehe naho mihamaro ty vara' ondaty,  
 naho mitombo ty enge' i anjomba'ey;  
 17 F'ie mihomake, tsy eo ty hendese'e.  
 tsy hañorik' aze higodañe ao ty enge'e.  
 18 Eka! nitata'e  
 ty fia'i'e te nivelohne:  
 Nitsiririeñe t'ie niraorao.  
 19 Homb'am-pimoneñan-droae'e ao re;  
 tsy ho isa'e ka ty hazavañe.  
 20 T'indaty iasiañe, mete tsy maharendreke t'ie,  
 manahake o bibio, hihomake.

## 50

- Sabo' i Asafe* <sup>1</sup> Nitsara t'IEHOVA Andri-  
 anañahare  
 Tsitongerè, nikoike ty tane toy  
 boak' am-panjiriha' i àndroy  
 sikal' am-pitsofora'e aña.  
<sup>2</sup> Hirik'e Tsiône ao,  
 ty hafoniran-kamotsotsoreña,  
 ty fireandreañan' Añahare.  
<sup>3</sup> Mb' etoy i Andrianañaharen-tikañey,  
 ie tsy hianjiña;  
 mamorototo aolo'e ty afo,  
 iarisehoa' ty tangololahy.  
<sup>4</sup> Kanjie'e mb'andikeraña añ'abo eña,  
 naho mb'an-tane atoy  
 hizaka'e ondati'eo:  
<sup>5</sup> Atontono amako o norokoo, o nifañina amako  
 an-toroña.  
<sup>6</sup> Mitsey ty havantaña'e o likeraña;  
 amy te Ie ro Andrianañahare,

Ie ty Mpizaka. Selà

<sup>7</sup> Mijanjiña ry ondatiko,

le hivolan-dRaho;

Ry Israeleo, hisesehako,

Zaho ro Andrianañahare, Andrianañahare’o.

<sup>8</sup> Tsy o fisoroña’oo ro añendahako azo,

ie añatrefako eo nainai’e

o enga fañoroa’oo.

<sup>9</sup> Tsy ho rambeseko boak’añ’akiba’o ao

ty añombelahy,

ndra hirik’an-golobo’o ao ty oselahy.

<sup>10</sup> Amy te hene ahiko ze biby añ’ala ao,

naho ty añombe am-bohits’ arivo.

<sup>11</sup> Haiko iaby o voroñe am-bohitseo,

Fonga ahiko ze misitsitse an-kivok’ ao.

<sup>12</sup> Naho nikerè Raho, tsy ho nivolañe,

amy te Ahiko ty voatse toy,

naho ty halifora’e.

<sup>13</sup> Hihinañako hao ty nofo’ o añombeo?

hinomako hao ty lio’ o oselahio?

<sup>14</sup> Engao aman’ Añahare

ty sorom-pañandriañañe,

naho avaho amy Andindimoneñey

o nifantà’oo.

<sup>15</sup> Le koiho Raho añ’andro

maha-an-koheke;

ho hahako rehe, vaho hiasia’o.

<sup>16</sup> Fa hoe t’i Andrianañahare

amo tsivokatseo

Ino ty anoñona’o o fandiliakoo?

vaho endese’o am-bava’o ao i fañinakoy?

<sup>17</sup> Inao t’ie malain-dilo,

naho afetsa’o amboho’o ao o entakoo.

<sup>18</sup> Ie manjo-mpikizo rehe, le no’o,

vaho ireketa'o o karapiloo.

<sup>19</sup> Avotso'o an-kaloloañe ty falie'o,  
vaho mikilily fitake ty famele'o.

<sup>20</sup> Mitoboke rehe vaho mifosa rahalahy;  
dramote'o ty anan-drene'o.

<sup>21</sup> Ie anoe'o zay, hijomohoñe hao Raho?  
natao'o ho hambañe ama'o hao,  
toe endahako,  
vaho alahako añatrefam-pihaino'o eo  
o entako ty ama'oo.

<sup>22</sup> Aa le ereñereo zao,  
ry mpandikok' an'Andrianañahareo  
kera ho rangodrangoteko,  
ihe tsy amam-pañaha.

<sup>23</sup> Mañonjoñ' Ahy ty mañenga  
sorom-pañandriañe;  
vaho hampalangeseko  
amy mamantañe i fañaveloa'eiy  
ty fandrombahan' Añahare.

## 51

*Ho a i Talè: Sabo' i Davide, ami'ty fitiliha' i  
Natana mpitoky, ie fa niolots' amy Bat'sebae.* <sup>1</sup> Ry

Andrianañahare,  
matariha amy hafatraram-pikokoa'o, faopaoho o  
fiolàkoo amo hara'elahim-piferenaña'oo,

<sup>2</sup> Kotriño hitoratsike amo tahikoo,  
liovo amo fandilarakoo.

<sup>3</sup> Apotako o fiolàkoo:

vaho miatrek' ahy nainai'e o hakeokoo.

<sup>4</sup> Ama'o, le ama'o avao ty nandilarako;  
naho nanao hatsivokarañe  
am-pivazohoa'o;

soa te ho rendreke to t'ie mitsara,  
vaho vantañe te mizaka.

<sup>5</sup> Toe naterak' an-kakeo raho,  
naho an-tahiñe t'ie niareñan-drene.

<sup>6</sup> Inao, mipay hatò añ'ova ao rehe,  
aa le ampandrendreho hihitse  
mietake raho.

<sup>7</sup> Efero an-tseva\* raho, hikotritriake;  
ampandrò ho foty matsatsaoke  
te amo volovasoo†.

<sup>8</sup> Ampitsanoño firebehañe  
naho hafalean-draho;  
soa te hiankahake o taolañe dinemo'oo.

<sup>9</sup> Aetaho amo tahikoo ty lahara'o,  
ehe fonga forò o hakeokoo.

<sup>10</sup> Itseneo fo vao ry Andrianañahare;  
le vaò añ'ovako ao ty troke migahiñe.

<sup>11</sup> Ko ahifike tsy ho añatrefa'o eo raho,  
le ko apitsok' amako i Arofo'o Masiñey.

<sup>12</sup> Ampolio amako ty hafalea'  
i fandrombaha'oy,  
itohano ho aman-troke mahimbañe.

<sup>13</sup> Le hampahafohineko  
o aman-kakeoo o lala'oo,  
hampioliañe o mpanan-tahiñeo.

<sup>14</sup> Hahao ami'ty lio-màlin-draho,  
ry Andrianañahare, Andrianañaharem-  
pandrombahañ' ahikoy;  
le ho saboen-delako o havantaña'oo.

<sup>15</sup> O Talè, sokafo o soñikoo  
hitaroñam-bavako ty fandrengeañ' Azo

<sup>16</sup> Toe tsy mahafale Azo o soroño,

---

\* **51:7** Hysopa: rongofie famitsen-dio: Avo 12.22    † **51:7**  
ranom-panala

fa ho nibanabanaeko;  
tsy no'o o soroñe oroaño.

<sup>17</sup> Ty soron' Añahare, le troke mihoto;  
tsy ho sirikae'o ry Andrianañahare,  
ty arofo rofotse naho mikoretse.

<sup>18</sup> Hasoao i Tsiône ami'ty fatariha'o;  
atroaro o kijoli' Ierosalaimeo.

<sup>19</sup> Izay vaho ho no'o  
o sorom-bantaño:  
o soroñe oroaño naho soroñ' añaño;  
le hengañe bania ambone' i kitreli'oy.

## 52

*Ho a i Talè, Sabo' i Davide, naho niheo  
mb'amy Saole t'i Doege nte Edome, nitalily te  
noly añ'anjomba' i Ahimeleke t'i Davide.* <sup>1</sup> O  
Fanalolahio, ino ty firoharohà'o  
hatsivokarañe?

Lomoñandro ty fiferenaiñan' Añahare.

<sup>2</sup> Mikilily fandrotsahañe ty famele'o,  
manahake ty fiharatse masioñe;  
ty mpamañahy tia.

<sup>3</sup> Tea'o ty raty te ami'ty soa;  
i lañitsey ta te hivolan-to. Selà

<sup>4</sup> No'o ze atao fivolan-katramoañe, ty fameleke  
mamañahy tia.

<sup>5</sup> Aa le harotsan'Añahare kitro-katroke, ho sin-  
tone'e, le hapitso'e amy kiboho'oy, vaho  
hombota'e an-tanen-kaveloñe. Selà

<sup>6</sup> Ho isa' o vantaño, naho hañeveñe  
vaho hiankahake ty hoe :

<sup>7</sup> Hehe t'indaty tsy nanao  
an'Andrianañahare ho fipalira'e;

fe ty habei' o vara'eo ty niatoa'e,  
vaho o fikinia'eo ty nihaozara'e.

<sup>8</sup> Aa naho zaho, le hoe sakoa mandrevake  
añ'anjomban'Añahare ao;

iatoako nainai'e donia  
ty fiferenaiñan' Añahare,

<sup>9</sup> Andriañeko nainai'e rehe,  
amy te Ihe ty nanao zay,  
vaho ho tamaeko i tahina'oy  
ie ty soa añatrefa' o noro'oo.

## 53

*Ho a i Talè, atao Hasilofañe, Fanoroa' i Davide*

<sup>1</sup> Hoe ty dagola an-tro'e ao:

Tsy ao t'i Andrianañahare.

Vàlañe iareo,

mpanao hakeo mampangorý;

leo raike tsy manao soa.

<sup>2</sup> Jiloven' Añahare boak'an-dikerañe ao

o ana' ondatio,

hivazohoa'e ke ao ty mahilala,

mpitsoek' an'Andrianañahare.

<sup>3</sup> Songa niamboho,

niharo naniva vatañe,

tsy eo ty manao soa, leo raike.

<sup>4</sup> Tsy maharendreke hao

o mpitolon-karatiañeo?

o mampibotseke ondatiko

hoe mitamboavokake mofo,

vaho tsy mikanjy an'Andrianañahareo.

<sup>5</sup> Hehe t'ie mirevendreveñe,

ndra te tsy eo ty mahahembañe;

fa navarakain' Añahare ty taola'



o nitobe hiatreatre azoo;  
 nisalare'o, fa naporintsen'Añahare.  
 6 Toe hiboake amy Tsiône  
 ty fandrombahañe Israele!  
 Ie hampolien' Añahare ondati'e mirohio;  
 Le hirebeke t'Iakobe, vaho hifale t'Israele.

## 54

*Ho a i Talè, ami'ty Marotaly, Fanoroa' i Davide: ie niheo amy Saole o nte-Zifio nanao ty hoe: Aa vaho tsy ama'ay ao hao ty fietaha' i Davide?* <sup>1</sup> Rombaho raho ry Andrianañahare ty amy tahina'oy, vaho meo-to amo haozara'oo.  
<sup>2</sup> Ry Andrianañahare, janjiño ty halaliko, toloro ravembia o entam-bavakoo.  
<sup>3</sup> Miongake hiatreatre ahy ty ambahiny, paia' o mitrotrofiakeo ty fiaiko, tsy nampiaoloe' iareo t'i Andrianañahare. Selà  
<sup>4</sup> Inao! Mpañimb'ahy t'i Andrianañahare, Fiatoam-piaiko t'i Talè.  
<sup>5</sup> Hafote'e amo mivoñoñe ahiko ty haratia' iareo; Rotsaho iereo ami'ty figahiña'o.  
<sup>6</sup> Mañenga ama'o an-tsatrin-tro raho, andriañeko i tahina'oy ry IEHOVÀ, amy te ie ty soa;  
<sup>7</sup> Fa nafaha'e amako ze hene haemberañe, vaho nisambae' o masokoo o rafelahikoo.

## 55

*Ho a i Talè, Ami'ty Marotaly; Fanoroa' i Davide* <sup>1</sup> Janjiño o filolohakoo ry Andrianañahare; ko mietak' amo halalikoo.

<sup>2</sup> Haoño raho, le toiño; ie tsitoboboly am-pitoreoko, toe miñeoñeñoñe avao

<sup>3</sup> ty amy feon-drafelahikoy, ami'ty fanindria' o lo-tserekeo, ie mametsa-kasosorañe; vaho am-piloroloroñañe ty atreatré' iareo ahy.

<sup>4</sup> Miola ty an-troko ao, vaho midoiñ' amako ty fangebahebàn-kavilasy.

<sup>5</sup> Midoñ'amako ty firevendreveñañe naho ty fihondrahondràñe, vaho opoe' ty anifañe.

<sup>6</sup> Hoe raho : Ee te nanañ' elatse hoe deho!

le ho nitiliñe aña vaho nitofa;

<sup>7</sup> Eka, ho niherereake mb'eo, ho nañialo am-patrambey aña. Selà

<sup>8</sup> Ho nifiotse mb'am-pipalirako mb'eo, ty ami'ty tio-bey naho ty afo-rano.

<sup>9</sup> Votemboteo ry Talè, tseraho ty famele' iareo, fa nahatrea piaroteña naho fiolaña an-drova ao raho.

<sup>10</sup> Handro an-kaleña iereo ro mitingatinga ambone kijoly ey, añaivo'e ao ty hatsivokaraña naho fikitrohan-draty.

<sup>11</sup> Firotsahaña ty añaivo'e ao,

tsy mienga o kiririsa'eo  
ty joy naho ty fitake.

<sup>12</sup> Tsy t'ie rafelahy te mañinje ahy,  
fa ho nileoko,  
tsy t'ie mpalaiñ' ahy te itoabora'e,  
fa ho nietahako.

<sup>13</sup> Te mone ihe, rahambako,  
mpiamako naho rañeko,

<sup>14</sup> nimamy ty fifañohahòhan-tika,  
mbore nitrao-pivovotse amy màroy  
mb'añ'anjomban' Añahare mb'eo.

<sup>15</sup> Ee t'ie ho fañahieñe  
mb'am-pihomaham-beo,  
agodoño veloñe an-tsikeokeok' ao;  
amy te an-kaloloañe ao ty kiboho'e;  
añivo'e ao.

<sup>16</sup> Aa naho zaho, ho kanjiko t'Andrianañahare;  
vaho handrombak' ahy t'IEHOVÀ. <sup>17</sup> Hariva naho  
handro vaho an-tsipinde ty hitoreovako  
naho hiñeoñe; vaho ho janji'e ty feoko.

<sup>18</sup> Hijebaña'e an-kanintsiñe  
amy fifandraparapahañe amakoy.

<sup>19</sup> Hijanjiñe t'i Andrianañahare  
vaho ho toiñe'e iareo;  
I miambesatse am-piambesa'e haehaey, Selà  
toe tsy miova iareo,  
tsy mañeveñe aman' Añahare.

<sup>20</sup> F'ie mañonjo-haoke hañatreatre  
amo nifampilongo ama'eo,  
ie nifotetse amy fañina'ey,

<sup>21</sup> Nalama te amo solikeo o entam-palie'eo fe aly  
avao ty añ' arofo'e ao;

nalea ta o menakeo o saontsi'eo,  
te mone fibara napontsoañe.

<sup>22</sup> Apoho am' IEHOVÀ o kilanka'oo,  
le ho tohaña'e;  
tsy hado'e higavingaviñe o vantañeo.

<sup>23</sup> F'ihe ry Andrianañahare:  
ro hampijoroboñ' iareo  
an-kobon-dalek'ao;  
tsy hiveloma' ondaty mampiori-dio  
naho mamañahio, ty an-tsasa' o andro'eo, fa  
naho zaho, Ihe ro hiatoako.

## 56

*Ho a i Talè, Sabo' i Davide naho nitsepak' aze  
e Gate o nte Pelistio; atao ami'ty feo Deho amy  
Nonok' aroañey*

<sup>1</sup> Tretrezo raho ry Andrianañahare;  
fa lialia' ondatio;  
forekeke'e amañ'aly handro am-pohatse.

<sup>2</sup> Te handialia ahy lomoñandro  
o mivoñoñ' ahikoo;  
amy te maro ty mifandrava amako,  
ry Andindimoneñey.

<sup>3</sup> Amy andro mampangebahebak' ahy,  
Ihe ty hiatoako,

<sup>4</sup> Aman'Andrianañahare  
—handrengeako o tsara'eo—  
fa iatoako t'i Andrianañahare,  
tsy ho hemban-draho;  
inoñe ty hanoe' o nofotseo amako.

<sup>5</sup> Embere' iereo lomoñandro  
o fitoloñakoo; fikitrohan-draty avao ty ereñeren-  
tro'iareo.

6 Mifañosoñe iereo, mietake, mitinoñe ty liako;  
mandiñe hitsepake ty fiaiko.

7 Ty hatsivokara' iereo—tsy hipoliotse.  
Aretsaho an-kaviñerañe ondatio,  
ry Andrianañahare.

8 Fa vinolili'o o firererereakoo;  
apoho an-jonjò'o ao  
o ranomasokoo;  
tsy amy boke'oy hao irezay?

9 Hitolike amy zao o rafelahikoo,  
amy andro kanjiekoy,  
Zao ty rendreko,

te mpañimb' ahy t'i Andrianañahare,

10 I Andrianañahare ro andrengeako o tsara'eo,  
IEHOVÀ ro añonjonako o saontsi'eo.

11 I Andrianañahare ro fiatoako,  
tsy ho hemban-draho,  
inoñe ty hanoe' ondaty amako.

12 Havahako o nifantàkoo,  
ry Andrianañahare;  
hañenga fañandriañañe ama'o.

13 Amy te vinotso'o ty fiaiko  
tsy hikenkañe;  
Eka! o tomboko tsy hitsikapy,  
ie hijelanjelañe añatrefan'Añahare eo  
an-kazavan-kaveloñe.

## 57

*Ho a i Talè, Haja' i Davide, ie nibioñ' amy  
Saoly mb'an-dakato ao ami'ty feo : Ko Rotsahe'o.*

<sup>1</sup> Tretrezo raho ry Andrianañahare, iferenaiño,

fa Ihe ro fitsoloham-piaiko; eka! an-talinjon'  
ela'o ao ty fipalirako, ampara' te ihelaña'  
ty hankàñe.

<sup>2</sup> Kanjiekò t'i Andrianañahare Abo-tia;

Aman' Añahare fahatafeterako.

<sup>3</sup> Hahitri'e hirik'an-dikerañe ao  
ty fandrombahañe ahy,

endaha'e i mandialia ahikoy. Selà

Ho sangitrihen' Añahare ty fiferenaiña'e naho ty  
hatò'e.

<sup>4</sup> An-teñateñan-diona ao ty fiaiko;

itraofako handre o mpikofòke afoo;

toe o ana' ondatio,

lefoñe naho ana-pale o famotsi'eo,

fibara masioñe ty famele'iareo.

<sup>5</sup> Onjoneñe ambone' i likerañey rehe,

ry Andrianañahare,

ambone' ty tane toy iaby ty enge'o.

<sup>6</sup> Nikotepe' iareo harato o liakoo;

mibokobokoke ty fiaiko;

nihalia' iereo koboñe ty aoloko eo,

f'ie nigodoñe am-po'e ao. Selà

<sup>7</sup> Mijadoñe ty troko ry Andrianañahare,

eka, gañe ty troko;

hisabo raho, eka hisabo fandrengeañe.

<sup>8</sup> Mivañona, ry engeko!

Mitroara ry kararàke naho marovany,

hampitsekafako ty fanjirik'andro!

<sup>9</sup> Hañandriañe Azo raho ry Talè

añivo' ondatio eo,

ho rengeko an-tsabo

amo kilakila'ndatio ao.

<sup>10</sup> Amy te ra'elahy pak' an-dindiñe aña

ty fiferenaiña'o;  
 le pak'an-drahoñe eñe ty hatò'o.  
 11 Onjoneñe ambonen-dikerañ'eñe rehe  
 ry Andrianañahare,  
 ty enge'o ambone' ty tane bey toy.

## 58

*Ho a i Talè, Sabo' i Davide ami'ty feo : Ko  
 Rotsahe'o* <sup>1</sup> Toe mitaron-kavantañañe  
 hao t'ie mitsiñe?  
 mizaka an-kahiti'e hao, ry ana' ondatio?  
<sup>2</sup> Hete, te mone hatsivokarañe  
 ty itoloña'areo an-troke ao;  
 lanjae' areo amy taney  
 o fitavanam-pità'areoo.  
<sup>3</sup> Amoean-kovin-drene'e ty lo-tsereke,  
 mañariok' aña vata'e miboloaña  
 ty mpivolam-bande.  
<sup>4</sup> Hoe vorem-pandrefe'ala ty vore' iareo,  
 manahake o meren-kareñeñe  
 manentsen-tsofiñeo,  
<sup>5</sup> tsy hahatsanoña'e ty fikoràn'ambiasa  
 ndra ty pandrombo-jiny bey.  
<sup>6</sup> Ry Andrianañahare,  
 rofoto am-bava'e ao o nife'eo,  
 atrankaño ty famotsi' o liona tora'eo,  
 ry IEHOVÀ  
<sup>7</sup> Angao hisaok' aña iereo hoe rano vohitse;  
 Lonik'abey te ho zoeñe  
 domoke o ama-paleo  
 t'ie mañohatse o fale'eo.  
<sup>8</sup> Lonike t'ie hanahake ty harevo'

o sifotse mihamodo te misitseo, hoe ajaja mi-  
boloañe tsy mahatrea i àndroy.

<sup>9</sup> Aolo te hahamae valañe o afom-patikeo,  
le fonga ho faohe'e an-talio  
ty leñe naho ty mibebañe,

<sup>10</sup> Hirebeke o vañoño  
te mahaisake i famaleañey,  
ho sasà'e an-dio' o tsivokatseo o fandia'eo

<sup>11</sup> Vaho hanao ty hoe ondatio:  
Toe tsy ho po-tambe o vantaño;  
toe eo t'i Andrianañahare  
mizaka an-tane atoy.

## 59

*Ho a i Talè, ami'ty Altasete, Sabo' i Davide,  
ie nampandroñe' i Saole ty anjomba'e hañe-doza  
ama'e.* <sup>1</sup> Hahao an-drafelahiko raho  
ry Andrianañahare :

ampitroaro an-kaboañe  
ty amo miatreatre ahikoo.

<sup>2</sup> Avotsoro amo mitolon-katsivokaraño,  
vaho rombaho am'ondaty  
mampiori-dioo.

<sup>3</sup> Hehe t'ie mamandroñe ty fiaiko,  
robohe' o mpitrotrofiak' amako,  
tsy ty amo fiolàkoo ndra o tahikoo, ry IEHOVÀ.

<sup>4</sup> Tsy o fandilarakoo ty falisa' iareo  
hiatreatre ahy;  
mivañona hañolora'o vaho mivazohoa.

<sup>5</sup> Ihe arè ry IEHOVÀ,  
Andrianañahare' i màroy,  
Andrianañahare Israele,  
mivañona, handilova'o o fifeheaño;



ko trettezeñe o mpiola lo-tserekeo. Selà

<sup>6</sup> Mibalike haleñe iereo,  
mañaolo hoe amboa  
vaho mikariokariok' amy rovay.

<sup>7</sup> Hehe t'ie mamore am-bava,  
fibara ty an-tsoñi'e, manao ty hoe:  
Ia ty mahajanjiñe.

<sup>8</sup> F'ihe, ry IEHOVÀ, ro hiankahak' am'iareo, hene  
sirikae'o o fifeheañeo.

<sup>9</sup> O ry Haozarako, fitamakoo;  
kijoli-aboko t'i Andrianañahare.

<sup>10</sup> Hiaolo ahy t'i Andrianañaharem-piferenaiñ'  
ahiko,

hampisamban' Añahare o rafelahikoo.

<sup>11</sup> Ko vonoe'o hey iereo,  
tsy mone haliño ondatikoo;  
ampirererereo ami'ty haozara'o,  
vaho afotsaho, ry Talè, fikala'ay.

<sup>12</sup> ty amo hakeom-palie' iareoo,  
o saontsim-pivimbi'eo, ee t'ie ho tsepahene am-  
pirengevoha'e, naho amo fatse vaho fan-  
dañitse aaka' iareoo.

<sup>13</sup> Mongoro an-kaviñerañe,  
zamano ho modo,  
hampandrendrehañe te mifehe  
am' Iakobe ao t'i Andrianañahare,  
sikala añ'olo' ty tane toy añe, Selà

<sup>14</sup> Mimpoly haleñe iereo,  
mañaolo hoe amboa,

vaho mbeo-mbeo an-drova atoy,

<sup>15</sup> Mihelahela avao, mipay haneñe,  
vaho mitromoroñe naho tsy vontsy.

<sup>16</sup> Aa naho zaho, ho saboeko ty haozara'o; Eka,  
 hipoñafako te maraiñe  
 ty amy fiferenaiña'oy;  
 amy te Ihe ro tambohoko,  
 fitsolohako añ'andron-kaloviloviako.

<sup>17</sup> Ry Haozarako,  
 hisaboako am-pandrengañe:  
 amy te mpikalañ' ahy t'i Andrianañahare,  
 i Andrianañaharem-piferenaiñ' ahiy.

## 60

*Ho a i Talè, Onin-tsabo' i Davide ty hotakotake  
 nanoe'e amy Arame Naharaimè naho i Arame  
 Tsobay; naho ty nibaliha' Ioabe, ie ginio'e t'i nte-  
 Edome rai-ale tsy roe-arivo lahy amy Vavatanen-  
 tsiray.* <sup>1</sup> Ry Andrianañahare nifarie'o, dinemo'o,  
 nifombo'a'o; ehe sotraho zahay.

<sup>2</sup> Nampiezeñezeñe'o ty tane;  
 nabenta'o; melaño o jeba'eo, fa miozoñozoñe.

<sup>3</sup> Nampahaoniña'o fisotriañe ondati'oo; nampi-  
 tohofa'o divay mampivembèñe.

<sup>4</sup> Nanolora'o viloñe  
 o mañeveñe ama'oo;  
 honjoneñe ty ami'ty hatò. Selà

<sup>5</sup> Soa te ho hahañe o kokoa'oo;  
 rombaho am-pità'o havana; toiño raho.

<sup>6</sup> Nitsara ami'ty hamasiña'e  
 t'i Andrianañahare:  
 Hitreñe raho, ho zaraeko ty Sekeme,  
 vaho ho zeheko ty vavatane' i Sokote;

<sup>7</sup> ahiko t'i Gilàde, naho ahiko t'i Menasè; fiaron-  
 dohako t'i Efraime,

kobaiko t'Iehodà\*;

<sup>8</sup> Koveta fisasako t'i Mòabe;  
fampipohan-kanako t'i Edome  
miroharohà ty amako, ry Pilisty.

<sup>9</sup> Ia ty hampihova ahy  
amy rova fatratsey?  
Ia ty hiaolo ahy mb' Edome mb'eo?

<sup>10</sup> Tsy Ihe hao ry Andrianañahare  
ty nahafary anay?

Tsy hitraofa'o fionjonañe hao,  
ry Andrianañahare o lahindefo'aio !

<sup>11</sup> Oloro amy rafelahiy zahay,  
fa tsy vente'e ty fandrombaha' ondatio.

<sup>12</sup> I Andrianañahare ro fahareketa'ay,  
Ie ty handialia o rafelahi'aio.

## 61

*Ho a i Talè, Sabo' i Davide, arahe' ty marotaly*

<sup>1</sup> Janjiño ty koiko, ry Andrianañahare;  
haoño o halalikoo.

<sup>2</sup> Boak' añ'olon-tane añe ty ikoihako Azo, naho  
opo ty troko;

iaolò mb'an-damilamy abo te amako.

<sup>3</sup> Amy te Ihe ro fipalirako,  
haboañe fatratse aolon-drafelahiko eo.

<sup>4</sup> Hitoboake an-kivofo'o ao nainai'e raho;  
hipalirako añ'alo' o ela'oo. Selà

<sup>5</sup> Fa jinanji'o o nifantàkoo  
ry Andrianañahare;  
tinolo'o ty lova' o mpañeveñe  
amy tahina'oio.

<sup>6</sup> Tompeo andro ty andro' i mpanjakay,

---

\* **60:7** Fot 49:10

ho tarirats' an-tariratse o tao'eo.

<sup>7</sup> Hiambesatse añatrefan' Añahare  
eo nainai'e;

afantoho hañambeñe aze  
ty fiferenaiñañe naho ty hatò.

<sup>8</sup> Le ho bangoeko an-tsabo nainai'e ty tahina'o,  
ie henefeko boak' andro o nifantàkoo.

## 62

*Ho a i Talè, amy Iedotone, Sabo' i Davide* <sup>1</sup> I

Andrianañahare avao ty fitamà'  
ty fiaiko am-pitsiñañe,  
boak' ama'e ty fandrombahañe ahy.

<sup>2</sup> Ie avao ro lamilamiko  
naho ty fandrombahañe ahy;  
i haboam-pipalirakoy;  
tsy hasiotsiotse raho.

<sup>3</sup> Pak'ombia ty ho boroboñafe' areo t'indaty?

Hanjevoa'areo iaby  
hoe t'ie rindriñe mitondritse,  
ndra kijoly migavengaveñe.

<sup>4</sup> Ty hamotsahañe aze ami'ty  
haabo'e avao ro fikililia' iareo :  
mpitea volam-bande; mitata am-palie,  
f'ie mamatse añ'ova ao Selà

<sup>5</sup> I Andrianañahare avao ty liñisa'o  
ampitsiñañe, ty fiaiko toy;  
boak' ama'e ty fisalalàko.

<sup>6</sup> Ie avao ro lamilamiko  
naho fandrombahañe ahy;  
ty kijoliko abo; tsy hasiotse raho.

<sup>7</sup> I Andrianañahare ty ampipohañe  
ty fandrombahañe ahy,  
naho ty engeko;

ty lamilamin-kaozarako;  
fipalirako t'i Andrianañahare.

<sup>8</sup> Miatoa ama'e nainai'e, ondatio,  
adoaño añatrefa'e ty arofo' areo;  
fitsolohan-tika t'i Andrianañahare. Selà

<sup>9</sup> Toe hakoahañe avao o ana' i Dameo,  
lañitse o ana' ondatio;  
ie atraok' am-pilanjàñe eo,  
le maivañe te ami'ty kofòke.

<sup>10</sup> Ko iatoa'o ty fikatramoañe,  
naho ko manao fañirian-kafoake  
am-pikamerañe.

Ndra te mionjoñe o varao  
ko ampirampian' arofo.

<sup>11</sup> Nitsara indraike t'i Andrianañahare,  
tsinanoko indroe ty hoe:

An'Andrianañahare o haozarañeo,

<sup>12</sup> vaho ama'o, ry Talè, ty fiferenaiñañe,  
songa tambeze'o mañeva o fitoloña'eo t'i ondaty.

## 63

*Sabo' i Davide, ie tam-patram-bei' Iehoda* <sup>1</sup> Ry

Andrianañahare,  
Ihe ro Andrianañahareko;  
hitsoek' azo raho;  
miheahea azo ty fiaiko,  
misalala azo ty sandriko  
hoe an-tane kànkañe vozake  
tsy aman-drano,

<sup>2</sup> Ho treako amy miavakey ao rehe,  
hahaisake ty haozara'o naho ty enge'o.

<sup>3</sup> Toe soa te amo haveloñeo  
ty fiferenaiña'o,  
hisabo Azo o soñikoo.

<sup>4</sup> Hañandriañe Azo t'ie mbe veloñe;  
i tahina'oy ty hañonjonako tañañe.

<sup>5</sup> Anjañe ty fiaiko hoe aman-tso-kena naho solike,  
vaho mandrenge Azo  
an-tsoñy mifale ty vavako,

<sup>6</sup> ie mahatiahy Azo am-pandreañe ao,  
naho mitsakore Azo am-pijilovan-kaleñe.

<sup>7</sup> Ihe ro mpañolotse ahiko,  
naho an-kalon'ela'o ao ty hirebehako.

<sup>8</sup> Mipitek' ama'o ty fiaiko;  
manohañe ahy ty fità'o havana.

<sup>9</sup> Fe hajoroboñe an-tsikeokeok'ao  
ze mipay handrotsake ty fiaiko;

<sup>10</sup> Havariñe an-kaozara' i fibaray iereo  
ho tsindrohe' ty farasy.

<sup>11</sup> Andriañahare ty irebeha' i Mpanjakay,  
mirañorañoa ze hene mifanta ama'e;  
fe hampidiñeñe ty faliem-pandañitse.

## 64

*Ho a i Talè, Sabo' i Davide* <sup>1</sup> Janjiño ty feoko,  
ry Andrianañahare,

ami'ty fitreontreñoako;  
ambeno ty fiaiko

ami'ty fihembaña'e o rafelahio.

<sup>2</sup> Aetaho raho ami'ty fikililia'  
o tsivokatseo;

amo fikitrohan-drati' o lo-tserekeo.

<sup>3</sup> O maniom-pameleke hoe fibara  
vaho mañohatse entam-bola-mafaitse  
hoe t'ie ana-pale,

<sup>4</sup> hañohara' iereo añ'etake ty vañoñe;  
tifire'iereo amy zao tsy aman-tahotse.

<sup>5</sup> Mifañosike t'ie mikitroke, mikinia hampibitrotse fandri-bo añ'etake, ami'ty hoe: Ia ty hahaisake?

<sup>6</sup> Tsikarahe' iereo ze tsihavokarañe, Fa nañeneke safiry soa lahatse. Toe miheotse ty añ'ova' ondaty ao, naho ty arofo'e.

<sup>7</sup> F'ie hañiririan' Añahare ana-pale aniany avao le ho fere

<sup>8</sup> hampitsikapy iereo; sesehe' o famele'iareo avao, songa mibioñe añe ty mahaisake iereo.

<sup>9</sup> Le hene hirevendreveñe ondatio, hitalily o fitoloñan' Añahareo vaho hañarahara o tolon-draha'eo.

<sup>10</sup> Hifale am' IEHOVA o vantañeo, hipalitse ama'e; vaho hene handrenge aze o mahity añ'arofoo.

## 65

*Ho a i Talè; Takasy, Sabo' i Davide.* <sup>1</sup> Mitamà azo e Tsiône ao ty sabo, ry Andrianañahare: vaho ama'o ty ifantàne.

<sup>2</sup> O ry Mpijanjin-kalaly, mitontoñe ama'o ze kila sandriñe.

<sup>3</sup> Maozatse te amako o sata tsi-vokatseo, fe o fandilara'aio, le takona'o.

<sup>4</sup> Haha t'indaty joboñe'o vaho ampitotohe'o himoneñe an-kiririsa'o ao: ho heneke ty hasoa añ'akiba'o ao zahay,

an-kivoho' o miavake ao.

<sup>5</sup> Fitoloñañe mampañeveñe  
ro anoiña' o anay an-kavantañañe,  
ry Andrianañaharem-  
pandrombahañe anay,  
Ihe ro fatokisa' ze olon-tane iaby,  
nah o an-driake tsietoitaneo.

<sup>6</sup> Ie ami'ty haozara' o ro nampijadoñe  
o vohitse misadia hafatrarañe;

<sup>7</sup> Ihe ro mampitsiñe ty fitroña' o riakeo, ty  
figodobo' o kinerakeo,  
vaho ty fivoamboaña' o borizañe.

<sup>8</sup> Mampañeveñe o mpimoneñe añ'olon-taneo o  
vilo'oo; vaho ampirebehe' o  
ty fionjona' o maraiñe o naho o haleñe.

<sup>9</sup> Tilihe' o ty tane toy  
nah o tondraha' o rano:  
vaho fanjàka ty nampamokara' o aze  
amy sakan' Añahare miheneheney;  
nañalankaña' o \*ampemba,  
zay ty fañajaria' o i taney.

<sup>10</sup> Anoe' o lonte soa o hato'eo, amata' o o vava-  
hali'eo;  
lotrahe' o ami'ty ereke,  
tahie' o ty fitovoa'e.

<sup>11</sup> Sabakae' o ami'ty havokara' o ty taoñe,  
ampitsopatsopahen-tsolike o oloñolo'oo;

<sup>12</sup> Mitsiritsioke o fiandrazañe  
am-patrambeio;  
vaho misikim-pirebehañe o vohitseo.

<sup>13</sup> Misaroñe biby fiandrazeñe o hivokeo,  
miravak' ampemba o vavataneo;

---

\* **65:9** Ndra ze atao vare, tsako, bajiry n. t. i.



mitreñe an-kaehake le misabo.

## 66

*Ho a i Talè, Sabo an-Titike, Takasy* <sup>1</sup> Mipoñafa  
rebek' aman'

Andrianañahare, ry hene tane toy !

<sup>2</sup> Isabò ty volonahe' i Tahina'ey,  
toloro engeñe mitoabotse.

<sup>3</sup> Anò ty hoe aman' Añahare : Ra'elahy o tolon-  
draha'oo !

Ami'ty hajabahinan-kaozara'o ty hitsolofiña' o  
rafelahi'oo aolo'o eo.

<sup>4</sup> Hene hitalaho ama'o ty tane toy,  
naho hisabo fandrengeañe ama'o;  
ho bangoe' iereo ty tahina'o. Selà

<sup>5</sup> Antao hañisake o fitoloñan'Añahareo:  
mampañeveñe o ana'ondatio o sata'eo.

<sup>6</sup> Nabali'e ho tane kànkañe i riakey,  
nitsaham-pandia' iereo i oñey;  
añe ty nirebehan-tika.

<sup>7</sup> Manjaka an-kaozara'e nainai'e re,  
jilovem-pihaino'e o fifeheañeo,  
we te tsy hiroharoha' o mpiolao. Selà

<sup>8</sup> Andriaño t'i Andrianañaharen-tika  
ry ondatio,  
ipoñafo feom-pandrengeañe;

<sup>9</sup> Ie mitañe an-tika veloñe, naho  
tsy apo'e hasitse o fandian-tikañeo.

<sup>10</sup> Fa namente anay rehe,  
ry Andrianañahare, fa natrana'o hoe  
fitranaham-bolafoty.

<sup>11</sup> Nasese'o an-karato ao, vaho nampibabe'o  
faloviloviañe

o hato'ao.

<sup>12</sup> Nampiningire'o ambone' ty  
añambone'ay t'indaty,  
zahay nisibek' afo naho rano,  
fe naaka'o ho an-kavokarañe.

<sup>13</sup> Himoak' añ'anjomba'o ao raho  
hinday engan-koroañe;  
hañenefako o nifantàkoo,

<sup>14</sup> ze vinolan-tsoñiko vaho rineham-bavako t'ie  
niankoheke.

<sup>15</sup> Hengaeko kobatroke horañe, an-katòen'  
añondri-lahy,

hisoroñe bania naho oselahy. Selà

<sup>16</sup> Mb'etoa hijanjiñe ry mpañeveñe  
aman' Añahare iabio,  
le ho talilieko o nanoe'e an-kavelokoo.

<sup>17</sup> Nitoreo am-bavako,  
le nampionjoneko an-delako.

<sup>18</sup> Ie mahatrea hakeo an-troko ato,  
le tsy hijanjiña' i Talè.

<sup>19</sup> Fa toe mijanjiñe ahy  
t'i Andrianañahare  
haoñe'e i feon-kalalikoy.

<sup>20</sup> Andriañeñe t'i Andrianañahare,  
amy te tsy ambohoa'e i filolofakoy,  
vaho tsy afaha'e amako  
ty fiferenaiña'e.

## 67

*Ho a i Talè, amo marovanio; onin-tSabo,  
Takasy* <sup>1</sup> Toe hasoan' Añahare tika naho tahie'e,  
kinokinohe'e amantika i lahara'ey, Selà

<sup>2</sup> Ho fohineñe an-tane atoy o lala'oo,  
amo kilakila 'ndatio ty fandrombaha'o.

<sup>3</sup> Ho renge' ondatio rehe  
ry Andrianañahare;  
hene handrenge Azo ondatio.

<sup>4</sup> Hifalea' o fifeheaño  
naho hisaboe'iereo an-kaehake;  
fa ho zakae'o ami'ty hiti'e ondatio,  
vaho hiaoloa'o o fifeheañe  
an-tane atoio. Selà

<sup>5</sup> Ho renge' ondatio rehe  
ry Andrianañahare;  
fonga handrenge Azo ondatio.

<sup>6</sup> Fa nahatoly sabo ty tane, nitahy antika t'i  
Andrianañahare,  
i Andrianañaharen-tikañey.

<sup>7</sup> Tahien' Añahare tikañe; soa te hañeveñe  
ama'e ze hene olon-tane.

## 68

*Ho a i Talè, Sabo' i Davide. Onin-tsabo*

<sup>1</sup> Hiongake t'i Andrianañahare,  
le hiparaitake o rafelahi'eo;  
vaho hibioñe aolo'e eo o malaiñe Azeo.

<sup>2</sup> Hambañe ami'ty fampisaohañe  
hatoeñe, isaoho aña ka;  
manahake ty fitranaha' o karafo tantele aolo'  
afoo,  
ty hikoromaha' o tsivokatseo  
añatrefan'Añahare.

<sup>3</sup> Ho ehake o vañoño,  
hirebeke añ'atrefan'Añahare eo,  
hiriñariña an-kobaiña.

<sup>4</sup> Misaboa aman' Añahare,  
bangò i tahina'ey;  
onjono i Mpiningitse miranga  
i montombeiy, IA ty tahina'e;

vaho mitreña à añatrefa'e eo.

<sup>5</sup> Raem-bode-rae naho mpañomey to  
amo vantotseo t'i Andrianañahare  
an-kivoho'e miavake ao.

<sup>6</sup> Ampimoneñan' Añahare  
añ'akiba ao ty jorý;  
akare'e mb'an-kavokarañe o rinohio;  
fe mitobok' an-tane kirikintañe ao  
o mpitrabikeo.

<sup>7</sup> O Andrianañahare, ie niaoloa'o ondati'oo, ie  
nihofiha'o firanga  
i fatram-beiy, Selà

<sup>8</sup> niezeñezeñe i taney, nihotrake i likerañey aolo'  
i Andrianamboitse,  
Nihondrahondra ty Sinay añatrefa' i Abo Tia,  
Andrianañahare' Israele eo.

<sup>9</sup> Nanondraha'o oran-joba,  
ry Andrianañahare;  
niventè'o i lova'o navozoy,

<sup>10</sup> Nitobok' ao i mpirai-lia'oy,  
nifahana'o ami'ty havokara'o  
o rarakeo, ry Andrianamboitse.

<sup>11</sup> Nitaroñe t'i Talè;  
mitozantoza o rakemba mitalily  
i entañeio.

<sup>12</sup> Nitriban-day mb'eo o mpanjakan-  
dahindefoñeo! Nivoratsake;  
le ho zarae' i tambatse an-kiboho'e ao o  
kinopakeo,

<sup>13</sup> ie mandre am-bàlan'añondry ao, le manahake  
ty elan-deho misarom-bola-foty;  
mimilemiletse volamena o volo'eo.

<sup>14</sup> Ie nampivarakai' i El-Sadai  
i mpanjaka rey,

le niavy an-Tsalmone ty oram-panala.

<sup>15</sup> Vohin' Añahare ty vohy Basane;  
vohitse lako-lengo'e ty haboa' i Basane;

<sup>16</sup> Inoñe ty ikiraña' areo  
ry haboañe maro-lengo'eo,  
i vohitse nirien' Añahare himoneña'ey?  
Eka himoneña ao nainai'e t'IEHOVÀ.

<sup>17</sup> Añ'ale'ale o sareten' Añahareo,  
arivo-añ'arivo'e;  
ama'e ao an-kamasiña'e t'i Talè  
manahake e Sinay aña.

<sup>18</sup> Nionjoñe añ'abo eña rehe,  
nikozozote'o an-drohy  
o fandrohizaño,  
nandrambe ravoravo am'ondatio,  
vaho amo mpiolao,  
himoneña' IÀ, Andrianañahare.

<sup>19</sup> Andriañañe t'i Talè mpivave o kilankan-  
tikaño boak'andro,  
i Andrianañaharem-  
pandrombahantikañey. Selà

<sup>20</sup> Andrianañaharem-pañaha an-tika  
t'i Andrianamboitse;  
Toe a IEHOVÀ Talè  
ty famotsoraña an-kavilasy.

<sup>21</sup> Le hanorotoro ty loha' o rafelahi'eo  
t'i Andrianañahare,  
ty kovo-doha minankanankaña  
amo hakeo'eo.

<sup>22</sup> Hoe t'i Talè:  
Hampoliko o e Basaneo,  
hahereko boak' an-keraheran-driak' ao,

<sup>23</sup> Ho demohem-pandia'o an-dio  
o rafelahi'oo,  
hanañ'anjara an-dion-drafilahy ka

o lelan' amboa'oo.

<sup>24</sup> Fa niisa' iareo o fañaveloa'oo  
ry Andrianañahare,  
ty fionjonan' Añahareko, toe  
i Mpanjakakoy, mb'amy miavakey ao.

<sup>25</sup> Miaolo o mpisaboo,  
manonjohy o mpititikeo;  
añivo'e ao o somondrara  
mampikantsankantsañe o kantsañeo :

<sup>26</sup> Andriaño am-pivory ao  
t'i Andrianañahare,  
i IEHOVÀ boak'am-pigoangoaña' Israele.

<sup>27</sup> Ingo t'i Beniamine tsitso'e,  
miaolo iareo,  
o roandria' Iehodào am-pirimboña'eo, o roan-  
dria' i Zeboloneo,  
o roandria' i Naftalio.

<sup>28</sup> Fa linilin' Añahare'o ty haozara'o;  
mihaozara! Ry Andrianañahare,  
nañenefa'o ho anay zay,

<sup>29</sup> ty kiboho'o e Ierosalaime aña,  
ty ibanabanà' o mpanjakao ama'oy.

<sup>30</sup> Endaho o biby hako am-bindao,  
o añombelahy maroo  
rekets' o dronga' ondatioo,  
songa mandialia tseram-bolafoty; navarakai'e  
ondaty tea alio.

<sup>31</sup> Hiavotse e Mitsraime ao o sorotà'eo,  
halisa hañity fitàñe aman'Añahare  
t'i Kose\*.

<sup>32</sup> Misaboa aman'Andrianañahare,  
ry fifehea' ty tane toio;

---

\* **68:31** Kose: Etiopia; Tane atimo' i Mitsraime

rengeo an-tsabo t'i Talè; Selà

<sup>33</sup> I miningitse andindi'

o likerañe haehaéo,

Inay, ampionjone'e i fiarañanaña'ey,

i fiarañanañañe ra'elahiy.

<sup>34</sup> Iantofó te an'Andrianañahare

ty haozarañe

ambone' Israele eo ty ahe'e

an-dikerañe ao ty hafatrara'e.

<sup>35</sup> Mampañeven-drehe,

ry Andrianañahare, an-toe'o miavake ao;

I Andrianañahare' Israele,

ro mpanolotse haozarañe

naho hafatrarañe am'ondati'eo.

Andriañeñe t'i Andrianañahare !

## 69

*Ho a i Talè, Sabo' i Davide ami'ty feo : O Talifokeo.*

<sup>1</sup> Rombaho raho ry Andrianañahare

fa nizilike añ'ovako ao ty rano.

<sup>2</sup> Milempotse an-ditsake lalek' ao raho,

tsy ao ty ho liàñe;

fa nijolofone an-drano lalek' ao

naho mandipotse ahy o alon-driakeo.

<sup>3</sup> Mahamokotse ahy ty fitañoiko,

maike ty am-peoko ao;

milesa o masokoo amy fisalalako

an'Andrianañaharekoy.

<sup>4</sup> Mandikoatse o volon-dohakoo

ty malaiñe ahy tsy am-bente'e;

maro ty te handrotsak' ahiko,

ie rafelahiko tsy an-dengo'e;

havahako hao ty tsy nikamereko?

<sup>5</sup> O Andrianañahare, arofoana' o  
ty hadagolako,  
vaho tsy mietak' ama' o o tahikoo.

<sup>6</sup> Tsy zaho abey ty hisalara'  
o misalala Azoo,  
ry IEHOVÀ, Talè' i Màroy;  
ee te tsy zaho ty himeñara'  
o mipay Azoo,  
ry Andrianañahare' Israeleo.

<sup>7</sup> Amy te Ihe ro nahatantezako rabioñe;  
manaroñe ty tareheko ty hasalarañe.

<sup>8</sup> Fa ambahiny aman-drolongoko  
raho naho alik' amo anan-drenekoo.

<sup>9</sup> Amy te namotsek' ahiko  
ty fahimbañako amy anjomba'oy;  
le nidoñe amako ty inje'  
o mañinje Azoo.

<sup>10</sup> Zaho nitañy añ'ovako ao  
naho nililitse, ninjare tiñe amako.

<sup>11</sup> Ie nanoeko lamba-gony ty sikiko, le  
nirabioñeñe.

<sup>12</sup> Mivolambolañe ahy o miambesatse an-  
dalambeio;  
vaho ibekoa' o jikeo.

<sup>13</sup> Fa naho zaho, Ihe ty ihalaliako,  
ry IEHOVÀ, ami'ty andro mete,  
ry Andrianañahare ami'ty habeim-  
piferenaiña'o, toiño raho  
ami'ty hatòm-pandrombaha'o.

<sup>14</sup> Ihahao amo litsakeo,  
le ko apo'o hijoroboñe,  
avotsoro amo malaiñe ahio,



vaho amo rano lalekeo.

<sup>15</sup> Ee t'ie tsy hopoe' o fisorotombahaño, ndra hagodra' i tsikeokeokey; ndra hitsiteha' ty vava' i koboñey.

<sup>16</sup> Toiño raho ry IEHOVÀ, ami'ty hasoan-kafatraram-pikokoa'o; mitoliha amako ami'ty harà'elahim-piferenaiña'o.

<sup>17</sup> Ko aetak' ami'ty mpitoro'o ty lahara'o, fa ampoheke, masikà te manoiñe.

<sup>18</sup> Harineo ty fiaiko, vaho jebaño; vilio amo rafelahikoo.

<sup>19</sup> Arofoana'o ty tiñeko, ty hameñarako, naho ty hasalarako;

añatrefa'o eo ze hene rafelahiko.

<sup>20</sup> Fa nahakoretse ty troko o rabioño, lifon-kasiloke raho; nipay tretre, fa tsy nitendreke; naho mpañohò, fa tsy nahatrea.

<sup>21</sup> Hete! finaha' iareo voreke raho vaho finantso' iareo vinegra amy haran-dranoakoy.

<sup>22</sup> Ho fàndrike ty fandambañañe añ'atrefa' iareo; ie mierañañañe te mikoropoke.

<sup>23</sup> Haieñe o fihaino' iareoo, tsy hahaisake, vaho ampiozoñozoño nainai'e o toha'eo.

<sup>24</sup> Adobaño am' iereo ty haviñera'o, le ampitsepaho ami'ty fifombo'o miforoforo.

<sup>25</sup> Hangoakoake ty tobe' iareo; tsy himoneña' ondaty o kiboho'eo.

<sup>26</sup> Amy te sarerahe'e i linafa'oy,

vaho nindrae' iereo ty fanaintaiña'  
o vinonotrobo'oo.

27 Tompeo tahiñe ty hakeo' iereo,  
le ko apo'o hifoak' an-kavantaña'o ao.

28 Faoho amy boken-kaveloñey iereo,  
tsy hitrao-pisokitse amo vañoño.

29 Misotry naho marare raho;  
ampañonjono ahy añ'abo ey  
ty fandrombaha'o, ry Andrianañahare.

30 Ho bangoeko an-tsabo  
ty tahinan' Andrianañahare,  
naho honjoneko am-pañandriañañe.

31 Ie ho no' IEHOVÀ mandikoatse ty vosy valo-ay  
reke-tsifa naho hotro.

32 Ho oni' o mpirèkeo le ho ehake;  
ry mpipay an' Andrianañahare,  
misotrafa añ'arofa.

33 Fa mahajanjiñe o rarakeo t'IEHOVÀ,  
vaho tsy sirikae'e o an-droho.

34 Misaboa Aze ry likerañeo naho  
ty tane toy,  
ry riakeo naho ze hene misorok' ao.

35 Fa ho rombahen'Añahare ty Tsiône,  
naho hamboare'e o rova' Iehodào  
vaho himoneñe ao iereo ho hanañañe.

36 Ho lovae' ty tiri' o mpitoro'eo,  
himoneña' o mikoko i tahina'eio\*.

## 70

*Ho a i Talè, Sabo' i Davide Faniahiañe* <sup>1</sup> Hahao  
raho ry Andrianañahare,  
Malisà hañolots' ahy ry IEHOVÀ.

\* **69:36** Sab 5:11, 119:132, Ies 56:6

<sup>2</sup> Ehe ampimeñaro naho verevereo o mipay ty  
fiaiko;  
hampibalihe'e mb'eo, vaho ho salareñe o fale-  
fale amy faràrekoio.

<sup>3</sup> Hampipoliañe an-kameñarañe  
ze manao ty hoe: Hý! Hý!

<sup>4</sup> Ampirebehañe ze hene mipay Azo,  
hifale ty ama'o;

le hitolom-panao ty hoe  
o mpitea ty fandrombaha'oo:  
Onjono t'i Andrianañahare.

<sup>5</sup> Fe poie'e naho rarake raho;  
Malisà mb'amako ry Andrianañahare;  
Ihe ro mpañolotse naho mpañaha ahy; taen-  
taeno ry IEHOVÀ.

## 71

<sup>1</sup> Ihe ry IEHOVÀ, ro itsolohako;  
ko apo'o ho salareñe,

<sup>2</sup> Votsoro ami'ty havantaña'o,  
naho hahao;

atokilaño amako ty ravembia'o  
vaho rombaho.

<sup>3</sup> Ehe t'ie ho vato fimoneñako,  
ho fimpoliako;

fa nafanto'o ty handrombahañe ahiko;  
Ihe ro lamilamiko naho rova fiàroko.

<sup>4</sup> Avotsoro an-tañan-do-tsereke raho,  
ry Andrianañahareko  
ami'ty fivontitira' ty mpandilatse  
naho i mpampisoañey.

<sup>5</sup> Fa Ihe ro fitamàko, ry IEHOVÀ TALE; ty natokisako boak'ami'te nahajalahy.

<sup>6</sup> Ihe ty nirampiaiko  
boak'an-kovin-dreneko ao;  
Ihe ty nañakatse ahy an-tron-dreneko;  
Rengeko nainai'e rehe.

<sup>7</sup> Filatsà' i màroy raho,  
f'Ihe ro fipalirako maozatse.

<sup>8</sup> Pea' ty fibangoañe naho ty fiasiañ'Azo  
lomoñandro ty vavako,

<sup>9</sup> Ko aitoa'o raho naho fa bey;  
ko mamorintseñe ahy naho  
milesa ty haozarako.

<sup>10</sup> Fa nikinia' o rafelahikoo;  
vaho mitrao-pikilily ahy  
o mivoñoñe ty fiaikoo,

<sup>11</sup> ami'ty hoe:  
naforintsen' Añahare,  
horidaño arè vaho tsepaho amy t'ie  
po-pañolotse.

<sup>12</sup> Ry Andrianañahare, ko ihànkaña'o,  
ry Andrianañahareko,  
malisà hañolots' ahy.

<sup>13</sup> Ho salareñe naho mongoreñe  
o manisý ty fiaikoo;  
le hoboñañ' inje naho hameñarañe  
o mipay hijoy ahikoo.

<sup>14</sup> Fa naho zaho, hitama nainai'e  
vaho honjoneko avao  
ty fandrengeako Azo.

<sup>15</sup> Ho talilie' ty vavako o havantaña'oo,  
naho o fandrombaha'o lomoñandoo,  
fe nofiko ty hamaro'e.

<sup>16</sup> Hindeseke o tolon-draha'o ra'elahio,  
ry IEHOVÀ TALÈ;

ho taroñeko ty havantaña'ò, ty Azo avao.

<sup>17</sup> Ry Andrianañahare, fa nanare'ò ahy boak'  
ami'ty nahajalahy ahy;

pake henaneo,

taroñeko avao o raha fanjaka fanoe'oo.

<sup>18</sup> Aa ndra t'ie bey naho fotivolo,

ry Andrianañahare, ko farie'ò

ampara' te ataliliko añ'afeafe

ty haozara'ò;

ty hafatrara'ò amy ze hene ho avy.

<sup>19</sup> Pak' andindiñe añe ty havantaña'ò,

ry Andrianañahare.

Ihe namonitse o raha ra'elahio:

ry Andrianañahare,

ia ty mañirinkiriñe ama'ò?

<sup>20</sup> Ihe nampahatrea ahiko

haemberañe maro naho hasotriañe;

ro hameloñ'ahy,

hañakatse naho hampipoly ahy

hirik' an-kerakeran-tane ao.

<sup>21</sup> Ehe, onjono ty engeko,

vaho mitoliha hañohò ahy.

<sup>22</sup> Ho reneko ami'ty mandalina ka,

ty ami'ty hatò'ò, ry Andrianañahareko;

ho saboeko ami'ty marovany,

ry Masi-Toka' Israele.

<sup>23</sup> Hipoñake an-drebeke o soñikoo,

ie mandrenge Azo an-tsabo,

naho i fiaiko jineba'oy.

<sup>24</sup> Ho talilie' ty lelako lomoñandro

o havantaña'oo,

fa salatse, toe meñatse

o mipay hijoy ahikoo.

## 72

*A i Selomò* <sup>1</sup> Toloro amy mpanjakay ty fizakà'o, ry Andrianañahare, vaho amy ana' i mpanjakaiy ty havantaña'o,

<sup>2</sup> Hizaka'e an-kahiti'e ondati'oo, o mpisotri'oo an-katò.

<sup>3</sup> Hinday fanintsinañe am' ondatio o vohitseo, naho havañonañe o haboañeo.

<sup>4</sup> Ho mei'e to o rarake am'ondatioo, ho rombahe'e ty ana' o poi'eo, vaho ho demohe'e ty mpamorekeke.

<sup>5</sup> Hañeveñe ama'o iereo naho mbe ey i androy, vaho mbe eñe i volañey, amy ze hene tariratse.

<sup>6</sup> Ie hizotso manahake ty orañe an-teteke vaho tinatake eo, hoe ereke mampiboboke ty tane.

<sup>7</sup> Hiraorao amo andro'eo o vañoño: vaho am-pierañerañañe vokatse ampara' te mimosaoñe i volañey.

<sup>8</sup> Ho fehè'e ty boak' an-driake eñe, pak'an-driak' aña ka; le boak' amy sakay pak'amo olon-taneo.

<sup>9</sup> hilokoloko ama'e o mpimoneñe am-babangoañeo; vaho hitsela lemboke o rafelahi'eo.

<sup>10</sup> Handroroñe ama'e o mpanjaka' i Tarsiseo naho o tokonoseo; hañenga ama'e o mpanjaka' i Tsebà naho i Sebào.

<sup>11</sup> Eka, hibokokoa' ze kila mpanjaka,

hene fifeheañe ro hitoroñe aze.

<sup>12</sup> Himbae'e ty rarake te mitoreo,

naho i mpisotriy,

vaho i tsy amam-pañimbay.

<sup>13</sup> Hiferenaiña'e ty maifoifo naho o poi'eo, vaho

ho rombahe'e

ty fiai' o mavomavoo.

<sup>14</sup> Ho jebañe'e ami'ty famorekekeañe

naho amo hasiahañeo ty fiai'iareo,

fa sarotse am-pivazohoa'e eo ty lio' iareo.

<sup>15</sup> Ho velon-dre!

hatolotse aze ty volamena' i Sebà; añaonjono

halaly ama'e nainai'e,

andriaño lomoñandro.

<sup>16</sup> ho vokats' ampemba i taney, an-dengon-

kaboañe ey,

le hihelakelake hoe e Lebanone aña

o havokara'eo;

vaho handrevake hoe ty ahe' i taney

o boak'an-drovao.

<sup>17</sup> Tsy ho tampetse nainai'e ty tahina'e; tsy ho

modo aolo' i àndroy ty tahina'e;

vaho hifampitata ty ama'e ondatio,

ze kilakila ondaty hanao aze soa-tata.

<sup>18</sup> Andriaño t'IEHOVÀ Andrianamboatsé,

Andrianañahare' Israele,

Ie avao ro manao raha tsitantane.

<sup>19</sup> Bangoeña nainai'e i tahina'e

lifo-bolonahetsey;

maña'tseke ty tane toy ty enge'e.

Ie zay! naho Amena!

<sup>20</sup> Migadoña eo ty filolofa' i Davide, ana' Iesae.

## **Fange Faha III**

*Sabo 73 - 89*

## 73

*Sabo' i Asafe* <sup>1</sup> Toe soaen' Añahare t'Israele  
naho o malio añ'arofoo.

<sup>2</sup> Aa naho zaho,  
didý tsy ho nipolatitse o tombokoo;  
ho nidorasitse o liakoo.

<sup>3</sup> Ie nitsikirike o mpievoñevoño\*,  
naho nitreako ty havokara' o lo-tserekeo,

<sup>4</sup> Ie tsy manaintaiñe te mihomake,  
jangañe ka ty sandri' iareo.

<sup>5</sup> Tsy ampoheke manahake ondatio;  
mbore tsy tokoen-draha  
manahake ondaty ila'eo.

<sup>6</sup> Aa le miravake fiebotseborañe  
am-bozo'eo;  
manaroñ' iareo hoe sikiñe  
o hasiahañe mandoviakeo,

<sup>7</sup> Mampibotiritse o fihaino'eo ty solike,  
etsake naho tampe-draha-iriele ty tro'e.

<sup>8</sup> Manivetive iereo, mikinia famorekekeañ' an-  
karatiañe.

<sup>9</sup> Fa najado' iareo hiatreatre o likerañeo  
o falie' iareoo,  
mikariokariok' an-tane atoy  
o famele' iareoo.

<sup>10</sup> Aa le mimpoly atoy ondati'eo,  
naho genohe' iereo i rano era'ey.

<sup>11</sup> Le hoe iereo :  
Aia te haharofonan' Añahare?  
mahilala hao i Andindimoneñey?

<sup>12</sup> Inay ie, o lo-tserekeo—  
ie mierañerañe manombo vara avao.

<sup>13</sup> Toe tsy vente'e ty nañalioveko ty troko;

\* **73:3** Iob 21:7, Iir 12:1-2, Sab 73:17 92:6-7



naho nanasa tañañe an-kalio-tahiñe.

<sup>14</sup> Nalovilovy lomoñandro raho;

vaho nililoveñe boa-maraiñe.

<sup>15</sup> Lehe ataoko te, zao ty ho volañeko;

hete! tsy ho nahity amo tariran' ana'oo.

<sup>16</sup> Fa ie nitsakoreako,

haharendreke o raha zao,

le nihamokorañe o masokoo,

<sup>17</sup> Ampara' te niziliheko

an-toen'Añahare miavake ao;

vaho nahaisake ty figadoña' iareo.

<sup>18</sup> Toe apo'o an-tane malama iereo;

ampikorovohe'o mb'an-karotsahañe ao.

<sup>19</sup> Hoke! akore ty fiantoa' iareo anianike,

Fa binotsa' ty firevendreveñañe.

<sup>20</sup> Hoe nofy t'ie tsekake; ry TALÈ,

ie mivañon-dRehe

le ho heje'o vintañ' iareo.

<sup>21</sup> Fa nikokentrekokentreñe ty troko naho  
niteveke ty an-tsapavoako ao,

<sup>22</sup> Akore ty hanèko naho

ty habahimoako, hoe biby añatrefa'o eo.

<sup>23</sup> Fe mpiama'o nainai'e raho;

rinambe'o ty tañako havana,

<sup>24</sup> Hiaoloa'o ami'ty fanoroa'o,

vaho ho rambese'o

mb'añ'engeñe mb'eo.

<sup>25</sup> Ia ro ahiko an-dikerañe ao,

naho tsy Ihe?

le tsy amam-pisalalàko an-tane atoy naho tsy Ihe.

<sup>26</sup> Milesa ty nofoko naho o ovakoo,

fa i Andrianañahare ro haozaran-

troko naho ty anjarako nainai'e.

<sup>27</sup> Toe hihomake ze lavits' Azo;

songa aitoa' o ze miamboho  
ama' o hañarapiloa' e.

<sup>28</sup> Fe soa ho ahy ty fañarineako  
aman' Añahare,  
fipalirako t' i IEHOVA TALÈ,  
hataliliko iaby o tolon-draha' oo.

## 74

*Fanoroa' i Asafe* <sup>1</sup> Ry Andrianañahare,  
ino ty ifaria' o anay zafe-anake?  
Ino ty ifombo' o o añondry fiandraze' oo?

<sup>2</sup> Tiahio i valobohòke vinili' o haehaey,  
i foko jineba' o ho lova' oy !  
naho ty vohi' i Tsiône fimoneña' oy.

<sup>3</sup> Aonjono o fandia' oo  
mb' amy hakoahañe nainai' ey,  
jinoi' i rafelahiy ze hene raha  
an-toe' i miavakey ao\*.

<sup>4</sup> Niroharoha añivo' o famantaña' oo  
o rafelahi' oo;  
najado' iareo ty vilo' iareo ho viloñe.

<sup>5</sup> Sata' e ty maonjom-pekoñe  
añ' ala matahetse ao;

<sup>6</sup> Ie henaneo, mamatsike  
am-pekoñe naho rabosàke  
o varamba' e nitsenèñe an-tsokitseo.

<sup>7</sup> Finorototo' iereo pak' an-tane  
i efe' o miavakey;  
nitivae' iereo i fimoneñan-  
tahina' o masiñey.

<sup>8</sup> Hoe ty fisafirin-tro' iareo:  
Antao haharo ambaneñe iaby iereo;

---

\* **74:3** Sab 79:1-13

Fonga nitomontoe' iareo  
o toem-pivorin' Añahare an-taneo.

<sup>9</sup> Tsy mahatrea o vilo' aio zahay;  
tsy amam-pitoky ka; naho  
tsy ama' ay ty mahafohiñe te hombia.

<sup>10</sup> Pak' ombia ry Andrianañahare,  
te mbe hanitse avao i rafelahiy?  
Ho tsambolitio' o malaiñ' azo nainai' e hao i  
tahina' oy†?

<sup>11</sup> Ino ty nanitaha' o ty fità' o?  
I fitàn-kavana' oy?  
Afaho boak' añ' araña' o ao ty fità' o,  
vaho mongoro?

<sup>12</sup> Toe mpanjakako boake haehae  
t' i Andrianañahare,  
mitoloñe fandrombahañe an-tane atoy.

<sup>13</sup> Riniaria' o an-kaozarañe i riakey  
vaho dinemo' o an-drano ao  
o loha' i fañaneñeio.

<sup>14</sup> Hinoto' o o loha' i fañanen-driakeio,  
hamahana' o o mpimoneñe  
am-patrañeio.

<sup>15</sup> Nipoñafe' o o rano mitsiritsiokeo  
naho o sakao;  
nimaihe' o o oñe mikararake nainai' eo.

<sup>16</sup> Azo ty antoandro, Azo ka ty haleñe;  
fa nihajarie' o o hazavañeio naho i àndroy

<sup>17</sup> Najado' o iaby o fiefetsefe' ty tane toio,  
nanoe' o ty asotry naho ty asara.

<sup>18</sup> Tiahio, ry IEHOVÀ,  
te niteratera i rafelahiy,  
vaho nitivae' o lo-tserekeo i Tahina' oy.

---

† 74:10 Sab 74:18

19 Ko atolo'o ami'ty biby hàko ty deho'o,  
ko haliño'o nainai'e o nanilofe'oo.

20 Ambeno i fañinay,  
fa atseke kibohon-kasiahañe  
o toetse maieñe' an-taneo !

21 Ko hampolie'o an-kasalarañe  
o demokeo!  
fa hibango i tahina'oy  
o misotrio naho o poie'eo.

22 Miongaha, ry Andrianañahare,  
ihalalio o azoo;  
tiahio ty fiterà' i dagolay  
lomoñandro.

23 Ko haliño ty feo' o rafelahi'oo;  
mitoabotse nainai'e ty fifandragaragà'  
o mitroatse ama'oo.

## 75

*Ho a i Talè, Sabo' i Asafe, takasy ami'ty feo :*

*Ko Mandrotsake* <sup>1</sup> Fa nañandriañe Azo zahay  
ry Andrianañahare !

fa nañandriañe Azo,  
fa marine i tahina'oy,  
fa nitaroñeñe o fitoloña'o fanjakao.

<sup>2</sup> Ie amotoañako andro;  
le hizaka ami'ty fahiti'e raho.

<sup>3</sup> Mitranake ty tane toy  
naho ze kila mimoneñe ao,  
Zaho ty nampijadoñe o faha'eo. Selà

<sup>4</sup> Hanoeko ty hoe amo mpirengevokeo:  
Ko mandroharoha!  
le amo lo-tserekeo:  
Ko mañonjon-tsifa.

<sup>5</sup> Ko zonjoeñe añ'abo o tsifa' areoo,

vaho ko mivolañe an-kagàn-kàtoke.

<sup>6</sup> Fa tsy boak'atĩhana ndra ahandrefa  
ndra am-patrambey aña ty fañonjonaña.

<sup>7</sup> I Andrianañahare ro mizaka;  
afotsa'e ty raike le aonjo'e ty raike.

<sup>8</sup> Am-pità' IEHOVÀ ao ty fitovy  
pea divay mandroso, lifo-pilaroña;  
le ampidoaña'e;  
toe ho drofote' ze fonga lo-tsereke  
an-tane atoy,

vaho hagodra' iareo o karafo'eo.

<sup>9</sup> Fa naho zaho, ho talilieko nainai'e,  
ho reneko an-tsabo t'i Andrianañahare' Iakobe.

<sup>10</sup> Fonga ho kitsiheko ty tsifa'  
o lo-tserekeo,  
fe honjoneña ty tsifa' o vantaño.

## 76

*Ho a i Talè, Sabo' i Asafe, Titiheña ami'ty  
marotaly* <sup>1</sup> Fohiña e Iehodà ao

t'i Andrianañahare;  
ra'elahy e Israele ao i tahina'ey.

<sup>2</sup> E Salema ao ty kivoho'e;  
e Tsiône ao ty fimoneña'e.

<sup>3</sup> Teo ty nampipeña'afa'e  
o ana-pale nibebaño,  
o kalan-defoño, o fibarao,  
naho o hotakotakeo. Selà

<sup>4</sup> Mireandrian-drehe, am-bolonahetse,  
mandikoatse ty vohitse aman-tsindroke.

<sup>5</sup> Nivoloseña o fanalolahio,  
ie nilañake ty rotse, ndra raik' amo lahi-  
maozatseo

tsy nahaisake ty fità'e.

<sup>6</sup> Ami'ty trevo'o,  
ry Andrianañahare' Iakobe,  
le sindre nitsikorak' an-drotse  
ty mpiningitse reke-tsoavala.

<sup>7</sup> Ihe le Ihe avao ro añeveñañe!  
Ia ty mahafitroatse añatrefa'o eo te ihe ro  
viñetse?

<sup>8</sup> Nampijanjiñe'o boak' an-dikerañe añe  
ty zaka,

nihembañe ty tane toy vaho nitsiñe,

<sup>9</sup> ie nitroatse hizaka t'i Andrianañahare  
handrombake o mpisotri' ty tane toio. Selà

<sup>10</sup> Toe handrenge Azo  
ty haboseha' ondatio,  
ho sadiañe'o ty tsy niritse  
amo haviñerañeo.

<sup>11</sup> Mifantà am'IEHOVÀ  
Andrianañahare' areo, le henefo;  
Songa mañengà amy  
Mampañeveñey o mañohok' azeo.

<sup>12</sup> Aitoa'e ty kofò' o roandriañeo;  
irevendreveña'  
o mpanjaka' ty tane toio.

## 77

*Ho a i Talè, ami'ty Iedotone, Sabo' i Asafe*

Ty feoko mb'aman' Añahare  
naho itoreovako;

ty feoko mb'aman' Añahare,  
vaho nanokilaña'e ravembia!

<sup>2</sup> Amy andro nahampohek' ahity  
t'ie nipay i TALÈ;

an-taña nahity, tsy nigebañe te haleñe;

nifoneñe tsy hohòeñe ty foko.

<sup>3</sup> Ie mahatiahy raho, ry Andrianañahare  
le mitretretrete, ie tsakorèko,  
le mitoirañe ty troko. Selà

<sup>4</sup> Tana’o tsy hikòpoke o holi-masokoo;  
embetse raho tsy mahafivolañe.

<sup>5</sup> Nereñereko o andro taoloo,  
o taoñe haehaeo,

<sup>6</sup> Tiahiko o nititihako an-kaleño;  
mifañoñe ami’ty troko raho,  
le hoe ty fitsakorean-troko:

<sup>7</sup> Haitoa’ i Talè zafe-anake hao?  
le lia’e tsy hisohe’e hao?

<sup>8</sup> Fa modo kitro añ’afe’e hao  
ty fiferenaiña’e?

Fa nilesa kitro-katroke hao  
i nampitamae’ey?

<sup>9</sup> Nihaliñon’Añahare hao ty fatariha’e?  
nagabe’e an-kaviñerañe ao hao  
i fitretreza’ey? Selà

<sup>10</sup> Le hoe raho : Zao ty halemeako:  
Ie ataoko ho mete miova  
ty fitàn-kavana’ i Andindimoneñey.

<sup>11</sup> Ho tiahiko ty fitoloña’ IA,  
hahatsikaitse o raha tsitantane  
nanoe’o haehaeo.

<sup>12</sup> Ho hene tsakorèko o fitoloña’oo,  
hereñerèko o tolon-draha’oo.

<sup>13</sup> Ry Andrianañahare, masiñe\* ty lala’o;  
ia ty ndrahare ra’elahy  
hañirinkiriñe aman’ Añahare?

<sup>14</sup> Ihe ro Andrianañahare  
mitolon-kalatsañe!

---

\* **77:13** Ies 35:8

fa naboa' o am' ondatio ty haozara'o.

<sup>15</sup> Nijebañem-pità'o ondati'oo,  
o tarira' Iakobe naho Iosefeo. Selà

<sup>16</sup> Nahatrea Azo o ranoo,  
ry Andrianañahare,  
ie nahatrea azo i ranoy  
le nivalitaboake !  
nitabohazake i lalekey.

<sup>17</sup> Nampikojajoake orañe o rahoñeo;  
nigorogodoñe i likerañey,  
nimb'etia mb'atia ka o ana-pale'oo.

<sup>18</sup> Tam-po' i tangololahiy  
ty fivola' i ampi'oy;  
nampireandreañe' i helatsey  
ty voatse toy!  
nihondrahondra naho niozoñozoñe  
ty tane toy.

<sup>19</sup> Nitoañe' i lala'oy i riakey,  
i rano jabajabay ty nilalan-tsile'o;  
vaho tsy nioniñe o liam-pandia'oo.

<sup>20</sup> Narahe'o hoe lia-raike ondati'oo, am-pità' i  
Mosè naho i Aharone.

## 78

*Fanoroa' i Asafe* <sup>1</sup> Tsendreño o fañòhakoo ry  
ondatiko,

atokilaño mb'am-pivolañam-bavako  
o ravembia' areoo.

<sup>2</sup> Ho sokafeko ty vavako handrazaña'e:  
ho lañoneko razan-tsaontsy  
miheotse boak'an-kaehae'e;

<sup>3</sup> o jinanjin-tika naho fohin-tikañe vaho natalilin-  
droae aman-tikañeo.



<sup>4</sup> Aa le tsy haetantika amo ana' iareoo,  
fa hatalilin-tika amo tariratse ho avio  
ty fandrengeañe IEHOVA, naho ty haozara'e vaho  
o fitoloña'e  
ra'elahy nifonire'eo.

<sup>5</sup> Fa noriza'e e Iakobe ao ty taroñe naho najado'e  
e Israele ao t'i Hake  
linili'e aman-droaen-tikañey,  
hañanara' iareo o ana' iareo,

<sup>6</sup> hampahafohina' iareo

ty tariratse ho avy,  
naho o ajaja mbe hasamakeo,  
hitroara' iareo hañoke o ana'eo,

<sup>7</sup> soa te ho aman'Añahare ty fatokisa'e, vaho tsy  
handikofa' iareo  
o fitoloñan' Añahareo,  
fe hambena' iareo o lili'eo;

<sup>8</sup> naho tsy hitsikombe o roae' iareoo; tariratse  
mitangingiñe naho miola,  
tariratse tsy nampifahatse troke,  
tsy nigahiñe aman' Añahare ty arofo'e.

<sup>9</sup> Nimpitam-pale ninday fale  
o ana' i Efraïmeo  
f'ie niamboho tañ' andro' i hotakotakey.

<sup>10</sup> Tsy nambena' iareo  
i fañinan' Añaharey,  
vaho nifoneñe tsy hañavelo amy Tsara'ey.

<sup>11</sup> Nihaliño' iareo o fitoloña'eo—  
o halatsañe naboae' am' iareoo,

<sup>12</sup> o raha tsitantane nanoe'e añaatrefan-  
droae' iareo e Mitsraïmeo, an-tete' i Tsòañe ao.

<sup>13</sup> Finatsi'e i riakey naho nampisorohe'e mb'eo  
iareo!  
najoha'e hoe votry i ranoy.

14 Le niaoloa'e an-drahoñe iereo  
te antoandro,  
nahò an-kazavàn'afo te haleñe  
am-para' te niporea.

15 Finoi'e o vato am-patraño,   
finaha'e rano bey manahake i an-dalekey;

16 Nampitotsaha'e torahañe ty lamilamy vaho  
nampikararaha'e rano hoe oñe.

17 Fe mbe nandilara' iereo,  
niola amy Abo Tiañey  
am-babangoañ' aña.

18 Nitsöhe' iereo an-troke  
t'i Andrianañahare,  
nihalaly mahakama  
ty amy hadrao'iereo.

19 Toe, nandrabio' iereo  
t'i Andrianañahare, ami'ty hoe:  
Mahafañalankaña fandambañaña  
an-dratraratra ao hao  
t'i Andrianañahare,

20 Eka, finofo'e i vato  
nampidoandoan-dranoy,  
vaho nampangahananae'e o torahaño.

Aa vaho hahafanjotsoa'e mofo ka?  
he ho fahana'e hena hao ondati'eo?

21 Aa ie jinaji' IEHOVA,  
le niforoforo ty fifombo'e,  
nahò namiañaña afo t'Iakobe,  
vaho nionjoña am' Israele ty haviñeraña,

22 Amy t'ie tsy natoky an' Andrianañahare,  
vaho tsy niatoa' iereo ty fandrombaha'e;

23 Fe linili'e o rahoña amboneo,  
nahò sinoka'e o lalambein-dindiño,

24 nampikojojoaha'e mane ho kamae'iereo;

nanjotsoa'e ampemban-dikerañe.

<sup>25</sup> Nikama ty mofom-panalolahy ondatio! nampidobaña'e mahakama nahaeneñe!

<sup>26</sup> Nampikofaohe'e an-dikerañe ey

ty tiok' atiñanañe vaho

nitehafa'e an-kaozarañe i tiok' atimoy.

<sup>27</sup> Nampidoañe'e am' iareo

ty hena hoe lemboke,

voron'e amañ'elatse

mira amo fasen-driakeo!

<sup>28</sup> nampivotrahe'e aivo'

ty tobe'e ao,

niarikoboñe i Toem-pimoneña'ey.

<sup>29</sup> Aa le nikama iareo vaho nianjañe

amy te nanjotsoa'e ty hasiji' iareo.

<sup>30</sup> Ie mboe nibòro ty drao' iareo,

mbe tam-palie' iareo ao i henay,

<sup>31</sup> le nihelofe' ty haviñeran' Añahare

navetra'e o nanjofak' am'iereoo,

vaho nampihotrahe'e o jinoboñ' Israeleo.

<sup>32</sup> Ie amy zay iaby, mbe nitolon-kakeo iereo, tsy niantoke

o fitoloña'e fanjakao.

<sup>33</sup> Aa le nampigadoña'e an-kamodoañe

ty andro' iareo,

naho an-kebahebake ty tao' iareo.

<sup>34</sup> Ie zinevo'e iereo, naho nipay aze,

nisoloho vaho nitsoeke

an'Andrianañahare,

<sup>35</sup> le nahatiahy te lamilami' iareo

t'i Andrianamboitse,

naho t'ie Mpijeba' iareo

i Andrianañaharen-dindimoneñey.

36 Fe kinabea' iareo am-palie;  
vaho nandañitse am-pameleke.

37 Toe tsy nifahatse ama'e o arofo' iareoo,  
naho tsy nigahiñe amy fañina'ey.

38 Fe amy fitretreza'ey,  
le hinaha'e o hakeo' iareoo,  
naho tsy rinotsa'e;  
beteke natoli'e ty haviñera'e,  
vaho tsy fonga nitroboa'e o fifombo'eo !

39 Nitiahi'e te nofotse avao iareo,  
tioke mihelañe naho tsy mibalike.

40 Impire hao ty niodia' iareo  
am-patrambey aña,  
vaho nampioje'Aze an-dratraratra aña?

41 Eka, niamboho naho nitsok'  
an'Andrianañahare iereo,  
vaho nanigike i Masi' Israeley

42 Tsy nitiahi' iereo ty fità'e,  
i andro nijebaña'e iareo  
amy rafelahiy,

43 Ie nampipoha'e e Mitsraime aña  
o vilo'eo naho  
an-tete' i Tsòaña ao o halatsà'eo.

44 Nafote'e ho lio o saka' iareoo,  
vaho tsy nimete kamaeña  
o toraha' iareoo.

45 Nañiraha'e laletse nifamorohotse,  
namotseke, naho sahoña nandrotsake.

46 Natolo'e amo oletseo  
ty havokara' iareo,  
amo valalao ty tolim-pitoloña' iareo.

47 Rinotsa'e ami'ty havandra  
ty vahe' iareo, naho  
an-drano-panala o sakoa' iareoo.

48 Nengae'e amy havandray  
o añombe' iareoo,  
vaho an-kelatse nibelabela  
o mpirai-tro' iareoo.

49 Nahitri'e am'iereo ty fiforoforoa'e;  
fifomboañe naho haviñerañe vaho hankàñe;  
frimboñan' anjely mpandrotsake.

50 Nampimirae'e lalañe i haviñera'ey;  
tsy navotso'e am-pihomahañe  
ty fia'i'iereo,  
fa napo'e ho zamanen-kiria  
ty havelo' iareo

51 Binaibai'e ze hene tañoloñoñoña'  
i Mitsraime, ty lohan-kaozara'iereo  
an-kiboho' i Kame ao.

52 Nonjone'e hoe añondry ondati'eo;  
vaho niaoloa'e mb'am-babangoañe aña hoe lia-  
raike.

53 Nindese'e tsy nolañeñe,  
le tsy nihembañe iereoo,  
vaho nampiopoe' i riakey o rafelahio.

54 Nindese'e mb'an-tane'e miavake mb'eo,  
sikala'ami'ty vohitse  
vinilim-pità'e havana toy.

55 Rinoa'e aolo' iareo ka o kilakila'ndatio;  
le zinara'e an-taly ty lova' iareo,  
vaho nampitobea'e amo akiba'  
iareoo o fifokoa' Israeleo.

56 F'ie nangala-pañahy naho niola  
aman'Añahare Andindimoneñe, vaho  
tsy nambena' iereoo o taro'eo;

57 Te mone nibalintoa naho nañorike  
ty tsy fatokisan-droae' iareo;  
niolake hoe fale mibatriotse.

58 Ie nikai-jaka ama'e  
amo tamboho' iareo;  
vaho nampamarahy aze  
amo raham-pahasive'iareoo.

59 Nahajanjiñe t'i Andrianañahare  
le nifombo vaho niheje'e vintañe t'Israele.

60 Le nafortintse'e ty kivoho'e e Silo ao, i akiba  
nanoe'e  
himoneña'e añivo'ondatioy.

61 Nasese'e mb' am-pandrohizañe  
añe ty haozara'e,  
le am-pità' o rafelahio ty enge'e.

62 Natolo'e ami'ty fibara ka ondati'eo,  
naha-fiforoforo Aze i lova'ey.

63 Nabotse' ty afo o ajalahi'eo;  
naho tsy nanan-tsabo haonjoñe  
o somondrara'eo.

64 Nampikorovohem-pibara  
o mpisoro' iareoo,  
naho tsy nahafandala o remavoi' iareoo.

65 Nivañoñe amy zao t'i TALE  
hoe nirotse,  
manahake ty fanalolahy niopoen-divay.

66 Nampipolie'e an-dafa o rafelahi'eo,  
le nametsaha'e hasalarañe tsy modo  
kitro katroke.

67 Mbore nifarie'e ty kivoho' Iosefe;  
le tsy jinobo'e ty tarira' i Efraime.

68 Fe ginene'e ty fifokoa' Iehodà,  
i vohy Tsiône nikokoa'ey.

69 Rinanji'e hoe o haboaño  
i toe'e miavakey,  
manahake ty tane naore'e ho nainai'e

tsy ho modo toy.

<sup>70</sup> Jinobo'e ka t'i Davide mpitoro'e,  
rinambe'e amo golobon'añondrio.

<sup>71</sup> Boak' am-piarahañe o añondry  
mampinoo ty nendesa'e aze  
hiaraha'e o tiri' Iakobe ondati'eo,  
nahò Israele lova'ey

<sup>72</sup> Nifahana'e añ' arofo-vañonañe le niaoloa'e  
am-pitàñe mahimbañe.

## 79

*Sabo' i Asafe*<sup>1</sup> Ry Andrianañahare, tinorotosi'  
o kilakila 'ndatio\* ty lova'o;  
fa tiniva' iereo i anjomba'o Masiñey  
zinevo' iereo ho am-botri-am-botry  
t'Ierosalaime .

<sup>2</sup> Finaha'e ami'ty fañova' o mpitoro'oo  
o voron-dikerañeo;  
nahò ami'ty nofo' o nigahiñ' ama'oo  
o bibi' ty tane toio.

<sup>3</sup> Nadoandoañe hoe rano mb'eo mb'eo  
e Ierosalaime ao ty lio' iereo;  
ie tsy amam-pandenteke.

<sup>4</sup> Fifosà' o am-paripari'aio zahay,  
mandrabioñe nahò mitsikike anay o mañohok'  
anaio.

<sup>5</sup> Pak'ombia ry IEHOVÀ?  
ho viñera'o nainai'e hao?  
Sikal'ombia ty mbe hibebañe  
hoe afo ty famarahia'o?

<sup>6</sup> Adobaño amo kilakila ondaty tsy

\* **79:1** Sab 79:6-7; 74:1-23, Ies 63:18, Iir 51:51, Fir 1:10, Dan 8:13,  
11:31, Mat 24:15

mahafohiñ'Azoo ty haviñera'o;  
 naho amo tane tsy mikanjy i tahina'oio.

<sup>7</sup> Fa naboitse' iereo t'Iakobe, naho  
 nanoeñe tanàn-taolo ty fimoneña'e.

<sup>8</sup> Ko tiahie'o ama'ay o hakeon-drae'aio,  
 ampisalakao anay masika  
 o fiferenaiña'oo,  
 fa nafotsak' ambane.

<sup>9</sup> Imbao, ry Andrianañaharem-  
 pandrombahañ' anay!

Ty amy enge' i tahina'oy;  
 avotsoro, vaho saroño  
 o hakeo'aio ty amy tahina'oy.

<sup>10</sup> Aa vaho akore ty atao' o kilakila  
 ondatio ty hoe :

Aia t'i Andrianañahare' iareo?  
 Ampahafohino o fifeheañeo  
 ampahaisaha'ay  
 ty famaleañe o liom-pitoro'o nadoañeo.

<sup>11</sup> Ampiatrefañ' Azo  
 ty fitretretrete' o mpirohio;  
 ty ami'ty harà' elahin-kaozara'o;  
 hahao o tinendre havetrakeo.

<sup>12</sup> Le valeo im-pito añ'araña'  
 o mañohok' anaio, o tivetive  
 nafokafoka'e ama'oo ry Talè.

<sup>13</sup> Soa te hañandriañe Azo nainai'e zahay on-  
 dati'o naho  
 añondrim-piandraza'oo ,  
 vaho hatalili'ay amy ze hene tariratse  
 kitro añ'afe'e ty enge'o.



## 80

*Ho a i Talè, ami'ty feo: Antsivam-pivory, titiheñe amo Marovanio. Sabo' i Asafe.* <sup>1</sup> Toloro ravembia ry Mpiarak' Israele, ry Mpiaolo' Iosefe hoe t'ie lia-raike; ry Mpiambesatse ambone' o kerobeo, mireandreaña !

<sup>2</sup> Tsekafo añatrefa' i Efraime naho i Beniamine naho i Menase ty haozara'o vaho mb'etoa hañimba anay !

<sup>3</sup> Ry Andrianañahare, Ampolio zahay naho ampireandreaño laharañe, soa te ho tra-drombake zahay.

<sup>4</sup> O ry IEHOVÀ Andrianañahare' i Màroy, pak'ombia ty mbe hiviñera'o ty halali' ondati'oo?

<sup>5</sup> Nazotso'o mofon-dranom-pihaino, naho nampigenohe'o ranomaso am-pitovy telo.

<sup>6</sup> Ampanivetivè'o ondaty mañohok'anaio; vaho vereverè' o rafelahi'aio.

<sup>7</sup> Ry Andrianañahare' i Màroy. Ampolio zahay, ampireandreaño ty lahara'o, soa t'ie ho tra-drombake.

<sup>8</sup> Nitsongoe'o boak'e Mitsraime ty vahe; rinoa'o o kilakila'ndatio naho naketsa'o.

<sup>9</sup> Nihatsafe'o ty tane aolo'e eo, naho nampandaleke o vaha'eo, vaho nanitsife'o i taney.

<sup>10</sup> Nikopahe' i alo'ey o vohitseo; naho o tsampa'eo o mendoraveñe ra'elahio.

- 11 Nandrevake mb'amy riakey\* o ra'eo,  
 naho pak'amy sakay aña o tora'eo.
- 12 Aa vaho akore ty nandrotsaha'o o fahe'eo,  
 hitimpona' ze miary eo,
- 13 Troatroae' ty lambon' ala,  
 vaho abotse' ze misitsitse an-kivoke ey.
- 14 Ry Andrianañahare' i màroy,  
 Ehe, Mibaliha, mijilova boak' an-dikeraña ao  
 naho vazoho vaho tiliho ty vahe toy,
- 15 Eka! i tora'e naketsam-pitàn-kavana'oy, i ana-  
 dahy nampaozare'o ho Azoy,
- 16 finorototo' ty afo, finira,  
 mihomake ami'ty fitrevohan-dahara'o.
- 17 Anampezo fitaña indatim-pitàn-kavana'oy, i  
 ana' ondaty nampifatrare'o ho Azoy.
- 18 Vaho tsy hiambohoa'ay;  
 Ehe sotraho, hikanjia'ay ty tahina'o.
- 19 Ry IEHOVÀ Andrianañahare' i Màroy; Ampolio  
 zahay,  
 ampireandreaño ama'ay ty lahara'o,  
 vaho ho tra-drombake.

## 81

*Ho a i Talè, Sabo' i Asafe Titiheñe amo Marovanio* <sup>1</sup> Misaboa aman'Añahare haozaran-tika;  
 mipazaha an-drebeke aman'Añahare' Iakobe.  
<sup>2</sup> Araho an-tsabo !  
 Pehopeho ty kantsaña;  
 titiho ty jejo mamy-feo reketse marovany.  
<sup>3</sup> Tiofo amy jiri-bolañey ty antsiva,

---

\* **80:11** Riake: i Mediteraney

amy pea-bolam- pamantañan-tikañey.

<sup>4</sup> Fañè\* ho a i Israele;  
fepèn' Andrianañahare' Iakobe.

<sup>5</sup> Noriza'e am'Iehosefe† ho taroñe,  
ie niavotse le nanitsike ty tane' i Mitsraime;  
naho tsinanoko ty saontsy tsy napotako.

<sup>6</sup> Nahahako an-tsoro'e eo i kilankañey,  
navotsotse amy lietsey o fità'eo.

<sup>7</sup> Kinanji'o t'ie niampoheke,  
le rinombako;

nanoiñe azo am-pikafiran' ampiñe ao;  
nitsoheako an-drano Meriba aña. Selà

<sup>8</sup> Janjiño ry ondatiko, le ho toroako,  
ry Israele, hera ho haoñe'areo.

<sup>9</sup> Tsy ho ama'ndrahare hafa rehe,  
tsy hitalaho

amo saren-drahare ila'eo.

<sup>10</sup> Zaho IEHOVÀ Andrianañahare'o  
ninday azo boak'an-tane' Mitsraime aña.  
atañataña ty falie'o, le hetsaheko.

<sup>11</sup> Fe nihiritsiritse amako ondatikoo  
vaho nanjehats' ahy t'Israele.

<sup>12</sup> Aa le napoko horihe' iereo  
ty hagàn' arofo' iareo,  
homb'am-pisafiri' iareo avao.

<sup>13</sup> Aa naho nijanjiñe ahy ondatikoo!  
naho nañavelo amo lalakoo t'Israele,

<sup>14</sup> le ho nampitsolofiñeko aniany  
o malaiñe iareoo;  
vaho ho natoliko ty tañako hiatreatre  
o rafelahi' iareoo!

<sup>15</sup> Nioniñe te tsy to añaatrefa' IEHOVÀ

---

\* **81:4** Sor 23:24, Num 10:10, 29:1 † **81:5** Iehosefe: Iosefe  
tinovoñ' i tahinan'A'har

o malaiñe azeo,  
 fe ho nainai'e eo t'Israele.  
<sup>16</sup> Le hanjotsoa'e ampemba soa iereo,  
 naho hanjañeko an-tantele boak'am-bato ao.

## 82

*Sabo' i Asafe* <sup>1</sup> Mijohañe am-pivorim-  
 panalolahy  
 t'i Andrianañahare;  
 mizaka añivom-pizaka eo.  
<sup>2</sup> Pak'ombia ty mbe izakà' areo ami'ty tsy hiti'e,  
 hañonjonañe o tsivokatseo? Selà  
<sup>3</sup> Meo tò o rarakeo naho o bode-raeo;  
 tohaño ty zo' o poie'eo naho o misotrio.  
<sup>4</sup> Hahao o mahàtrao naho o malorèò;  
 avotsoro am-pità' o lo-tserekeo.  
<sup>5</sup> Tsy mahilala iereo, naho tsy mahafohiñe,  
 mirererere añ'ieñe ao avao;  
 fa naveve iaby o faha' ty tane toio.  
<sup>6</sup> Nanao ty hoe raho: Mpizaka\* nahareo  
 songa anak' i Andindimoneñey.  
<sup>7</sup> Fe hikoromake hoe ondaty avao,  
 hikorovoke manahake ty raike  
 amo roandriañeo.  
<sup>8</sup> Miongaha, ry Andrianañahare,  
 zakao ty tane toy,  
 fa kila ho lovae'o o fifeheañeo.

## 83

*Sabo' i Asafe, Takasy* <sup>1</sup> Ko mianjiñe ry Andri-  
 anañahare

---

\* **82:6** elohim: a'hare maro, mpizaka, anjely,

ko mimosy vaho ko mañamahama,  
ry Andrianamboatse!

<sup>2</sup> Heheke, miroharoha o rafelahi'oo,  
mivoala-doha o malaiñe Azoo.

<sup>3</sup> Hikililie' iareo ondati'oo;  
mivory hikinia o mipalitse ama'oo.

<sup>4</sup> Antao, hoe iereo, haitoan-tika  
tsy ho fifeheañe ka.

soa tsy ho tiahy ka ty añara' Israeley.

<sup>5</sup> An-troke miraike t'ie mikinia,  
mifañina fanjeharañe ama'o.

<sup>6</sup> O kiboho' i Edome naho Ismaeleo;  
i Moabe, naho o nte Hagìo,

<sup>7</sup> i Gebale naho i Amone,  
naho i Amaleke;  
i Pilisty vaho o mpimone' i Tsoreo.

<sup>8</sup> Rekets' am' iareo ka t'i Asore;  
le fitañe am'iareo o ana' i Loteo. Selà

<sup>9</sup> Ampanahafo amy nanao'o amy Midiane,  
amy Sisera vaho am' Iabene  
an-torahan-Kisone aña,

<sup>10</sup> i narotsake Endora aña rey,  
ninjare litsake amy taney.

<sup>11</sup> Ampihambaño amy Orebe  
naho amy Zeèbe o roandria'eo,  
fonga hanahak' i Zebake naho i Tsalmonà  
o ana-dona' iareoo

<sup>12</sup> ie nanao'iareo ty hoe:

Antao hitavaña o fiandrazen' Añahareo!

<sup>13</sup> O Andrianañahareko,  
anò hoe talion-deboke iereo,  
hoe kafokafo miatre-tioke !

<sup>14</sup> Manahake ty afo mamorototo ala,  
naho ty foroha mampisolebatse

o vohitseo;

<sup>15</sup> Aa le horidaño amy tangololahi'oy;  
le ampihembaño ami'ty tio-bei'o.

<sup>16</sup> Liforo hasalarañe ty vinta' iareo,  
hipaia'e ty tahina'o\*, ry IEHOVÀ.

<sup>17</sup> Ie ho salareñe naho  
hangebakebake nainai'e,  
eka ho meñareñe naho hikoromake.

<sup>18</sup> Hahafohina' ondatio te Ihe avao,  
ro kanjieñe ty hoe IEHOVÀ,  
Andindimone' ty tane toy.

## 84

*Ho a i Talè: Sabo' o Ana' i Korao; amo Marotalio* <sup>1</sup> Honh! hamotsontane ty kivoho'o  
ry IEHOVÀ' i Màroy !

<sup>2</sup> Misalala ty foko, eka tsipike ty sihisihy  
ty amo kiririsa' IEHOVÀo.

Mirebek' aman' Añahare  
veloñe ty troko naho ty sandriko.

<sup>3</sup> Hehe, nahatrea traño ty jorioke,  
naho hãlañe ho aze i tintiñey,  
hañopake o ana'eo  
amo kitreli'oo ry IEHOVÀ' i Màroy,  
Mpanjakako naho Andrianañahareko!

<sup>4</sup> Haha o mimoneñe añ'anjomba'o ao,  
mandrenge Azo nainai'eo. Selà

<sup>5</sup> Haha t'indaty naho ihe ro haozara'e,  
añ'arofoiareo  
o lalam-pamantañaño.

<sup>6</sup> Ie miranga am-bavatanem-

---

\* **83:16** Sab 44:21-22, 74:18, Ies 52:5, Iir 23:26-27

pirovetañe\* ao,  
 le ampanjarie'e tane manganahana,  
 vaho saroña' i oran-jobay fañanintsiñe!

<sup>7</sup> Mañavelo an-kaozarañe  
 orihen-kafatrarañe iareo,  
 songa miatrek' an'Andrianañahare  
 e Tsiône ao.

<sup>8</sup> Ry IEHOVÀ Andrianañahare'  
 i Màroy, janjiño ty halaliko;  
 toloro ravembia,  
 ry Andrianañahare' Iakobe. Selà

<sup>9</sup> Vazohò ry Andrianamboitse  
 Mpikalan-defo' aiy,  
 isaho ty lahara' i noriza'oy.

<sup>10</sup> Soa te ami'ty andro arivo,  
 ty andro raik' an-kiririsa'o ao;  
 hamake te mpañamben-dalam-  
 bein' anjomban'Añahareko raho,  
 ta te himoneñe an-kiboho'  
 o lo-tserekeo.

<sup>11</sup> Masoandro vaho fikalañe  
 t'IEHOVÀ Andrianañahare,  
 Mpanolotse falalàñe naho engeñe  
 t'IEHOVÀ: tsy eo ty raha soa  
 ho tana'e amo mañavelo  
 an-kavantañaño.

<sup>12</sup> O ry IEHOVÀ' i Màroy,  
 haha t'indaty miato ama'o.

## 85

*Ho a i Talè : Sabo' o Ana' i Korao* <sup>1</sup> Ry IEHOVÀ  
 nisohe'o ty tane'o;  
 nafote'o ty fañondevoza' Iakobe;

---

\* **84:6** Heb: Baka

- <sup>2</sup> napo'o ty tahi'ondati'oo  
 Fonga nakopo'o o hakeo' iareoo; Selà  
<sup>3</sup> nasita'o iaby ty fifombo'o;  
 niambohoa'o ty fiforoforoan-kaviñera'o.  
<sup>4</sup> Ampolio zahay ry Andrianañaharem-  
 pandrombahañ' anay,  
 vaho apoho ty helo'o ama'ay.  
<sup>5</sup> Ho viñera'o nainai'e hao zahay?  
 Hampitoie'o an-tariratse kitro  
 añ'afe'e hao, o helok'añ'arof'o'o?  
<sup>6</sup> Tsy ihe hao ty hameloñe anay indraike,  
 hirebeha' ondati'oo?  
<sup>7</sup> Atorò anay ty fiferenaiña'o,  
 ry IEHOVÀ,  
 toloro o fandrombaha'oo.  
<sup>8</sup> Ho tsendreñeko ty ho tsarae' IEHOVÀ  
 Andrianañahare;  
 fa fañanintsiñe ty taroñe'e am'  
 ondati'eo naho amo noro'eo;  
 le ee abey t'ie tsy hibalintoa mb'an-kadagolàñey.  
<sup>9</sup> Toe marine' o mañeveñe ama'eo  
 ty fandrombaha'e,  
 hitobea' o enge'eo an-tanen-tikañ' ao.  
<sup>10</sup> Mifañaoñe ty fiferenaiñañe  
 naho ty hatò;  
 mifañondroke ty havantañañe  
 naho ty filongoañe.  
<sup>11</sup> Mivoañe hirik'an-tane ao ty hatò,  
 mijilo hirik'an-dikerañe aña  
 o havantañañeo.  
<sup>12</sup> Eka, hanjotso ty soa t'IEHOVÀ,  
 vaho hañomey ty voka'e ty tane'ay toy.  
<sup>13</sup> Hiaolo Aze ty havañonañe,



hañajaria'e lalañe ho liam-pandia'e.

## 86

*Halali' i Davide* <sup>1</sup> Atokilaño ty ravembia'ò  
ry IEHOVÀ, le toiño raho,  
fa rarake naho misotry.

<sup>2</sup> Ambeno ty fiaiko, fa mañorike Hake,  
Ihe ry Andrianañahareko, rombaho  
o mpitoro'ò mipalitse ama'oo.

<sup>3</sup> Tretrezo raho, ry Talè,  
zaho mitoreo lomoñandro.

<sup>4</sup> Ampifaleo ty fiaim-pitoro'ò,  
fa Ihe, ry Talè, ro añonjonako troke.

<sup>5</sup> Amy te Ihe, ry Talè, ro soa,  
nahò veka'e hañaha hakeo,  
vaho lifotse fiferenaiñañe  
ho amo mikanjy Azo iabio.

<sup>6</sup> Toloro ravembia, ry IEHOVÀ, i halalikoy,  
vaho haoño ty feom-pisolohoako.

<sup>7</sup> Hikanjiako ami'ty androm-pañemberañ' ahiko,  
amy te hanoiñe ahy rehe.

<sup>8</sup> tsy eo ty fanalolahy hambañ'ama'ò ry Talè;  
vaho tsy eo ty fitoloñañe  
manahake o Azoo.

<sup>9</sup> Ze kila ondaty nitsenè'ò,  
ro hamb' ama'ò mb'eo hitalaho,  
ry Talè, hibango ty tahina'ò.

<sup>10</sup> Jabahinake 'n-Iheo,  
mpanao raha tsitantane;  
Ihe avao ro Andrianañahare.

<sup>11</sup> Anaro ahy i lala'oy, ry IEHOVÀ,  
hitsontihako ami'ty hatò'ò;  
anò tro-tokan-draho hañeveñako

i tahina'oy.

<sup>12</sup> Hañandriañe Azo raho, ry Talè  
Andrianañahareko, an-kaliforan' troke,  
vaho ho bangoeko nainai'e ty tahina'o.

<sup>13</sup> Hinakinake ty hafatram-pikokoa'o amako,  
naho navotso'o ami'ty  
halalen-tsikeokeok' ao ty fiaiko.

<sup>14</sup> O Andrianañahare, fa mitroatse  
amako o mpirengevokeo;  
vaho mipay hañe-doza amako  
o lo-tsereke miotrañeo,  
ie tsy nampijadoñ' azo aolo' ty maso' iareo.

<sup>15</sup> Fa Ihe, Talè, ro Andrianañahare  
bey tretrè naho hasoa,  
malaon-kaviñerañe,  
vaho lifo-piferenaiñañe naho ty hatò.

<sup>16</sup> Mitoliha amako, le matariha,  
ehe, andivao amo mpitoro'oo ty haozara'oo  
vaho rombaho ty anak'am-pata'o.

<sup>17</sup> Ehe, anoloro vilon-tsoa,  
hahaisaha' o malaiñe ahikoo hisalara'e,  
amy te Ihe, ry IEHOVÀ, ro nañimba ahy  
vaho nañohò ahy.

## 87

*Sabo' o Ana' i Korao, Arahen-titike* <sup>1</sup> Amo  
vohitse miavakeo o faha'eo;

<sup>2</sup> Kokoa' IEHOVÀ mandikoatse ze hene  
kiboho' Iakobe o lalam-bein-Tsiôneo.

<sup>3</sup> Raha fanjaka ty saontsieñe ty ama'o,  
ry rovan'Añahareo : Selà

4 Ho talilieko i \*Rahabe naho i Bavele o mahafo-  
 hiñe Ahikoo;  
 heheke ty Pilstý, naho i Tsore,  
 miharo amy Kose;  
 Nisamak' aña ty raike toy.  
 5 Fe ho volañeña ty hoe e Tsiône ao :  
 Intoy naho intia ro toly ama'e ao,  
 i Andindimoneñey  
 ty mañoreñ' aze.  
 6 Hañiake t'IEHOVÀ,  
 ho volilie'e ondatio:  
 Nisamak' ao toy. Selà  
 7 Aa le hanao ty hoe o misaboo  
 naho o mitsolio,  
 hene ama'o o fandoparakoo.

## 88

*Sabo' o ana' i Kora, Ho a i Talè, titiheña ami'ty  
 feo: Ty Hasotria' o Hasilofañeo. Fanoroa' i He-  
 mane nte-Ezrà. <sup>1</sup> Ry IEHOVÀ, Andrianañaharem-  
 pandrombahaña ahiko,  
 itoreovako handro an-kaleña  
 añatrefa'o,  
<sup>2</sup> Ehe te hiatrek' azo ty halaliko;  
 atokilaño mb'amy fikaihakoy ty ravembia'o;  
<sup>3</sup> Fa losotse ty hasosoram-piaiko,  
 vaho manòto-kibory\* ty haveloko.  
<sup>4</sup> Volilieña amo migodoña  
 mb'an-davak' ao raho;  
 hoe ondaty nipitso-pañimba.  
<sup>5</sup> Mihoriña amo vilasio raho,*

\* 87:4 Mitsraime zay      \* 88:3 Seoly : tsikeokeoke

manahake o vinono mitsalalampatse  
 an-kiborio,  
 o tsy tiahi'o kañeo,  
 o naito am-pità'oo.

<sup>6</sup> Navotra'o ami'ty loho herakerak' ao  
 an-toe'e mimoromoroñe an-dalek' ao.

<sup>7</sup> Napok' amako o fifombo'oo, naho naniloke ahy  
 o kinaera'oo. Selà

<sup>8</sup> Fa naveve'o lavitse ahy o rañekoo,  
 nampirihie'o ahiko.

migoboñe atoan-draho tsy mahafiakatse;

<sup>9</sup> Mitike amy hasotriakoy o masokoo.  
 fa nikanjiekoo boak'andro, ry IEHOVÀ;  
 fa namelarako tañañe.

<sup>10</sup> Hanoa'o raha tsitantane hao o loloo?  
 Hitroatse hañandriañ' Azo  
 hao o angatseo? Selà

<sup>11</sup> Ho talilieñe an-donak' ao hao  
 ty fiferenaiña'o?

an-tsikeokeok' ao hao  
 ty figahiña'o?

<sup>12</sup> Hampahafohineñe am-pimoromoroñañe ao  
 hao o halatsà'oo,

naho an-tanem-pandikofañe  
 ao hao ty havañona'o?

<sup>13</sup> Aa naho zaho, ihe ry IEHOVÀ ty itoreovako;  
 mifanalaka ama'o boak'andro  
 o halalikoo.

<sup>14</sup> Ry IEHOVÀ akore te farie'o ty fiaiko?  
 Ino ty añetaha'o laharañ' amako?

<sup>15</sup> Nalovilovy ho nikenkan-draho  
 ampara' ty nahajalahy ahiko,  
 fa nivavèko ty hetraketra'o,  
 vaho voretra.

<sup>16</sup> Fa nandipotse ahy  
 ty fifombo'o miforoforo;  
 vaho fa nañito ahy  
 ty firevendreveñañe ama'o.

<sup>17</sup> Niropak' amako lomoñandro hoe rano, le  
 nanaron-kohok' ahy.

<sup>18</sup> Toe nampihankàñe'o amako  
 ty mpikoko naho rañetse;  
 atehenako ty hamoromoroñañe.

## 89

*Fanoroa' i Etane nte-Ezrà* <sup>1</sup> Ho saboeko  
 nainai'e

ty fiferenaiña' IEHOVÀ,  
 hampahafohineko am-bava  
 ze hene tariratse mifandimbe  
 ty figahiña'o.

<sup>2</sup> Fa hoe raho: mioreñe nainai'e  
 ty fiferenaiñañe,  
 najado'o andindiñe ao ty figahiña'o.

<sup>3</sup> Nanoeko fañina amy jinobokoy,  
 nifanta amy Davide mpitorokoy:

<sup>4</sup> Hajadoko pak'añ'afeafe'e o tarira'oo,  
 naho hatroako amo hene tariratseo  
 ty fiambesam-panjakà'o. Selà

<sup>5</sup> Ho rengè' o likerañeo o halatsà'oo  
 ry IEHOVÀ, naho ty figahiña'o  
 am-pivori' o noro'oo.

<sup>6</sup> Fa ia an-dikerañe ao ty  
 mañirinkiriñe am' IEHOVÀ?  
 Ia amo ana' o manjofakeo ty  
 hambakambañe am' IEHOVÀ?

<sup>7</sup> I Andrianañahare

añeveña' ty fivori' o noro'eo;  
hene ilatsa' o miariseho' azeo.

<sup>8</sup> Ry IEHOVÀ Andrianañahare' i Màroy,  
ia ty mañirinkiriñe azo?

Ry IÀ maozatseo, ohoñe'ty figahiña'o.

<sup>9</sup> Fehe'o ty fitroña' o riakeo,  
ie mitroatse o alo'eo le ampipendreñe'o.

<sup>10</sup> Dinemodemo'o ty Rahabe  
manahake o vinonoo;  
binaibaim-pitàn-kaozara'o o rafelahi'oo.

<sup>11</sup> Azo o likerañeo, Azo ka ty tane toy;  
ty voatse toy naho ty halifora'e.

Ihe ro nañoreñe iareo.

<sup>12</sup> Ty avaratse naho ty atimo,  
songa nitsenè'o;  
rebehe' i Tadore naho i Kermone  
ty tahina'o.

<sup>13</sup> Maozatse ty sira'o, fatratse ty fità'o,  
mionjoñe ty fitàn-kavana'o.

<sup>14</sup> Ty havañonañe naho ty hatò  
ro fioreñam-piambesa'o;  
iatrefa' ty fiferenaiñañe  
naho ty havantañañe.

<sup>15</sup> Haha t'ondaty mahafohiñe  
i fipoñafam-peoy,  
Hañavelo ami'ty fireandreañ-  
dahara'o iereo, ry IEHOVÀ;

<sup>16</sup> I tahina'oy ty hitreña' iareo  
lomoñandro,  
ie onjoñe' ty havantaña'o.

<sup>17</sup> Ihe ro enge' ty haozara'iareo,  
mañonjoñe ty tsifa'ay ty fañosiha'o.

<sup>18</sup> A i IEHOVÀ ty fikalan-defo'ay,

a i Masi' Israeley ty Mpanjaka'ay

<sup>19</sup> Teo ty nitsarae'o añ'aroñañoñe  
amo noro'oo, ty hoe:

fa nìmbaeko i fanalolahiy;

fa nonjoneko ty jinoboñe am' ondatio,

<sup>20</sup> nitreako t'i Davide mpitoroko;

i norizako amy soliko miavakeiy.

<sup>21</sup> Ho gañe ama'e ty tañako,

hampaozatse aze ka ty sirako

<sup>22</sup> Tsy hamañahy aze o rafelahio,

tsy hampilovilovy aze i anan-karatiañey.

<sup>23</sup> Ho demoheko añatrefa'e

o rafelahi'eo,

vaho ho zevoñeko o malaiñ'azeo.

<sup>24</sup> Ho ama'e ty figahiñako naho

ty fiferenaiñako,

ty añarako ro fañonjonañe ty tsifa'e.

<sup>25</sup> Hasampeko amy riakey ka ty fità'e,

naho ty fitàn-kavana'e amo sakao.

<sup>26</sup> Ho kanjie'e ami'ty hoe: Ihe ro Raeko,

Andrianañahareko, vaho

ty lamilamim-pandrombahañe ahiko.

<sup>27</sup> Hanoeko tañoloñoñoñako re

ho talèm-panjaka' ty tane toy.

<sup>28</sup> Hambenako ami'ty fiferenaiñako nainai'e, le  
hijadoñe ama'e ty fañinako.

<sup>29</sup> Haoreko tsy ho modo nainai'e

o tarira'eo,

ho mira amo

andron-dikerañeo ty fiambesa'e.

<sup>30</sup> Aa naho zehare' o ana'eo i Entakoy

naho tsy mañavelo amo fepèkoo,

- 31 naho lilare' iareo o fañèkoo, vaho tsy mitañ' o  
fandiliakoo,
- 32 Le ho tiliheko an-kobaiñe ty fiolà' iareo,  
naho am-pòfoke o tahi' iereoo.
- 33 Fe tsy hasintako ama'e  
ty fiferenaiñako,  
vaho tsy hivalik' ami'ty figahiñako.
- 34 Tsy ho tivaeko i fañinakoy,  
ndra hañova ze naakan-tsoñiko.
- 35 Teo ty nifantàko ami'ty hamasiñako,  
—zaho tsy handañitse amy Davide—
- 36 Tsy ho modo nainai'e i tiri'ey,  
vaho manahake i masoandro aolokoy i fi-  
ambesa'ey;
- 37 hioreñe nainai'e re manahake i volañey,  
vaho higahiñe manahake  
i valolombelon-dikerañey. Selà
- 38 Fe sinoi'o aña raho, nifarieñe,  
niviñera'o i noriza'oy.
- 39 Novohe'o ty fañina'o amy mpitoro'oy; niti-  
vae'o an-debok'ao ty sabakan-enge'e.
- 40 Fonga tinorotosi'o o kijoli'eo  
narotsa'o iaby o rova'eo.
- 41 Ikopaha' ze hene miary eo;  
Andrabbioña' o mifankarine ama'eo.
- 42 Naonjo'o ty tañan-kavana'  
o malaiñe azeo;  
nampirebehe'o o rafelahi'e iabio;
- 43 Mbore nafote'o i lelam-pibara'ey  
le tsy ampijohañe'o an-kotakotak' ao.
- 44 Najihe'o ty enge'e, naho  
navokovoko'o an-tane eo i fiambesa'ey.



- 45 Nitomore'o o andron-katora'eo, kinolopo'o  
hasalaran-dre. Selà
- 46 Pak'ombia ry IEHOVÀ?  
Hietake nainai'e v'iheo?  
Sikala ombia ty hiforoforoa'  
ty fifombo'o hoe afo?
- 47 Tiahio ty habori' o androko,oo,  
akore ty hakoahañe nitsenè'o  
ze kila ana' ondaty !
- 48 Ia t'indaty veloñe tsy ho liàn-kavilasy,  
ho haha'e ami'ty haozara'  
i kiboriy hao ty fia'i'e? Selà
- 49 Aia o fiferenaiña'o haehaeo, ry Talè,  
ze nifantà'o amy Davide ami'ty figahiña'o?
- 50 Tiahio ry Talè, ty fañivañivañe  
i mpitoro'oy,  
ie otroñeko añ'arañako ondaty maroo,
- 51 ie kinizakiza' o rafelahi'oo, ry IEHOVÀ,  
ie ninjè' iareo o lia' i noriza'oio;
- 52 Andriañeñe nainai'e t'IEHOVÀ.  
Ie zay, naho Amena.

## Fange Faha IV

*Sabo 90 - 106*

# 90

*Ty Filoloha' i Mosè, Ondatin' Añahare* <sup>1</sup> Ry  
Talè, Ihe ni-fimoneña'ay amo tarira'ay iabio.  
<sup>2</sup> Ie mboe tsy toly o vohitseo  
mboe tsy tsinene'o ty tane toy  
naho ty voatse toy,  
boak' an-kaehae hambo'e aña  
pak' an-kitro añ'afe'e aña,  
Ihe ro Andrianañahare.

<sup>3</sup> Ampolie' o mb' an-debok' ao ondatio  
ami' ty hoe:

Mimpolia ry ana' ondaty.

<sup>4</sup> Fa arivo taoñe am-pivazohoa' o ty andro raike  
toe hoe omale te nihelañe, ie  
manahake ty fiambenañe an-kaleñe.

<sup>5</sup> Sinao' o aña hoe an-tsorotombake iereo, le  
miròtse,  
f'ie marañe, le hoe ahetsse mipitsipitsike.

<sup>6</sup> Mioboñoño te maraindraña  
mbore mitombo,

ie hariva miheatse vaho miforejeje.

<sup>7</sup> Toe mongore' ty haviñera' o zahay,  
mampangebahebak' anay ty fifombo' o.

<sup>8</sup> Fa napo' o añatrefa' o o tahi' aio,  
am-pireandreaan-dahara' o eo  
o hakeo' ay mietakeo.

<sup>9</sup> Fonga mihelaña ami' ty fifombo' o  
o andro' aio;

fa nagado' ay hoe fiselekaiñaña o tao' aio.

<sup>10</sup> Ty andro' o tao' aio le fitompolo taoñe;  
mete ho valo-polo, t'ie maozatse;

fe hamokoraña naho  
fangoakoahaña avao ty enge' e,  
migadoña aniany, vaho mitiliñ' aña.

<sup>11</sup> Ia ty mahafohiña ty haozara'  
o haviñera' oo?

naho ty fañeveñaña mañeva Azo  
ty ami' ty fifombo' o?

<sup>12</sup> Aa le anaro zahay hañiake o andro' aio,  
hahazoa' ay arofo mahihitse.

<sup>13</sup> Mimpolia ry IEHOVÀ ! Ombia?  
iferenaiño o mpitoro' oo

14 Eneño an-kafatraram-pikokoa' o  
te maraindray zahay,  
hirebeha' ay naho hifalea' ay amo  
hene andro' aio.

15 Ampifaleo mira amo andro  
nampisotria' o anaio,  
naho amo taoñe nahaisaha' ay haratiaño.

16 Fa halange amo mpitoro' oo  
o fitoloña' oo,  
naho ty enge' o amo ana' iareoo.

17 Ho aman-tika ty fañisoha' i Talè Andri-  
anañahare' ay;  
ajadoño ty tolom-pità' ay;  
eka aoreño o satam-pità' aio.

## 91

1 I mpimoneñe am-pipalira'  
i Andindimoneñey,  
ty hitoetse añ' alo' i El-Sadai ao,

2 Hanoako ty hoe t' IEHOVÀ:  
Ty fiampirako, ty rova fitsolohako,  
i Andrianañahare fiatoakoy.

3 Ie ty mpañaha azo boak'  
am-bitsom-pamandri-boroñe ao,  
naho boak' amy biloka mahahomakey.

4 Haholonkolo' e am-bolon-ela' e ao rehe,  
ambane' o ela' eo ty hipalira' o;  
fikalan-defo naho fikala-meso  
ty hatò' e.

5 Tsy hahahembañ' azo  
ty hetraketrak' an-kaleñe,  
ndra ty ana-pale mihiririñe  
an-tariñandroke.

<sup>6</sup> Ndra ty kiria mitingaÑe añ'ieÑe ao  
ndra ty angorosy mamotsake  
naho antoandro.

<sup>7</sup> Arivo ty mete hikorovok' añ' ila'o eo,  
le rai-ale ty am-pitàn-kavana'o eo,  
f'ie tsy hitotok' azo.

<sup>8</sup> O fihaino'oo avao ro hisamba,  
hahaisake ty fandilovaÑe o lo-tserekeo.

<sup>9</sup> Amy te IEHOVÀ, fitsolohako,  
i AndindimoneÑey,  
ty nanoe'o fimoneñaÑe,

<sup>10</sup> Tsy hidoiÑe ama'o ty hankàÑe,  
tsy hitotofan-angorosy ty akiba'o,

<sup>11</sup> Fa hafanto'e ama'o o anjeli'eo,  
hañambeÑe azo amo lia'o iabio;

<sup>12</sup> hañotrotroa'e am-pità'e ao,  
tsy mone hadasi'o ami'ty vato ty fandia'o.

<sup>13</sup> Ho lià'o ty liona naho ty fandrefeala;  
ho hitsakitsahe'o ambanem-pandia'o eo  
ty liona-tora'e naho i mereÑey.

<sup>14</sup> Kanao ifahara'e koko, ho hahako,  
havotrako an-kaboañe ey  
amy te fohi'e ty añarako.

<sup>15</sup> Ho kanjie'e, le ho toiÑeko;  
hindrezako te am-poheke,  
ho votsorako vaho ho tolorako asiÑe.

<sup>16</sup> HeneÑeko halava' havelon-dre;  
vaho hampahaoniÑeko aze  
ty fandrombahako.

## 92

*Sabo. Ho titiheÑe ami'ty Sabotse* <sup>1</sup> Soa ty  
mañandriaÑe IEHOVÀ,

ty misabo vaho mibango  
 o tahina'oo ry Andindimoneñey,  
<sup>2</sup> ty hitalily ty fiferenaiña'o  
 boa'maraiñe;  
 naho ty figahiña'o an-kaleñe,  
<sup>3</sup> ami'ty marovany folo-taly,  
 naho ami'ty mandalina,  
 vaho ami'ty fandrivotam-peon-jejo-bory.  
<sup>4</sup> Amy te Ihe ry IEHOVÀ ro mahaehak' ahy amo  
 fitoloña'oo,  
 irebehako o tolom-pità'oo.  
<sup>5</sup> Akore ty hajabahina' o tolon-draha'oo  
 ry IEHOVÀ,  
 toe miheotse o fivetsetse'oo !  
<sup>6</sup> Tsy aman-kilala t'indaty mineñe,  
 tsy maharendreke zao ty dagola:  
<sup>7</sup> t'ie mitiry hoe ahetsse o lo-tserekeo,  
 naho fonga miraorao o tsy vokatseo,  
 f'ie hafàtse ho rotsaheñe kitro katroke.  
<sup>8</sup> Fa Ihe ry IEHOVÀ ro an-digiligy eñe  
 nainai'e donia.  
<sup>9</sup> Heheke o rafelahi'oo ry IEHOVÀ;  
 Ingo te hikoromake o malaiñ' Azoo;  
 Fonga hibaibay ze mpanao raty.  
<sup>10</sup> Fa naonjo'o ty tsifako  
 manahake ty an-drimo,  
 fa hinosotse solike vao raho.  
<sup>11</sup> Le hahatrea ty fisalalako  
 amo rafelahikoo' o masokoo  
 vaho ho tsanoñen-tsofiko  
 ty fañiriako amo tsereheñe  
 mivoalatse amakoo.  
<sup>12</sup> Handrevake hoe satrañe o vantaño,  
 manahake ty fitiria' o akao

e Libanoneo ty hitomboá'e;  
<sup>13</sup> Tinongy añ'anjomba' IEHOVÀ ao,  
 hitroñe an'kiririsan'Añahare eo.  
<sup>14</sup> Mbe hiregorego iereo te antetse,  
 ho lifo-dranoke naho hirimboñe,  
<sup>15</sup> hitaroñe te vañoñe t'IEHOVÀ,  
 lamilamiko, tsy ama'e ty tsy to.

## 93

<sup>1</sup> Hifehe t'IEHOVÀ, hisikim-bolonahetse, hisaron-  
 kaozarañe t'IEHOVÀ, toe hidiañe,  
 Eka, mioreñe ty voatse toy, tsy hasitse.  
<sup>2</sup> Fa norizañe haehae i fiambesa'oy,  
 boake tsietoimonek' aña 'n-lheo.  
<sup>3</sup> Fa mionjoñe o afo-ranoo, ry IEHOVÀ,  
 nipoña-peo o sorotombaha'eo;  
 mañonjoñe ty fitroña'e i fiepoepoañey.  
<sup>4</sup> Ambone' ty fitroña' o alon-driakeo,  
 naho o kinerake jabajaba an-driakeo  
 ty hara'elahi' IEHOVÀ an-digiligy eñe.  
<sup>5</sup> Toe niventeñe o taro'oo;  
 mañeva havaheñe nainai'e  
 ty anjomba'o, ry IEHOVÀ,

## 94

<sup>1</sup> O ry IEHOVÀ,  
 Andrianañahare mpamale-fate,  
 ry Andrianañahare, mpañome-to:  
 mireandreaña.  
<sup>2</sup> Miongaha, ry Mpizaka' ty tane toio;  
 lilovo ami'ty fañeva'e o mpirengevokeo.  
<sup>3</sup> Sikal' ombia o lo-tserekeo, ry IEHOVÀ :  
 pak'ombia ty mbe hitreña' o tsivokatseo?  
<sup>4</sup> Mifatatiake, manotratsotrake;

mijiajia iaby o mpanao ratio.

<sup>5</sup> Demohe' iereo ondati'oo ry IEHOVÀ,  
volevole' iereo ty lova'o.

<sup>6</sup> Vonoe' iereo ty vantotse  
naho ty renetane,

naho mañoho-doza amo bode-raeo;

<sup>7</sup> vaho manao ti-hoe: Tsy vazoho' IÀ;  
tsy mañaõne t'i Andrianañahare' Iakobe.

<sup>8</sup> Mañaraharà ry borololo am' ondatio;  
naho o dagolao, ombia t'ie hahafohiñe?

<sup>9</sup> Tsy mahajanjiñe hao i nambole o ravembiaoy?  
Tsy mahavazoho hao i Mpitsene fihainoy?

<sup>10</sup> Tsy hanoro hao i Mpandilo o fifeheañeo?  
ie mañòke hilala am' ondatio.

<sup>11</sup> Arofoana' IEHOVÀ  
ty fitsakorea' ondaty;  
t'ie kofòke avao.

<sup>12</sup> Haha t'indaty lilove'o ry Ià,  
naho i anara'o amy Tsara'oy;

<sup>13</sup> homea'o fitofañe an-tsan-kasotriañe,  
ampara' te nihaliañe koboñe  
o lo-tserekeo.

<sup>14</sup> Tsy ho farie' IEHOVÀ ondati'eo;  
tsy haforintse'e i lova'ey.

<sup>15</sup> Mbe himpoly ami'ty hahiti'e o zakao,  
le hene hañorik' aze o vañõñ' añ'arofoo.

<sup>16</sup> Ia ty hitroatse amo tsereheñeo ho ahy? Ia ty  
hijohañe amo mpanao ratio

ho amakoo?

<sup>17</sup> Naho tsy IEHOVÀ ty nañimb' ahy  
le ho nitobe am-pitsiñañe ty flaiko.

<sup>18</sup> Ie anoeko ty hoe :  
Midorasitse ty tomboko;  
le manozañ' ahy ty fiferenaiña'o

ry IEHOVÀ.

<sup>19</sup> Ie mañotrotro ty hamahimahin-troke, le mampanintsine ty fiaiko o fañohà'oo.

<sup>20</sup> Mete hiharo-rehak' ama'o hao ty fitobohan-katsivokarañe— ie mikitro-draha hatao'e fañe, <sup>21</sup> naho mi-rañadrañake hañe-doza ami'ty fai' o vañoño, vaho mañozoñe ty lio tsy aman-kila.

<sup>22</sup> Fe haboam-pitsolohako t'IEHOVÀ, vaho lamilamy fipalirako t'i Andrianañahareko.

<sup>23</sup> Nampolia'e ty hatsivokara' iareo, vaho ho mongora'e ty amo fikotriha'iareo; toe ihañitoa' IEHOVÀ Andrianañaharentika.

## 95

<sup>1</sup> Antao hisabo am' IEHOVÀ; Antao hipoña-peo amy lamilamim-pandrombahan-tikañey.

<sup>2</sup> Ntao hiatrek'Aze am-pañandriañañe, antao hirebek' ama'e an-tsabo.

<sup>3</sup> Andrianamboitse jabahinake t'IEHOVÀ, naho Mpanjaka ra'elahy ambone' ze fanalolahy iaby.

<sup>4</sup> Am-pità'e ao o hatsikeokeo' ty tane toio, Aze ka o lengom-bohitseo.

<sup>5</sup> Aze i riakey, ie ty namboatse aze, nitsenèm-pità'e i tane maikey.

<sup>6</sup> Mb'etoa, hiambane vaho hitalaho, antao hanongalek' añañtrefa' IEHOVÀ Mpitsene antikañe.



7 Amy te ie t'i Andrianañaharentikañe;  
 itika ro ondatim-piandraza'e,  
 naho ty lia-raim-pità'e;  
 Anito, naho janjiñe' areo i fiarañanaña'ey !  
 8 Ko mañagàñe arofo,  
 manahake te Meriba\* aña,  
 tañ'andro' i Masa† am-babangoañ' aña;  
 9 Ie nazizin-droae' areo,  
 naoveove'iareo ndra te nioni'iereo  
 o fitoloñakoo.  
 10 Efa-polo taoñe te nalaiñeko i tariratsey  
 le nanoeko ty hoe: foko miola an-troke,  
 fa tsy apota' iareo o satakoo;  
 11 Aa le nifanta ami'ty fifomboko:  
 Toe tsy himoaha'iareo ty fitofàko.

## 96

1 Misaboa sabo vao am' IEHOVÀ !  
 mitakasia am' IEHOVÀ, ty tane toy iaby.  
 2 Misaboa am' IEHOVÀ, bangò i tahina'ey;  
 taroño boak'andro i fandrombaha'ey.  
 3 Atalilio aivo' o fifeheaño ty enge'e,  
 o sata'e mahalatsao añaivo' ondaty iabio.  
 4 Amy te ra'elahy t'IEHOVÀ  
 vaho ho rengeña añ'abo;  
 revendreveñen-dre  
 te amy ze ndrahare iaby.  
 5 Fahasive o ndrahare' ondatio,  
 fa IEHOVÀ ro namboatse o likeraño.  
 6 Hasiña naho volonahetse ro aolo'e,  
 haozaraña naho hatsaratseake  
 ro añ'anjomba'e miavake ao.

\* 95:8 Meriba: fiody Avo. 17. 7: † 95:8 Massah: fitsohaña  
 Avo. 17. 7

<sup>7</sup> Manolora am' IEHOVÀ, ry foko' ondatio,  
toloro engeñe naho haozarañe t'IEHOVÀ.

<sup>8</sup> Atoloro am' IEHOVÀ  
ty enge mañeva i tahina'ey;  
mibanabanà, le miziliha an-kiririsa'e ao.

<sup>9</sup> Mitalahoa am' IEHOVÀ  
an-tsiki-miambake!  
mititititìha añatrefa'e eo, ty tane toy.

<sup>10</sup> Talilio amo fifeheaño ty hoe:

Mifehe t'IEHOVÀ;  
toe mioreñe ty voatse toy, tsy hasiotse,  
ho zakae'e mira ondatio.

<sup>11</sup> Le hifale o likeraño,  
hirebeke ty tane toy;  
hitroñe ami'ty halifora'e i riakey;

<sup>12</sup> Hitreñe i hivokey,  
naho ze he'e ama'e ao;  
fonga hisabo an-kaehake  
o hatae añ'alao,

<sup>13</sup> añatrefa' IEHOVÀ eo, fa ho totsake re,  
ho avy hizaka ty tane toy;  
ho zakae'e an-kahiti'e\* ty voatse toy  
vaho ondatio ami'ty figahiña'e

## 97

<sup>1</sup> Mifehe t'IEHOVÀ,  
hirebeke ty tane toy,  
hifale o tokonose maroo.

<sup>2</sup> Ie arikoboñen-drahoñe naho hamoro-  
moroñañe;  
havantañañe naho ty hatò ro ioreña'  
i fiambesa'ey.

---

\* **96:13** Sab 98:9, Top 17:31, Ben 19:11

- <sup>3</sup> Miaolo Aze ty afo, mamorototo  
o rafelahi'eo mb'etia mb'eroa.  
<sup>4</sup> Nihazavae' o hela'eo ty voatse toy;  
niisa' ty tane toy le nihondrahondra.  
<sup>5</sup> Nitranake hoe karafo o vohitseo  
ami'ty niatrefa' IEHOVÀ,  
añatrefa' i Talè' ty tane toy iaby.  
<sup>6</sup> Mitalily ty havantaña'e o likerañeo,  
vaho fonga mahaoniñe ty enge'e ondatio.  
<sup>7</sup> Hene salatse ze mitoron-tsare sokitse,  
o misenge raha kòakeo;  
miambanea ama'e ry ndrahare iabio!  
<sup>8</sup> Nahajanjiñe ty Tsiône le niehake,  
nirebeke o anak'ampela Iehodào,  
ty amo fizaka'oo ry IEHOVÀ.  
<sup>9</sup> Amy te Ihe, ry IEHOVÀ,  
ro Andindimone' ty tane toy;  
vaho onjoneñe andigiligi'  
ze hene ndrahare rehe.  
<sup>10</sup> Hejeo o haratiañeo ry mpikoko IEHOVÀ; am-  
bena'e ty fi'ai' o noro'eo,  
avotso'e an-taña' o lo-tserekeo.  
<sup>11</sup> Ararake ho a' o vantañeo ty hazavàñe,  
ho a' o mahity arofoo ty hafaleañe.  
<sup>12</sup> Mirebeha am' IEHOVÀ, ry vantañeo,  
vaho andriaño i tahina'e masiñey.

## 98

- Sabo* <sup>1</sup> Takasio sabo vao t'IEHOVÀ  
fa nahafonitse raha fanjaka;  
nahazoa'e fandrebahañe i fità'e havanay naho i  
sira'e masiñey.  
<sup>2</sup> Fa nampahafohine' IEHOVÀ

i fandrombaha'ey;  
 naboa'e ampahaisaha'  
 o kilakila 'ndatio ty havantaña'e.  
<sup>3</sup> Nitiahi'e ty fiferenaiña'e  
 naho ty figahiña'e amy anjomba' Israeley,  
 fonga nahaoniñe ty fandrombahan'  
 Andrianañaharentika ze olon-tane.  
<sup>4</sup> Mipoñafa am' IEHOVÀ, ry tane toy iaby,  
 Mirañorañoa an-drebeke,  
 eka mandrengea an-tsabo.  
<sup>5</sup> Sabò t'IEHOVÀ arahen-jejo-bory,  
 i jejo-boriy mañara-takasy;  
<sup>6</sup> Reke-trompetra naho fivolañ' antsiva—  
 mipozaha an-drebek' añañatrefa'  
 IEHOVÀ Mpanjaka.  
<sup>7</sup> Hitroñe ami'ty halifora'e i riakey,  
 ty voatse toy  
 vaho o mpimoneñe ama'eo.  
<sup>8</sup> Hitehateha-taña o sorotombakeo,  
 le hitrao-pisabo an-kaehake  
 o vohitseo,  
<sup>9</sup> añañatrefa' IEHOVÀ eo  
 fa hamb'eo re hizaka ty tane toy.  
 ho zakae'e an-kavantañañe  
 ty voatse toy,  
 naho an-kahiti'e ondatio.

## 99

<sup>1</sup> Mifehe t'IEHOVÀ,  
 hinevenevetse ondatio;  
 ie miambesatse añaño o kerobeo,  
 miozoñozoño ty tane toy.  
<sup>2</sup> Jabahinake e Tsiône ao t'IEHOVÀ;  
 andindimone' ze kila ondaty.

<sup>3</sup> Bangoe' iereo i tahina'o ra'elahy  
naho mampañeveñey, fa masiñe.

<sup>4</sup> Mpikoko hatò ty haozara' i mpanjakay  
—fa najado'o ty zaka-mira;  
fa nihenefe'o ty zaka  
naho ty havantañañe amy Iakobe ao.

<sup>5</sup> Onjono t'IEHOVÀ Andrianañaharentika;  
midrakadrakàfa am-pitongoàm-  
pandia'e eo; masin-dre.

<sup>6</sup> Mpiamo mpisoro'eo  
t'i Mosè naho i Aharone,  
mpitraok' amo mpikanjy  
i tahina'eio t'i Samoele,  
sindre nitoreo am' IEHOVÀ  
vaho nitoina'e.

<sup>7</sup> Nitsara'e hirik'amy rahoñe nijoalay;  
norihe' iereo o taro'eo  
naho i fañè natolo'e iareoy.

<sup>8</sup> Ry IEHOVÀ Andrianañahare'ay,  
natoi'o iareo,  
Andrianañahare nañaha ty hakeo' iareo,  
fe nililove'e o nanoe' iareoo.

<sup>9</sup> Onjono t'IEHOVÀ Andrianañaharentika  
vaho mitalahoa amy vohi'e miavakey,  
amy te masiñe t'IEHOVÀ  
Andrianañaharentika.

## 100

*Sabom-Pañandriañañe* <sup>1</sup> Mitreña am' IEHOVÀ  
ry tane bey toy!

<sup>2</sup> Toroño an-kafaleañe t'IEHOVÀ;  
miheova an-tsabo mb'añatrefa'e.

<sup>3</sup> Fohino te Andrianañahare t'IEHOVÀ ;  
Ie ty nanao antika, fa tsy itika,

aze tika, ondati'e naho lia-rai-piandraze'e.

<sup>4</sup> Iziliho o lalambei'eo  
am-pañandriañañe,  
an-kiririsa'e ao am-pandrengaña;  
andriaño, bangò ty tahina'e.

<sup>5</sup> Amy te soa t'IEHOVÀ;  
nainai'e ty fiferenaiña'e  
naho ty figahiña'e amo tariratse iabio.

## 101

*Sabo' i Davide* <sup>1</sup> Ho saboeko ty fiferenaiñañe  
naho ty fizakàn-to,

Ihe ry IEHOVÀ ro isaboako

<sup>2</sup> Hambenako ty lalan-kavañonañe;  
ombia rehe te hamb'amako?

Handenako an-kazavàn-troke an-trañoko ao.

<sup>3</sup> Tsy ampipohako raha tsy manjofake  
aolo' o masokoo.

hejeko ty sata' o mpiolao;

tsy hipitek' amako zay.

<sup>4</sup> Hitotse ahy ty tro mirioñe;

hamoeako ze atao raty.

<sup>5</sup> Ze mifosa ondatio, ie ty harotsako;

hejeko ty maso miengaña

naho ty troke mikoïboke.

<sup>6</sup> Amo migahiña an-tane atoio

o masokoo,

hiharoa' iareo fimoneñañe,

hitoroña ahy ty mañavelo an-kahiti'e.

<sup>7</sup> Tsy hitobok' an-trañoko ao

ty mitolom-pamañahiaña;

tsy ho tambatse aolo' o masokoo

ty mpivolam-bande.

<sup>8</sup> Ho zamaneko boa-maraindray  
o lo-tserek' amy taneio;  
haitoako ami'ty rova' IEHOVÀ  
o mpitolon-katsivokarañeo.

## 102

*Halali' ty mpisotry,* <sup>1</sup> ie andeme'e vaho man-  
doa toreo aman'Añahare.

Ry IEHOVÀ, janjiño ty halaliko;  
le ampomb'ama'o ty toreoko.

<sup>2</sup> Ko aeta'o amako ty lahara'o  
añ'andron-kaloviloviañe.  
atokilaño amako ty ravembia'o;  
malisà hanoiñe ahy  
ami'ty andro ikanjiako.

<sup>3</sup> Mihelañe hoe hatoeñe o androkoo;  
miforehetse hoe an-toñak' ao o taolakoo.

<sup>4</sup> Pinaoke hoe ahetsy ty troko  
vaho miheatse  
toe andikofako ty mitozin-kaneñe.

<sup>5</sup> Mipitek' an-taolako ao ty holiko  
ty ami'ty volam-piselekaiñako.

<sup>6</sup> Hoe tangongo am-patrañe aña raho,  
hoe vorondolon-dratraratra.

<sup>7</sup> Mandre an-tsareke raho;  
manahake ty tivoke miereñereñe  
an-tampènake ey.

<sup>8</sup> Mañinje ahy lomoñandro o rafelahikoo;  
mamàtsy ahiko o mpirengevok'amakoo,

<sup>9</sup> Fa nihaneko hoe ampemba ty lavenoke,  
vaho linaroko firovetse ty finomako,

<sup>10</sup> ty ami'ty haviñera'o naho ty fifombo'o,  
fa rinambe'o raho le nahifi'o aña.

- 11 Manahake ty fipononòran-talinjo  
o androkoo;  
vaho miheatse hoe boka raho.
- 12 Nainai'e eo rehe ry IEHOVÀ,  
ty Tahina'o an-tarirats' an-tariratse.
- 13 Hiongake rehe hitretre i Tsiône,  
fa tsatoke te hisohe'o,  
ie tondroke i nifantañañey.
- 14 No' o mpitoro'oo o vato'eo; mbore kokoa' iereo  
o lembo'eo.
- 15 Soa te hañeveña' o fifeheaño  
ty tahina' IEHOVÀ, naho  
ze hene mpanjaka' ty tane toy ty enge'o;
- 16 fa nitratrañahe' IEHOVÀ ty Tsiône  
ie niboak' amy enge'ey.
- 17 Nihaoñe'e ty halali' o poi'eo;  
vaho tsy niambohoa'e ty toreo' iareo
- 18 Ho patereñe ho a ty tarirats  
mandimbe,  
soa te handrenge Ià  
ondaty mboe tsy nanoeño\*:
- 19 Nivazohoe'e boak'an-toe'e masiñe ankaboañ'  
añe,  
nisary ty tane toy boak' an-dikerañe  
eñe t'IEHOVÀ,
- 20 hijanjiñe ty fiñoñoem-pirohy,  
hañaha o nafatse havetrakeo
- 21 soa te ho talilie' ondaty e Tsiône ao  
ty tahina' IEHOVÀ,  
naho ty enge'e e Ierosalaime ao,
- 22 ie mifanontoñe ondatio,  
naho o fifeheaño hitoroñe IEHOVÀ.
- 23 Nado'e deme'e raho añivon-dalañe eo;

---

\* 102:18 Sab 22:31



nitomore'e o androkoo.

<sup>24</sup> Hoe raho, Ry Andrianañahareko, ehe, ko  
ampisintahe'o  
añivo' o androkoo raho; mitakatse ze kila tari-  
ratse o tao'oo.

<sup>25</sup> Haehae rehe ro nañoreñe ty tane toy,  
satam-pità'o o likerañeo.

<sup>26</sup> Ho momoke iereo, fa nainai'e eo rehe;  
fonga hikoneatse hoe sikiñe hambo'e,  
ampilimbeze'o hoe sarimbo  
vaho ho vaoe'o iereo.

<sup>27</sup> Fe tsy mihotike rehe,  
tsy mbia higadoñe o tao'oo.

<sup>28</sup> Le lia'e ho eo o anam-pitoro'oo,  
le hijadoñe añatrefa'o eo o tiri'eo.

## 103

*Sabo' i Davide* <sup>1</sup> Andriaño t'IEHOVÀ, ry troko;  
naho ze hene amako;  
bangò ty tahina'e masiñe !

<sup>2</sup> Andriaño t'IEHOVÀ ry troko, le ko haliño o  
hasoa'e iabio.

<sup>3</sup> I mpañaha ze hene hakeo'oy, ie mpanaha ze  
atao arete'oy.

<sup>4</sup> I mijebañe ty fi'ai'o boak'an-koboñ'aoy,  
ie mañohò azo am-piferenaiñañe  
naho am-pitretrezañe,

<sup>5</sup> ie mahaeneñe ty havelo'o an-draha soa,  
naho vaoe'e hoe vantio ty hajalahi'o.

<sup>6</sup> Manao ty hahiti'e t'IEHOVÀ  
naho mitolon-kavantañañe  
amy ze hene volevolèn-draha.

<sup>7</sup> Nampahafohine'e amy Mosè o sata'eo

o tolon-draha'eo amo ana' Israeleo.

<sup>8</sup> Miferenaiñe naho mitretre t'IEHOVÀ,  
malaon-kaviñerañe,  
vaho enem-pikokoa-migahiñe.

<sup>9</sup> Tsy handilo nainai'e re,  
tsy hangazoña'e kitro katroke  
ty fifombo'e.

<sup>10</sup> Tsy nanoe'e mañeva o tahin-tikañeo,  
tsy nililove'e ty amo hakeo' tikañeo.

<sup>11</sup> Fa mira ami'ty haabo' i likerañey  
ami'ty tane toy,  
ty hajabajaba' ty fiferenaiña'e  
amo mañeveñ'ama'eo;

<sup>12</sup> Mira ami'ty halavi' i atiñanañey  
amy ahandrefañey,  
ty halavi' ty nampisitahe'e amantika o fiolàn-  
tikañeo.

<sup>13</sup> Hambañe ami'ty halèm-pon-drae  
amo ana'eo  
ty fitretreza' IEHOVÀ amo mañeveñe ama'eo,

<sup>14</sup> amy te arofoana'e ty vintan-tika;  
tiahi'e t'ie lemboke.

<sup>15</sup> Aa naho ondaty,  
hoe ahetse o andro'eo  
hoe voñe an-kivok' ao ty fandrevaha'e;

<sup>16</sup> ie iarian-tioke, le tsy eo ka,  
vaho tsy mahatiahy aze i toe'ey.

<sup>17</sup> Fe boake haehae tsy amam-pipotora'e aña,  
sikal'ami'ty tsy modo aña, ty fiferenaiña'  
IEHOVÀ amy ze mañeveñe ama'e,  
naho i havantaña'ey

amo ana' o anakeo—

<sup>18</sup> ho amy ze miambeñe i fañina'ey  
vaho mahatiahy o taro'eo hanoa'e.

19 Fa naore' IEHOVÀ  
an-dindiñe ao ty fiambesa'e,  
vaho mamehe ze he'e i fifehea'ey.

20 Andriaño t'IEHOVÀ, ry Anjeli'e, ra'elahy an-  
kaozarañe,  
mitoloñe amo tsarae'eo,  
mañañe ty fiarañanaña' o tsara'eo.

21 Andriaño t'IEHOVÀ,  
ry hene lahin-defo'eo,  
ry mpitoro'e mpanao  
o satrin' arofo'eo.

22 Andriaño t'IEHOVÀ, ry hene sata'e  
tok'aia tok'aia amy fifehea'eio.  
Andriaño t'IEHOVÀ, ry fiaiko.

## 104

1 Andriaño t'IEHOVÀ, ry troko;  
ry IEHOVÀ Andrianañahareko,  
jabahinake rehe,

asiñe naho volonahetse ro misaroñ' azo,  
2 ihemiholonkon-kazavañe hoe sarimbo;  
velare'o hoe tèmètse o likerañe.

3 Ampandrè'e an-drano ao o faham-batsa'eo,  
ano'e sarete'e o rahoñe,  
draidraite'e añ' ela' o tiokeo.

4 Anoe'e ira'e o tiokeo,  
mpitoro'e o afo mibelañe.

5 Naore'e amo faha'eo ty tane toy,  
soa tsy hasiotse nainai'e donia.

6 Siniki'o hoe saroñe i lalekey;  
nijohañe ambone' o vohitseo ty rano;

7 Nibioñe iereo te trinevo'o,  
nibororoñe mb'eo ami'ty fivolan' ampi'o;

8 Nionjoñe o vohitseo,

nilempotse o vavataneo,  
 mb'amo toetse tinendre'o ho a iareoo  
 9 Jinado'o efetse tsy hililara'e;  
 tsy mone hibalike hañampo ty tane toy.  
 10 Añirahe'e rano migoangoañe  
 o goledoño;  
 mikararak' añivo' o vohitseo;  
 11 ampinome' iereo rano  
 o bibin-kivoke iabio;  
 afa-karan-drano o borìke lìio.  
 12 Mimoneñe añ'olo' iereo eo  
 o voron-dikeraño;  
 mivolañe an-tsinga-katae ey.  
 13 Tondraha'e hirik'amo efe'e amboneo  
 o vohitseo;  
 mahaeneñe ty tane toy  
 o vokam-pitoloña'eo.  
 14 Ampitiria'e ahetsse o añombeo,  
 vaho añañe, vale' ty fitoloña' ondatio, hampaha-  
 vokare'e haneñe ty tane,  
 15 naho divay hampifale ty arofo' ondaty, naho  
 solike hañamendo ty lahara'e,  
 vaho mahakama hahavaño ty arofo'e.  
 16 Enen-drano o hatae' IEHOVÀo,  
 o \*mendorave' i Lebanone nambolè'eo,  
 17 ama'e ao ro anoa' o voroño traño;  
 naho ty fañaoke, anakao ty akiba'e.  
 18 Ho a o ose lì-o o vohitse aboo;  
 fiampiram-panaloke o tevaño.  
 19 Nanoe'e fifotoañañe i volañey; apota' i àndroy  
 ty toem-pitsofora'e.  
 20 Tinendre'o i ieñey,

---

\* **104:16** sedera: hatae mafe mandrevake

mivotrake te haleñe ty fitingatingaña' ze hene  
biby añ'ala ao.

21 Mitreñe, mitsatsa hena o liona tora'eo,  
mipay ty hane'e aman' Añahare.

22 Ie manjirike i àndroy, mipoliotse iereo vaho  
mandre an-dakato'e ao.

23 Miavotse mb'am-pitoloña'e mb'eo  
ondatio, ampara' te haleñe.

24 O ry IEHOVÀ, akore ty hamaro'  
o fitoloña'oo!

kila nanoe'o an-kihitse;

manitsike ty tane toy o vara'oo.

25 Indroke i riakey, jabajaba mihenehene,  
ifamorohotam-biby tsy hay iaheñe—  
ty kede naho ty bey.

26 Ama'e ty ionjonan-dakam-bey,  
naho i fañaneñe nitsenè'o hihisa aoy.

27 Songa mandiñ' Azo

hamahana'o haneñ' an-tsa'e.

28 Anjotsoa'o, le atonto' iereo,  
sokafe'o ty fità'o, vaho  
hene ànjan-draha soa.

29 Aeta'o ty lahara'o, le lonjetse iereo;  
sintone'o ty kofò'e, le mihomake  
mimpoly an-debok' ao.

30 Irahe'o t'i Arofo'o, mioreñe iereo,  
vaho vaoe'o ty tarehe' ty tane toy.

31 Tsy mb'ia ho modo ty enge' IEHOVÀ;  
ho rebehe' IEHOVÀ o fitoloña'eo,

32 Mampitititike ty tane toy te vazohoe'e,  
mahatoeñe o vohitseo te edrè'e.

33 Ho saboeko t'IEHOVÀ

kanao mbe velon-draho;

ho rengèko an-tsabo t'i Andrianañahare

katao mbe mahakofòke.

<sup>34</sup> Toe mamy t'ie itsakoreakoo,  
ifaleako t'IEHOVÀ.

<sup>35</sup> Ho mongoreñe an-tane atoy  
o mpanan-tahiño  
le tsy ho eo o lo-tserekeo.  
Andriaño t'IEHOVÀ, ry troko.  
Treño t'IÀ †.

## 105

<sup>1</sup> Andriaño t'IEHOVÀ,  
kanjio ty tahina'e;  
ampahafohino ondatio o fitoloña'eo.

<sup>2</sup> Isabò, rengeo an-tsabo;  
talilio o raha fanjaka nanoe'eo.

<sup>3</sup> Mitreña, amy tahina'e masiñey;  
ampirebehañ' añ'arifo' o mipay IEHOVÀo.

<sup>4</sup> Paiavo t'IEHOVÀ naho ty haozara'e;  
tsoeho nainai'e ty lahara'e.

<sup>5</sup> Tiahio o raha fanjaka nanoe'eo, o halatsaño,  
nahò  
o fizakam-palie'eo.

<sup>6</sup> Ry tarira' i Avrahame mpitoro'eo, ry ana'  
Iakobe jinobo'eo;

<sup>7</sup> Ie t'IEHOVÀ Andrianañaharentika;  
mahaatseke ty tane toy o fandilia'eo.

<sup>8</sup> Toe tiahi'e nainai'e i fañina'ey,  
i tsara linili'e pak'an-tarira'e fah'arivo'e,

<sup>9</sup> i nanoe'e amy Avrahamey,  
nahò i nifantà'e am' Ietsakey,

<sup>10</sup> vaho niventè'e am'Iakobe ho fañè,  
amy Israele ho fañina nainai'e:

---

† **104:35** HALÀ'IÀ: HALELOIA; ZE ATAO TY HOE TREÑO

11 ami'ty hoe : Hatoloko azo ty tane'  
Kanàne, ty anjara lova'o.

12 Ie ondaty mbe nitsiampeampe,  
toe nitsiampe, mbore nirenetane ama'e,

13 ie nitsatsà-tane mb'an-tane, boak'am-  
pifeheañe raïke  
sikal'am'ondaty ila'eo.

14 tsy nimetea'e ho lovilovie' ondatio;  
le trinevo'e o mpanjakao ty am' iereo:

15 Ko mitsipaoke o norizakoo;  
le ko joie' areo o mpitokikoo.

16 Le nikanjie'e san-kerè o taneo,  
fonga nifolahe'e o tahon-kaneño;

17 Nirahe'e t'indaty hiaolo iareo,  
Iosefe naletake ho ondevo.

18 Jinoi' iareo am-bahotse o fandia'eo,  
najo am-po viñe ao i sandri'ey,

19 ampara' ty andro nañenefañe  
i nitokia'ey,  
namente aze ty tsara' IEHOVÀ.

20 Nafanto' i mpanjakay le nabalake re,  
hinaha' ty mpifehe' ondatio,

21 Nanoe'e talèn' anjomba'e naho mpamandroñe  
o vara'eo,

22 nifehe o roandria'eo an-tsatri'e,  
nanoro hihitse amo androanavio.

23 Nimoake e Mitsraime ao ka t'Israele,  
nitaveañe an-tane' i Kame aña t'Iakobe.

24 Le nampanaranahe'e ondati'eo;  
vaho nampaizare'e  
ambone' o rafelahi'iareoo

25 Nampifotere'e ty arofo' iareo  
halaiña ondati'eo,

hikinia o mpitoro'eo.

<sup>26</sup> Nirahe'e t'i Mosè mpitoro'e,  
i Aharone jinobo'ey.

<sup>27</sup> Nanoe' iereo añivo' iareo eo  
o raha tsitantane'eo,  
nahalo halatsañe an-tane' i Kame ao.

<sup>28</sup> Nañitrifa'e ieñe,  
le nampimoromoroñe'e,  
vaho tsy niolà' iareo o tsara'eo.

<sup>29</sup> Novae'e ho lio ty rano' iareo,  
nahalo zinama'e o fia' iareoo.

<sup>30</sup> Nisamborian-tsahoñe ty tane' iareo,  
añ'efem-pandrea' o mpanjaka' iareoo.

<sup>31</sup> Nitsara re, le niropahen-daletse,  
nahalo nandrampañe ty tane' iareo  
ty haon-doha.

<sup>32</sup> Tinolo'e havandra hisolo orañe,  
nahalo afo nilebaleba an-tane' iareo.

<sup>33</sup> Finofo'e o vahe'eo nahalo o sakoa'eo,  
vaho tsineratsera'e o hatae an-tane'iareoo.

<sup>34</sup> Nisaontsie'e, le nimb'eo o betratrao,  
nahalo ty kijeja tsy fotofoto;

<sup>35</sup> hene navorembore' iereo ze naindoñe  
an-tane' iareo ao,  
fonga nabotseke ty vokan-tane' iareo.

<sup>36</sup> Nampivetrahe'e iaby ka  
o tañoloñoloñan-tane' iareoo,  
ze hene lengom-boan-kaozara'iareo.

<sup>37</sup> Le nakare'e reketse volafoty  
nahalo volamena t'Israele,  
leo raike tsy nitsikapy amo rofoko'eo.

<sup>38</sup> Nifale t'i Mitsraime t'ie niakatse,  
fa nivotraha' ty fihembañañe.

<sup>39</sup> Nandafiha'e rahoñe ho fialofañe,



naho afo ho fañazavàn-kaleñe.

<sup>40</sup> Nihalaly iereo le nanjotsoa'e  
hatrakatrake,  
nampieneña'e mahakaman-dikerañe.

<sup>41</sup> Sinoka'e i lamilamiy,  
le nidoandoañe ty rano  
nikararake an-dratraratra ao hoe saka.

<sup>42</sup> Fa nitiahi'e i tsara'e masiñe amy Avrahame  
mpitoro'ey.

<sup>43</sup> Le naaka'e am-pirebehañe ondati'eo,  
am-pazake o jinobo'eo;

<sup>44</sup> natolo'e ty tane' o kilakila ondatio,  
vaho rinambe' iareo ho lova  
o nimokora' ondatioo:

<sup>45</sup> soa t'ie hañambeñe o fañe'eo  
vaho hañorike i Tsara'ey.  
Treño t'IA !

## 106

<sup>1</sup> Treño t'IEHOVÀ;  
andriaño t'IEHOVÀ, amy te Ie ro soa;  
nainai'e ty fiferenaiña'e.

<sup>2</sup> Ia ty mahatalily o sata fanjaka'  
IEHOVÀo?  
ndra hahafitsey o enge'e iabio?

<sup>3</sup> Haha ze mahafiambeñe ty hatò,  
naho mitolom-panao ty fahiti'e.

<sup>4</sup> Tiahio raho, ry IEHOVÀ,  
naho isohe'o ondati'oo;  
itiliho amy fandrombaha'oy.

<sup>5</sup> Hahatreavako ty firaoraoa' o jinobo'oo,  
hirebeke ami'ty hafalea' i fifehea'oy,  
hitrao-pitreñañe amy lova'oy.

<sup>6</sup> Nindre nandilatse amo roae'aio zahay;

nanao hakeo, nitolon-karatiañe.

<sup>7</sup> Tsy nihaoñe' o rae'ay e Mitsraimeo

o halatsà'oo;

tsy nitiahi' iereo o fiferenaiña'o vokatseo,

te mone niola amy Abo Tiañe,

an-dRiake Mena\* aña.

<sup>8</sup> Fe rinomba'e ty amy tahina'ey, hampaharo-foana'e ty haozara'e.

<sup>9</sup> Trinevo'e i Riake Menay,

le nimaïke,

vaho niaoloa'e, nitoañe o lalekeo

hoe te fatram-bey.

<sup>10</sup> Le rinomba'e boak'an-taña'

i malaiñe iareoy,

naho jineba'e am-pità' i rafelahiy.

<sup>11</sup> Nopoe' i ranoy o rafelahi'eo; tsy nanisàñe honka'e.

<sup>12</sup> Aa le natokisa' iereo o tsara'eo, nisaboeñe ty enge'e.

<sup>13</sup> Fe nihaliño' iereo anianike o sata'eo

tsy nahaliñe o famerea'eo.

<sup>14</sup> Le niazo' ty hasiji-mena

an-jerezere tane aña;

nazizi' iereo am-babangoañe ao

t'i Andrianañahare.

<sup>15</sup> Aa le nitolora'e i nihalalie' iareoy,

fe nañiraha'e haborokàñe ty fia'i'iereo.

<sup>16</sup> Ie nitsikirike i Mosè an-tobe ao,

naho i Aharone navahe' IEHOVÀy,

<sup>17</sup> le nisokake i taney niteleñe i Datane;

naho nandembeke ty fehe' i Abirame.

<sup>18</sup> Nisolebare' ty afo añaivo' i rimboñey;

---

\* **106:7** Riake Mena: ndra: 'Riake Vondro' (and. 9 naho 22 ka)

niforototoe' i firebarebàñey o tsivokatseo.

<sup>19</sup> Nitsene bania e Korebe aña iereo,  
naho nilokoloko amy sare trinanakey;

<sup>20</sup> aa le natakalo' iereo sare bania  
mivazakota ahetsse, ty engen' Añahare.

<sup>21</sup> Nihaliño' iereo t'i Andrianañahare  
mpandrombake iereo,

I nanao raha fanjàka e Mitsraimey,

<sup>22</sup> raha tsitantane an-tane' i Kame  
vaho raha naharevendreveñe  
an-dRiake Mena aña.

<sup>23</sup> Aa le nanao ty hoe t'ie harotsa'e:  
naho tsy te nijohañe an-jebañe añatrefa'e eo  
t'i Mosè jinobo'e, nampivioñe  
i haviñera'ey tsy hanjamana'e.

<sup>24</sup> Niheje' iereo amy zao i tane nirieñey;  
tsy natokisaña o tsara'eo,

<sup>25</sup> f'ie niñoñoño an-kijà ao,  
tsy hinao' iereo ty fiarañanaña' IEHOVÀ.

<sup>26</sup> Aa le nifanta  
te hampikorofohe'e an-jerezere tane ao,

<sup>27</sup> naho havarakai'e amo fifeheaño  
ty tarira' iereo

vaho haparatsà'e amo taneo.

<sup>28</sup> Mbore nireketse amy Baale-Peore iereo  
vaho nampibotseke haneñe  
nisoroñañe an-dolo.

<sup>29</sup> Aa le nampiviñere' iereo  
amo fitoloña' iareoo,  
vaho natorotosi'e an-kiria.

<sup>30</sup> Niongak' amy zao t'i Pinekase  
le nijebaña,

vaho nisebañañe i angorosiy.

<sup>31</sup> Nivolilien-ko havañoñaña ama'e zay.

ho a ze hene tarira'e mifandimbeo.

<sup>32</sup> Nampiviñera' iareo ka

amo rano mpilie-drokoño,

le niazom-boiñe ty am'iereo t'i Mosè;

<sup>33</sup> amy t'ie nikai-jaka amy arofo'ey,

le kamaike ty niakatse am-pivimbi'e ao.

<sup>34</sup> Tsy nifongore' iareo ondatio,

amy nandilia' IEHOVÀ hanoeñey,

<sup>35</sup> Te mone nifañoño amo kilakila'ndatio

naho nizatse o sata'eo,

<sup>36</sup> naho nitoroño o saren-drahare'eo

ze nanjare fandrik' am' iereo,

<sup>37</sup> naho nasoro' iereo amo kokolampao

o anadahi'iareoo naho o anak'

ampela'iareoo,

<sup>38</sup> vaho nampiorike lio-maliñe,

ty lion' anadahy naho anak'ampela,

ie nasoro' iereo amo saren-drahare'

i Kanànao, vaho vinetan-dio i taney.

<sup>39</sup> Aa le nihativa am-pitoloñañe,

nañarapilo amo fisafiria'iareoo.

<sup>40</sup> Toly ndra niviañe am'ondatio

ty haviñera' IEHOVÀ,

vaho niheje'e i lova'ey.

<sup>41</sup> Natolo'e am-pità' o fifeheañeo iereo,

hifehea' o rafelahi'eo.

<sup>42</sup> Niforekeke'

o nifankalaiñe am'iereoo

le nareke ambane' fità'iareo.

<sup>43</sup> Beteke rinomba'e, f'ie nizehatse an-tsafiry,

vaho nilempotse an-kakeo.

<sup>44</sup> Ie nivazoho'e ty falovilovi' iereo,

naho jinanji'e o fitoreova' iareoo,

45 le nitiahi'e ty am' iereo i fañina'ey naho  
niselekaiñe, ty amo hene fiferenaiña'eo;

46 ie nampitretreze'e amo nanese  
iareo am-pandrohizaño.

47 Rombaho zahay ry IEHOVÀ  
Andrianañahare'ay,  
vaho atontono boak' amo fifeheaño,  
hañandriaña'ay ty tahina'o masiñe,  
vaho hitreñe amo enge'oo.

48 Andriañeñe t'IEHOVÀ,  
Andrianañahare' Israele,  
boak'an-kaehae'e pak'an-kaehae'e;  
vaho hene hiredoñe ami'ty hoe ondatio:  
Ie Zay, † Treño t'IÀ.

## Fange Faha V

*Sabo 107 - 150*

### 107

1 Andriañeñe t'IEHOVÀ,  
amy te Ie ro soa;  
nainai'e ty fiferenaiña'e.

2 Ano zay ry jineba' IEHOVÀ—  
ry nijebañe'e am-pitàn-drafelahy,

3 vaho hinoloholo'e hirik' amo taneo,  
boak'atiñanañe naho ahandrefañ' aña,  
boak' avaratse vaho hirik' amy riakey.

4 Nirererere ambabangoañ' aña iereo,  
an-dratraratra ao,  
tsy nahaonin-drova fimoneñañe.

5 Nisalikoeñe naho taliñiereñe,  
nitoirañe añ'ova ao ty fiaï' iereo.

6 Le nitoreo am' IEHOVÀ

---

† 106:48 Heb: Amena

an-kaloviloviañe  
 naho hinaha'e amo hasotria'iareo,  
<sup>7</sup> Nindese'e mb'an-dalam-bantam-beo  
 higodañe mb'an-drova fimoneñañe aña.  
<sup>8</sup> Handriañe' iereo t'IEHOVÀ  
 ty amy fiferenaiña'ey  
 naho o fitoloña'e fanjaka  
 amo ana'ondatioo,  
<sup>9</sup> fa nieneña'e ty fiañe taliñiereña,  
 nanjañe'e raha soa ty troke nilimpoa.  
<sup>10</sup> Teo ty nitozòke añ'ieña ao  
 naho an-talinjon-kavilasy ao,  
 rinohy an-kasotriañe naho v'y,  
<sup>11</sup> amy t'ie niody amo fepèn'Añahareo,  
 vaho nañovok' i famerea'  
 i Andindimoneñey.  
<sup>12</sup> Aa le nampibokohe'e ty arofo' iareo  
 am-pitromahaña,  
 nampidaleandaleaña  
 tsy amam-pañimba.  
<sup>13</sup> Le nitoreo am' IEHOVÀ  
 t'ie niankoheke,  
 le rinomba'e amo fikoretaña;  
<sup>14</sup> naaka'e boak' añ'ieña naho  
 an-talinjon-kavilasy ao,  
 vaho nipoñafe'e o silisilio.  
<sup>15</sup> Handriañe' iareo t'i IEHOVÀ  
 ty amy fiferenaiña'ey  
 naho o halatsaña nanoe'e  
 amo ana'ondatioo,  
<sup>16</sup> amy te pinaratsà'e  
 o lalam-bey torisikeo  
 naho pinozapoza'e o doda viña.  
<sup>17</sup> Nampisotriaña o seretseo

ty amo fiolà'eo, naho o tahi'eo.

<sup>18</sup> Nampangori' ty fi'ai' iareo

ze atao haneñe,

ie nitotoke o lalam-bein-kavilasio.

<sup>19</sup> Le nitoreo am' IEHOVÀ

t'ie niampoheke,

vaho rinomba'e amo haemberañeo.

<sup>20</sup> Nahitri'e i tsara'ey nahajangañe iareo

vaho navotso'e amy kiboriy.

<sup>21</sup> Andriañe' iareo t'IEHOVÀ

ty amy fiferenaiña'ey

naho o halatsañe fanoe'e

amo ana'ondatioo,

<sup>22</sup> Ee t'ie hibanabana sorom-

pañandriañañe

naho hitalily o fitoloña'eo an-drebeke;

<sup>23</sup> Ao ty mizotso mb'an-tsambo

an-driake ey;

o mpanao balibalik' an-drano mieneneo,

<sup>24</sup> Fa niisa' iareo o sata' IEHOVÀo,

o halatsañe fanoe'e an-dalekeo.

<sup>25</sup> Amy tsara'ey, nitroatse ty tio-bey,

nampitoabotse o alon-driakeo.

<sup>26</sup> Nionjomb'an-dindimb'eo iareo,

vaho nizotso mb'an-dalek' ao;

nitranak' ami'ty hekoheko'e ty fi'ai'iareo.

<sup>27</sup> Nivembeñe, nisiotsiotse hoe jike;

fonga nilesa ty hihi' iareo.

<sup>28</sup> Nitoreove' iareo t'IEHOVÀ

an-kasosorañe,

vaho natsoa'e an-kasotriañe.

<sup>29</sup> Nampipendreñe'e i tio-beiy,

le nitsiñe o onjan-driakeo.

<sup>30</sup> Niehake iareo te nibànatse,

vaho nitehafa'e mb'amy fipalirañe

nisalalaeñey.

<sup>31</sup> Handriañe' iereo t'IEHOVA  
ty amy fiferenaiña'ey, naho  
o halatsañe fanoe'e  
amo ana' ondatioo.

<sup>32</sup> Ee t'ie honjone' iereo  
am-pivori' ondatio  
vaho handrenge Aze ami'ty  
fiambesa' o androanavio.

<sup>33</sup> Afote'e ho ratraratra o sakao, naho ho tane  
kankañe o torahañeo;

<sup>34</sup> ho fatran-tsira ty tane kobokara,  
ty ami'ty tsihavokara'  
o mpitobok' ama'eo.

<sup>35</sup> Ampanginakinahe'e o tane mihedatseo, vaho  
ampanganahanae'e o kirikintañeo;

<sup>36</sup> hampitobea'e o limpoañeo,  
hañoreña'iareo rova fimoneñañe.

<sup>37</sup> Handrarake an-teteke ao iereo,  
nahambole tetem-bahe,  
vaho hanonton-tsabo vokatse;

<sup>38</sup> Tahie'e ka iereo hanaranaha'e maro,  
le tsy apo'e hiha-ritse o añombe'eo.

<sup>39</sup> Ie nitaketrake iereo,  
ninike ami'ty famorekekeañe,  
nahofanilofañe, vaho anahelo;

<sup>40</sup> ampidoaña'e inje o roandriañeo, ampirior-  
ioe'e am-bangý  
tsy aman-dalañe añe,

<sup>41</sup> toe aonjo'e ambone' o hasotriañeo  
i rarakey,  
vaho anoe hoe lia-raike o hasavereña'eo.

<sup>42</sup> Isa' o vantañeo zay le mifale,  
fonga mamim-bava ka ty hatsivokarañe.



43 Ia ty mahihitse, hiharaharà'e?  
ie ro mahafohiñe ty fiferenaiña' IEHOVÀ.

## 108

### *Onin-tSabo' i Davide, titiheñe*

<sup>1</sup> Migahiñe ty troko,  
ry Andrianañahare,  
hisaboako; handrengeako,  
eka, boak' añovako ao.

<sup>2</sup> Mibarakaoha ry valiha naho jejo-bory!  
hitsekafako ty manjirik' andro.

<sup>3</sup> Hañandriañe Azo raho ry IEHOVÀ,  
añivo' o fifeheañeo;  
ho rengeko an-tsabo aivo' ondatio.

<sup>4</sup> Amy te abo te amy likerañe eñey  
ty fiferenaiña'o;  
vaho mb'an-drahoñe ey ty figahiña'o.

<sup>5</sup> Mionjona! ry Andrianañahare, mb'andindin-  
dikerañe aña,  
naho ty enge'o mb' ambone' ty tane toy.

<sup>6</sup> Soa te hahàñe o kokoa'oo,  
rombaho am-pità'o havana,  
vaho toiño raho.

<sup>7</sup> Nitsara ami'ty hamasiña'e  
t'i Andrianañahare:  
Hitreñe raho, ho zaraeko ty Sekeme  
ho tsahareko ty vavatane' i Sokote.

<sup>8</sup> Ahy t'i Gilade, Ahiko t'i Menasè; naho fikalan-  
dohako t'i Efraime,  
vaho kobaiko t'Iehodà\*;

<sup>9</sup> Sajoa fisasàko t'i Moabe,  
apoko amy Edome ty hanaiko;

\* **108:8** Fot 49:10, Sab 60:7

ambone' i Pilistý ey ty hitreñako.

<sup>10</sup> Ia ty hinday ahy mb'amy  
rova fatratsey ao?

Ia ty hiaolo ahy mb' Edome mb'eo?

<sup>11</sup> Fa naforintse'o hao zahay,  
ry Andrianañahare?

Tsy hitraofe'o fionjoñe hao o lahin-defo'aio, ry  
Andrianañahare?

<sup>12</sup> Ehe oloro amo rafelahio,  
fa tsy vente'e ty fandrombaha' ondatio.

<sup>13</sup> Hampanjofak'anay t'i Andrianañahare,  
ie ty handialia o rafelahi'aio.

## 109

*Ho a i Talè, Sabo' i Davide* <sup>1</sup> Ry Andri-  
anañaharem-pandrengako, Ko mianjiñe,

<sup>2</sup> fa nasoka' iareo amako ty vava raty  
nahy ty vavam-pamañahiañe  
fa nifosa ahy an-dela mibodiake.

<sup>3</sup> Niarikoboña' iareo am-pivolam-palainañe;  
vaho nialy amako tsy am-poto'e.

<sup>4</sup> Manisý ahy iereo ho valem-pikokoako,  
zaho mpitalaho.

<sup>5</sup> Tinambe' iareo raty hasolo ty soa naho  
falainañe hasolo ty fikokoako.

<sup>6</sup> Tendreo ty lo-tsereke hifehe aze,  
ampijohaño am-pitàn-kavana'e  
ty mpañinje,

<sup>7</sup> ie zakaeñe, ampiboaho te voa,  
le hatao tahiñe i fisolohoa'ey.

<sup>8</sup> Ho tomoreñe o andro'eo,  
vaho ho tavaneñe i fitoloña'ey.

9 Le ho bode-rae o ana'eo vaho ho ramavoy ty vali'e.

10 Ho mpangatake miriorio o ana'eo; hipay ty lintse'iareo am-bangiñe aña.

11 Hifetreha' ty mpampisongo ze hene vara'e; naho ho volose' o ambahinio ty tolin-kamokora'e.

12 Ee t'ie tsy ho am-piferenaiñañe, naho leo raïke tsy hitretre o ana'e bode-raeo

13 Haitoña o tiri'eo, vaho ho faopaoheñe ami'ty tariratse handimbe ty añara' iareo.

14 Le ho tohineñe am' IEHOVA ty hakeon-drae'e; naho tsy ho faoheñe ami tahin-drene'e.

15 Ho aolo' IEHOVA nainai'e abey iereo, soa te hapitso'e an-tane atoy ty fitiahiañe iareo.

16 Amy te namoea'e ty hiferenaiña, te mone nampisoaña ondaty rarake naho poie'e, naho ty mioremeña, hañohofa'e loza.

17 Ie nimpitea onjitse, le nifotetse ama'e, nalain-tata re, le nihànkaña'e.

18 Nanaroña aze hoe sarimbo ty fañompà'e; nizilik' an-tro'e ao hoe rano, naho hoe solik' an-taola'e ao.

19 Ho ama'e manahake ty lamba iombea'e, naho hoe ty sadia fidiaña'e.

20 Zay ty paia' o malaiña ahio

hanoe' IEHOVÀ amako,  
o mañofoke ty fiaikoo.

<sup>21</sup> F'Ihe, ry IEHOVÀ Talè,  
ano amako sazò i tahina'oy;  
ami'ty hasoa ty fiferenaiña'o, ihahao,

<sup>22</sup> fa misotry naho rarake,  
nahò fere ty troko añ'ovako ao;

<sup>23</sup> zaho mimian-koe talinjo mitibake  
vaho nahifik' añe hoe valala.

<sup>24</sup> Mitrezontrezo ty ongoko fa mililitse;  
vaho boroka ty sandriko,  
tsy aman-tsolike.

<sup>25</sup> Ifosañe, te isa' iareo,  
le akofikofi'iareo loha.

<sup>26</sup> Imbao raho, ry IEHOVÀ  
Andrianañahareko; rombaho raho  
ty amy fiferenaiña'oy.

<sup>27</sup> Hahafohina' iareo t'ie i fità'oy,  
te Ihe ry IEHOVÀ, ro mitoloñe.

<sup>28</sup> Angao hamàtse iereo,  
f'ihe mitahia;  
ie mitroatse le ho salatse,  
fe ho fale ty mpitoro'o.

<sup>29</sup> Hampisikineñe hameñarañe  
o mpanesek' ahikoo,  
nahò hiholonkoñan-kasalarañe  
hoe sarimbo.

<sup>30</sup> Honjone' ty vavako fañandriañañe t'IEHOVÀ;  
ho renegeko añivo' i màroy.

<sup>31</sup> Amy t'ie mijohañe  
am-pitàn-kavana' ty poie'e,  
hañaha'e amo mpanisì' azeo.

## 110

*Sabo' i Davide* <sup>1</sup> Hoe t'IEHOVÀ amy Talèkoy:  
 Miambesara an-tañan-kavanako etoa,  
 ampara' te anoeko atimpahe'oo  
 o rafelahi'oo.  
<sup>2</sup> Hirahe' IEHOVÀ boak'e Tsiône ao  
 ty kobain-kaozara'o:  
 Mifehea añivon-drafelahi'o eo!  
<sup>3</sup> Hahimbañe ondati'oo amy andron-kaozara'oy,  
 ami'ty havolonahen-kamasiñañe;  
 boak'an-kovim-panjirik' andro ao;  
 ama'o ty zono-katora'o.  
<sup>4</sup> Nifanta t'IEHOVÀ, vaho tsy hilesa:  
 Mpisoroñe nainai'e rehe, ami'ty famosora' i  
 Melkizedeke.  
<sup>5</sup> I Tale am-pitàn-kavana'oy ty  
 handemoke mpanjaka  
 amy andron-kaviñera'ey.  
<sup>6</sup> Hizaka'e añivo' o fifeheañeo ré,  
 le ho lipore'e lolo ty ao,  
 ho hotohotoe'e an-tane mienene  
 ty loha maro.  
<sup>7</sup> Hikama rano an-torahañe  
 añ'olon-dalañe eo re,  
 vaho hampiandrae'e ty añ'ambone'e.

## 111

<sup>1</sup> ⚡ Treño t'IA !  
 andriañeko t'IEHOVÀ  
 an-kaliforan-troke  
 ☞ añivo' ty fivori' o vañoño, e,  
 naho amy valobohòkey.  
<sup>2</sup> ⚡ Jabahinake o tolon-draha' IEHOVÀo;  
 ☞ hene biribirie' o mifale ama'eo.

- 3 𐀀 Lifots' engeñe naho volonahetse  
 o sata'eo,  
 𐀁 nainai'e ty havantaña'e.  
 4 𐀂 Nanoe'e ho tiahy  
 o fitoloña'e tsitantaneo;  
 𐀃 matarike naho mpanolots'arofa  
 t'IEHOVÀ.  
 5 𐀄 Anjotsoa'e mahakama  
 o mañeveñe ama'eo;  
 𐀅 ho tiahi'e nainai'e i fañina'ey,  
 6 𐀆 Fa nabo'a'e am' ondati'eo  
 ty haozara' o fitoloña'eo,  
 𐀇 amy nanolora'e iareo  
 ty lova' o kilakila 'ndatoy.  
 7 𐀈 To naho mahity o satam-pità'eo; 𐀉 vantañe  
 iaby o fandilia'eo.  
 8 𐀊 Ie noriza'e tsy ho modo nainai'e donia,  
 𐀋 fa nanoeñe am-pigahiñañe  
 naho an-kavañonañe.  
 9 𐀌 Nihitrife'e fijeñañañe ondati'eo  
 𐀍 linili'e ho nainai'e i fañina'ey  
 𐀎 masiñe naho mampañeveñe ty tahina'e.  
 10 𐀏 Fifotoran-kihitse ty fañeveñañe am' IEHOVÀ;  
 𐀐 hene mahilala ze mañorike aze.  
 𐀑 mizoañe nainai'e ty fandrengeañe aze.

## 112

- 1 𐀒 Treño t'IA.  
 Haha t'indaty mañeveñe am' IEHOVÀ,  
 𐀓 mahafale aze o taro'eo.  
 2 𐀔 Hanjofak' an-tane atoy o tarira'eo;  
 𐀕 Ho soa-tata ty taminga' o vañoño.  
 3 𐀖 Vara naho hanañañe  
 ty añ'anjomba'e ao,

1 vaho nainai'e ty havantaña'e.  
 4 † Anjirihan-kazavañe añ'ieñe ao  
 ty vañoñe,  
 † matarike re, lifo-tretrè vaho vantaña.  
 5 † Tahie'e t'indaty matarike  
 naho mampindrañe,  
 † naho mandahatse o tolon-draha'eo an-kahiti'e;  
 6 † Le lia'e tsy hasiotse re;  
 † ho tiahy nainai'e o vañoñeo.  
 7 † Tsy hampitsonetvotse aze ty talily raty;  
 † migahiñe ty arofo'e,  
 IEHOVÀ ro fatokisa'e.  
 8 † Mioreñe ty arofo'e,  
 tsy ho hemban-dre  
 † ampara' te sambae'e o rafelahi'eo.  
 9 † Fa nandiva'e mbeombeo,  
 nanolora'e o rarakeo,  
 † nainai'e ty havantaña'e;  
 † haonjoñe an-kasiñe ty tsifa'e.  
 10 † Ho trea' ty tsivokatse,  
 le hitarik'aiñe,  
 † hivaza-kota vaho hitranake;  
 † ho mongotse ty fañiria' o lo-tserekeo.

## 113

1 Treño t'IA.  
 mandrengea, ry mpitoro' IEHOVÀ,  
 bangò ty tahina' IEHOVÀ.  
 2 onjoneñe ty tahina' IEHOVÀ,  
 henane zao naho nainai'e donia.  
 3 Boak' ami'ty fanjiriha' i àndroy  
 pak'ami'ty fitsofora'e,  
 le bangoañe ty tahina' IEHOVÀ.

<sup>4</sup> Andigiligi' ze hene fifeheañe t'IEHOVÀ,  
andindi' o likerañeo ty enge'e.

<sup>5</sup> Ia ty mañirinkiriñe IEHOVÀ  
Andrianañaharentika,  
Mpiambesatse an-dindiñe aña,

<sup>6</sup> Mibotreke re hivazohoa'e  
o likerañeo naho ty tane toy.

<sup>7</sup> Ampitroare'e boak' an-debok' ao  
o rarakeo vaho ongaha'e  
am-botren-ditsak' ao ty mpisotry,

<sup>8</sup> hampindreza'e fiambesatse  
amo roandriañeo,  
amo ana-dona' ondati'eo

<sup>9</sup> Ampitaiæ'e añ'anjomba'e ao  
ty betsiterake, hifalea'e te renen' anake. Treño  
t'IA !

## 114

<sup>1</sup> Ie niakatse e Mitsraime t'Israele,  
ty anjomba' Iakobe boak' am'ondaty  
hafa fisaontsio

<sup>2</sup> le nanoe'e toetse miavake t'Iehodà  
naho boriza'e t'Israele.

<sup>3</sup> Nañente i riakey, le nibioñe,  
nimpoly t'Iordane;

<sup>4</sup> Nitrekotreko hoe añondrilahy  
o vohitseo,  
hoe anak-añondry o tambohoo.

<sup>5</sup> Akore, ry riakeo te mibioñe?  
ry Iordane, te miesoñe?

<sup>6</sup> ry vohitseo, te mitsamboatsamboañe  
hoe añondrilahy,  
ry tamboho, hoe anak-añondry?

<sup>7</sup> Mihondrahondrà, ry tane toy,



añatrefa' i Talè,  
 aolo' i Andrianañahare' Iakobey,  
<sup>8</sup> ie nampañova ty vato ho sihanake, i lamilamiy  
 ho rano mifororoake.

## 115

<sup>1</sup> Tsy zahay ry IEHOVÀ,  
 tsy zahay fa i tahina'oy,  
 ro anolorañe engeñe,  
 ty amy fiferenaiña'o  
 naho ty figahiña'o.

<sup>2</sup> Ino ty atao' o kilakila 'ndatio ty hoe: Aia t'i  
 Andrianañahare' iareo?

<sup>3</sup> Andindiñe ao t'i Andrianañaharentika;  
 anoe'e iaby ze satrin' arofo'e.

<sup>4</sup> Volamena naho vola-foty ty fitalahoa' iareo,  
 satam-pità' ondaty.

<sup>5</sup> Amam-bava iereo, fe tsy mivolañe,  
 ama-maso, f'ie tsy mahatrea;

<sup>6</sup> aman-tsofy, f'ie tsy mahatsanoñe;  
 aman' oroñe, f'ie tsy mahaàntsoñe;

<sup>7</sup> aman-taña, f'ie tsy maharambe,  
 aman-tomboke, f'ie tsy mahalia;  
 tsy mahalefe fiñeoñoñañe o feo'eo.

<sup>8</sup> Ho hambañe ama'e ty mamboatse aze, Eka! ze  
 hene mpiato ama'e.

<sup>9</sup> Ry Israele, atokiso IEHOVÀ!  
 Ie ty mpañimba naho kalan-defo' iareo.

<sup>10</sup> Ry tarira' i Aharone, atokiso IEHOVÀ!  
 Ie ty mpañimba naho kalan-defo' iareo.

<sup>11</sup> Ry mañeveñe am' IEHOVÀ,  
 atokiso IEHOVÀ!  
 Ie ty mpañimba naho kalan-defo' iareo.

12 Fa nitiahi' IEHOVÀ tika, ho tahie'e;  
ho soae'e ty anjomba' Israele, ho soae'e ty  
anjomba' i Aharone,

13 ho tahie'e o mañeveñe am' IEHOVÀO,  
ndra ty kede ndra ty bey.

14 Hampivangongoe' IEHOVÀ nahareo,  
inahareo naho o tiri' areoo,

15 hampanintsiña' IEHOVÀ,  
Andrianamboatse i likerañey  
naho ty tane toy.

16 O andikerañeo!  
a IEHOVÀ o likerañeo,  
fe natolo'e amo ana' i Dameo  
ty tane toy.

17 Tsy mandrenge IÀ o vilasio,  
ndra ia ia mizotso mb'am-bangiñe ao;

18 Fe hañandriañe IÀ tika henane zao ho nainai'e  
nainai'e.

Treño t'IÀ !

## 116

1 Kokoako t'IEHOVÀ amy te janji'e  
ty feoko naho o halalikoo,

2 Amy te nanokilaña'e ravembia,  
le ho tokaveko Amy ze hene androko.

3 Nivandire' o talin-kavilasio raho,  
nazi' i tsikeokeokey;  
nizò fikoretañe naho anahelo.

4 Le nikanjiekoo ty tahina' IEHOVÀ:  
Ehe, r'IEHOVÀ, hahao ty fiaiko!

5 Matarike t'IEHOVÀ naho mahity;  
Eka, mpitretrè t'i Andrianañaharentika.

6 Arova' IEHOVÀ o trentaño,  
nizo havoretra raho fe rinomba'e.

7 Mimpolia mb'am-pitofà'o ao ry fiaiko,  
fa nampiraorao azo t'IEHOVÀ.

8 Fa navotso'o an-kavetrahañe ty fiaiko,  
tsy ho foy rano o masokoo, tsy hitsikapy o  
tombokoo,

9 t'ie hitsontik' añatrefa' IEHOVÀ,  
an-tanen-kaveloñe ao.

10 Nahatoky avao ndra te nataoko ty hoe: Mafe  
ty fisotriako.

11 Hoe raho te nianifañe:  
Fonga Remborake ondatio.

12 Akore ty hañavahako am' IEHOVÀ?  
ami'ty habein-kasoa'e amako?

13 Ho zonjoñeko  
ty fitovim-pandrombahañe  
vaho hikanjy ty tahina' IEHOVÀ.

14 Havahako o nifantàko am' IEHOVÀo,  
añatrefa' ondati'e iabio.

15 Sarotse am-pihaino' IEHOVÀ  
ty havilasi' o noro'eo.

16 Ry IEHOVÀ, toe mpitoro'o raho, fetrek'oro'o,  
ty anan' anak'ampata'o;  
fa nabala'o o rohikoo.

17 Hengaeko sorom-pañandriañañe,  
vaho ho kanjiekoo ty tahina' IEHOVÀ.

18 Hondrohako am' IEHOVÀ  
o nifantàkoo,  
Eka, añatrefa' ondati'e iabio.

19 An-kiririsan'anjomba' IEHOVÀ eo,  
añivo'o ao, ry Ierosalaime.

Treño t'IA!

## 117

1 Rengeo t'IEHOVÀ ry kilakila'ndatio,

onjono, ry hene ondatio.

<sup>2</sup> Amy te ra'elahy ty fiferenaiña'e antikañe,  
nainai'e donia ty hatò' IEHOVÀ.  
Treño t'IÀ.

## 118

<sup>1</sup> Andriaño t'IEHOVÀ amy te Ie ro soa!  
nainai'e ty fiferenaiña'e.

<sup>2</sup> Anò ty hoe ry Israele :  
nainai'e ty fiferenaiña'e.

<sup>3</sup> Anò ty hoe ry anjomba' i Aharoneo :  
nainai'e ty fiferenaiña'e.

<sup>4</sup> Anò ty hoe ry mpañeveñe am' IEHOVÀ :  
nainai'e ty fiferenaiña'e.

<sup>5</sup> Nalovilovy raho, le nitoreo am' IÀ;  
nanoiñe ahiko t'IÀ,  
le navotra'e an-gadagadañe eo.

<sup>6</sup> Amako t'IEHOVÀ, tsy ho hemban-draho,  
ino ty hanoa'ondatio?

<sup>7</sup> Amako t'IEHOVÀ, mpañolotse ahiko,  
le ho sambaeko o malaiñ' ahio.

<sup>8</sup> Hamake t'ie mipalitse am' IEHOVÀ,  
ta te misazok' am' ondatio.

<sup>9</sup> Kitra'e mitsolok' am' IEHOVÀ,  
ta te mirampy amo roandriaño.

<sup>10</sup> Hene miarikoboñe ahy o fifeheaño  
fe iatoako ty tahina' IEHOVÀ.

<sup>11</sup> Miarikatok' ahy iereo,  
eka, toe misambory amako,  
fe iatoko ty tahina' IEHOVÀ.

<sup>12</sup> Niropak' amako hoe rene-tantele iereo,  
f'ie hakipike hoe fatike mirehetse;  
toe iatoako ty tahina' IEHOVÀ.

13 Nanafasiotse ahy iereo\* hikorovohako,  
fe nañimb' ahy t'IEHOVÀ.

14 IEHOVÀ ro haozarako naho saboko,  
ie ro fandrombahañe† ahy henane zao.

15 Inao ty feom-pirebehañe naho  
fandrombahañe an-kivoho' o vañoño eo ao: mav-  
itrike ty fitoloñam-pitàn-kavana' IEHOVÀ.

16 Mizonjoñe ty fitàn-kavana' IEHOVÀ;  
mahimbañe ty fitàn-kavana' IEHOVÀ.

17 Tsy hikenkan-draho fa ho veloñe,  
hataliliko o sata' IEHOVÀo.

18 Nanilofe' Ià am-pandilovan-draho,  
fe tsy natolo'e an-kavilasy.

19 Sokafo ho ahy  
o lalam-bein-kavantañaño,  
hizilihako, hañandriañako IEHOVÀ.

20 Intoy ty lalam-bei' IEHOVÀ, hiziliha'o vañoño eo.

21 Andriañekoo amy te tinoi'o,  
fa Ihe ro fandrombahañe ahy.

22 I vato nado' o mpandrafitseoy le fa talèm-  
batolahy‡.

23 Sata' IEHOVÀ zay,  
le fiain-tane am-pihainon-tikañe.

24 Itoy ty andro tsinene' IEHOVÀ,  
antao hirebeke naho hifale ama'e.

25 Ry IEHOVÀ,  
Ehe, rombaho zahay henaneo!  
ry IEHOVÀ,  
Ehe, ampiraoraò henane zao!

---

\* **118:13** Heb: rehe † **118:14** Avo 15:2 ‡ **118:22** Heb:  
kalan-kotsoke, Top 4:11

- 26 Andriañeñe ty mitotsak' ami'ty tahina'  
 IEHOVÀ!§  
 mañandriañe azo zahay  
 boak'añ'anjomba'IEHOVÀ ao.
- 27 Andrianañahare t'IEHOVÀ,  
 Ie ty nanolotse hazavàñe amantika;  
 mireketa reke-tsampañe  
 amo mpamonje sabadidakeo\*, mivovotse  
 mb' an-tsifa' i kitreliy mb'eo.
- 28 Ihe ro Andrianañahareko,  
 le andriañekoo;  
 Andrianañahareko rehe, ho zonjoñeko.
- 29 Andriaño t'IEHOVÀ amy te ie ro soa!  
 nainai'e ty fiferenaiña'e.

## 119

### 1 § Alefe\*

- Haha o vantañe amy lia'eio,  
 o mañavelo amy Hà'IEHOVÀio.
- 2 Haha o miambeñe o taro'eo,  
 ty mitsoek' aze an-kaliforañ' arofo;
- 3 Tsy manao ty hatsivokarañe  
 t'ie manonjohy o lala'eo.
- 4 Fa najado'o o fepè'oo  
 hañorihan-tika an-joton-troke.
- 5 Hizoañe abey o liakoo,  
 hañambenako o fañè'oo !
- 6 Le tsy ho salaren-draho

---

§ 118:26 Mat 21:9, Jao 12:13, Its 18:18-20 \* 118:27 Sabadi-  
 da-Sokemitraha, 15 Saramañitse \* 119:1 Mifandime ami'ty  
 abody Hebreo, nalahatse kivalo sindre mifototse am-peo raike ty  
 valo. Alef: 'A' ami'ty abode Hebreo: Añombelaha

naho hotsohotsoeko iaby o fepè'oo,

<sup>7</sup> Handriañeko rehe an-kalio-troke,  
handrendreke o fizaka'o too.

<sup>8</sup> Hambenako o fañè'oo;  
ko farie'o zafe-anake.

### ↳ *Bete*<sup>†</sup>

<sup>9</sup> Akore ty hañaliova' ty ajalahy i lia'ey?  
hambena'e amo tsara'oo.

<sup>10</sup> Nitsoehoko rehe an-kaàmpon-troke;  
vontitiro raho tsy handifike o fepè'oo.

<sup>11</sup> Fa nahajako an-trok' ao o saontsi'oo  
tsy handilatse ama'o.

<sup>12</sup> Andriañen-dRehe, ry IEHOVÀ;  
anaro ahy o fañè'oo.

<sup>13</sup> Nitaroñe' o soñikoo  
ze hene fizakam-palie'o.

<sup>14</sup> Firebehako ty lala' o taro'oo hambañ' amy ze  
atao vara iaby.

<sup>15</sup> Ho tsatsiheko o fepè'oo, vaho ho biribirieko o  
lala'oo.

<sup>16</sup> Hifaleako‡ o fañè'oo,  
tsy handikofako o tsara'oo.

### ↳ *Gimele*<sup>§</sup>

<sup>17</sup> Matariha amy mpitoro'oy,  
hahaveloñ' ahy hañorike o tsara'oo.

<sup>18</sup> Sokafo o masokoo hahatrea raha fanjaka amy  
Tsara'oy.

<sup>19</sup> Mpitaveañe an-tane atoy raho;  
ko aeta'o amako o fandilia'oo.

<sup>20</sup> Demoke ty fiaiko

<sup>†</sup> **119:8** Bete: 'B' ami'ty Hebreo: anjomba, traño   ‡ **119:16** Sab  
119:24,35,47,70,77,92,143,174, Rom 7:22   § **119:16** Gimele: 'G'  
Hebreo; rameva, fandia

salalakeo lomoñandro o fizaka'oo.

<sup>21</sup> Trevohe'o o mpitrotroaboqueo—  
o fokompàtse mandridrike amo fetse'oo.

<sup>22</sup> Asitaho amako ty rabioñe

naho ty teratera,  
fa ambenako o taro'oo.

<sup>23</sup> Ndra te mitoboqe,  
mikabo-draha amako o roandriañeo,  
mininike o fañe'oo ty mpitoro'o.

<sup>24</sup> Eka, mahaehak' ahy o taro'oo;  
toe mpamere ahy.

### ⌈ *Dàlete* \*

<sup>25</sup> Mipitek' an-debok' ao ty fiaiko;  
ampisotrafo amo tsara'oo.

<sup>26</sup> Ie nataliliko o satakoo,  
le natoï'o, anaro ahy o fañe'oo.

<sup>27</sup> Ampaharendreho ahy  
ty lala' o fepè'oo,  
hitsakoreako o fitoloña'o fanjàkao.

<sup>28</sup> Mitronake am' anahelo ty fiaiko;  
ampahozaro amo tsara'oo.

<sup>29</sup> Ampisitaho amako  
ty lalan-dremborake;  
atorò ahy am-patarihañe o Tsara'oo.

<sup>30</sup> Fa jinoboko ty lalam-pigahiñañe,  
naho fa nalahako o fizakà'oo.

<sup>31</sup> Ie mipitek' amo taro'oo;

ry IEHOVÀ,  
ko anga'o ho salareñe.

<sup>32</sup> Hilaisako ty lala' o fandilia'oo, amy t'ie nani-  
bake ty troko.

---

\* **119:24** *Dalete*: 'D' Hebreo; lalan-traño



¶ *He*<sup>†</sup>

33 Anaro ahy, ry IEHOVÀ,  
ty lala' o fañè'oo;  
le horiheko pak' am-pigadoñako.

34 Omeo hilala raho,  
hañambenako o Tsara'oo,  
le horiheko an-kaliforan-troke.

35 Ampandiao ahy ty oloñolo'  
o fandilia'oo,  
amy t'ie mahafale ty troko.

36 Ampitokilaño amo fañè'oo ty troko  
tsy hitombo'a'e am-patitiañe.

37 Avioño o masokoo tsy hañente  
ty tsy vente'e;  
ampahimbaño amo lala'oo.

38 Henefo amy mpitoro'oy o saontsi'oo,  
ty amy fañeveñako ama'o.

39 Ahankaño aña ty ìnje'  
o mampangebahebak' ahikoo,  
amy te soa o fizakà'oo.

40 Hete ! salalaeko o fepè'oo!  
ihetsefo amo fahiti'oo.

¶ *Vav*<sup>‡</sup>

41 Ampombao amako ty fiferenaiña'o ry IEHOVÀ,  
ty fandrombaha'o ty amo saontsi'oo;

42 hahafitoiñako ty mañorohoro ahiko,  
fa iatoako o tsara'oo.

43 Ko sintone'o am-bavako  
ty tsara-to, fa salalaeko o nafè'oo,

44 Le hambenako lomoñandro o Tsara'oo, eka,  
nainai'e donia;

---

† 119:32 He: 'h' Hebreo: Heheke!; taña-mizonjo ‡ 119:40 Vav:  
'V' : Heb: kitro, fahaña

45 Hijelanjelañe am-pidadañe raho,  
amy te hotsohotsoeko o fepè'oo.

46 Ho talilieko añatrefam-panjaka  
o taro'oo le tsy ho salatse,

47 Hifaleako o fandilia'oo  
toe kokoako.

48 Zonjoñeko amo fandilia'oo o tañakoo,  
fa kokoako, vaho haereñereko o fañè'o.

### † ZèneS

49 Tiahio i nitsaraeñe amy mpitoro'oiy,  
amy t'ie nampitamae'o.

50 Zao ty mampanintsiñe ahy  
amo faloviloviakoo,  
te nahajangañe ahy o saontsi'oo.

51 Mitolom-piteratera ahy  
o mpirengevokeo,  
fe tsy mivik' amo Tsara'oo raho.

52 Tiahiko o fizakà'o haehaeo,  
ry IEHOVÀ, fa nahaeneñ' ahy.

53 Filoroloro-mena ty mamihine ahiko  
ty amo lo-tsereke  
mampipoke i Tsara'oio.

54 O fañè'oo ro fisaboako an-kialo fitaveañako.

55 Tiahiko ami'ty haleñe  
ty tahina'o ry IEHOVÀ,  
vaho oriheko o Tsara'oo.

56 Zao ty ahy  
te ambenako o fepè'oo.

### ▢ Khète\*

57 IEHOVÀ ro anjarako;

---

Š 119:48 Zaine: 'Z' : Heb: fialiañe, lasary \* 119:56 Khete:  
'Kh' : Heb: kijoly

fa nifanta t'ie hañorike o tsara'oo.

<sup>58</sup> Fa nipaiaiko an-kaampon-troke  
ty fañisoha'o; tretrezo raho  
ty amo nampitama'oo.

<sup>59</sup> Nitsakoreko o liakoo le nampitoliheko mb'amo  
taro'oo o tombokoo.

<sup>60</sup> Nalisa raho tsy nihenekeneke  
hañambeñe o fandilia'oo.

<sup>61</sup> Mamejañe ahiko ty hafo' o lo-tserekeo, fe tsy  
andikofako o Tsara'oo.

<sup>62</sup> Mitroatse antetsalen-draho  
hañandriañe Azo  
ty amo fizakà'o vantañeo.

<sup>63</sup> Ràñeko o mañeveñe ama'o iabio,  
nahò o mpañorike o fepè'oo.

<sup>64</sup> Lifotse ty fiferenaiña'o ty tane toy,  
ry IEHOVÀ; anaro ahy o fañè'oo.

### Tète†

<sup>65</sup> Fa nisoae'o ty mpitoro'o, ry IEHOVÀ,  
ty amo enta'oo.

<sup>66</sup> Anaro hilala nahò hihitse,  
amy te atokisako o fandilia'oo.

<sup>67</sup> Nandifike hey raho le nalovilovy,  
fe ifaharako o saontsi'oo henane zao.

<sup>68</sup> Soa rehe, mpanao ty soa;  
anaro ahy o fañé'oo.

<sup>69</sup> Mamoroñe vande amako  
o mpinefonefokeo,  
fe hene ahajako an-troke ao o fepè'oo.

<sup>70</sup> Vondrake hoe sabora ty tro' iareo,  
fe mahanembanembañ' ahiko o Tsara'oo.

<sup>71</sup> Nahasoa ahiko te nisilofeñe,  
hianarako o fañè'oo.

† **119:64** Tete: T tsotra, Heb : mereñe

72 Fanjaka amako ta ty volamena naho  
ty volafoty añ'arivo'e o Tsaram-palie'oo.

⋄ *Ieòde*‡

73 Namboatse naho nitsene ahy o fità'oo; toloro  
hilala hianarako  
o fandilia'oo.

74 Ho isa' o mañeveñe ama'oo raho le hifale, fa  
o tsara'oo ty fitamako.

75 Apotako ry IEHOVÀ,  
te vantañe o fizakà'oo,  
naho figahiñañe ty nanotria'o ahy.

76 Ehe ohò ami'ty fikokoa'o migahiñe,  
ty amy nafè'o amy mpitoro'oy.

77 Ampombao mb'amako ty fitretreza'o ha-  
haveloñ'ahy,  
fa ifaleako o Tsara'oo.

78 Salaro o mpiebotsebotseo,  
ie nañadroadro ahy tsy vente'e;  
fa ereñèreko o fepè'oo.

79 Ampimpolio amako o mañeveñe ama'oo,  
naho o mahafohiñe o taro'oo.

80 Hahity amo fañè'oo abey ty troko,  
tsy mone ho salareñe.

⋄ *KàfeS*

81 Ho mokoreko fiainè o fandrombaha'oo,  
ty amy fisalalàko o enta'oo.

82 Mampilesa o masokoo o saontsi'oo; anoako ty  
hoe:

Ombia ty añohoa'o ahy?

83 Ndra t'ie hoe gorogoron-divay an-katòeñe ao,  
tsy haliñoako o fañè'oo.

‡ 119:72 Yode: 'iè' Heb: fita mivokeñe S 119:80 Kaf: 'K ndra  
Kh' Heb: Lelam-pitañe

84 Fire ty andro' i mpitoro'oy?  
Ombia te ho zakae'o  
o mpanao samporerak' ahikoo?

85 Fa nihaly koboñe ho ahiko  
o mpitrotroaboqueo,  
o tsy mañañoñe o Tsara'oo.

86 Migahiñe iaby o fandilia'oo;  
ampisoañe' iereo am-pamañahiañe,  
imbao raho!

87 Didý tsy nifaohe'iareo an-tane atoy,  
fe zaho, tsy apoko o fepè'oo.

88 Hetsefo raho ami'ty fiferenaiña'o,  
hañorihako o tarom-palie'oo.

↳ *Làmede\**

89 Nainai'e, ry IEHOVÀ, ty fijadoña'  
o tsara'oo an-dindiñe ao;

90 Manitsike ze hene tariratse  
mifandimbe ty figahiña'o;  
kanao norize'o ty tane,  
mijadoñe zay.

91 O fizakà'oo ty ijohaña' iareo henaneo;  
kila mitoroñ' azo.

92 Naho tsy nahaehak'ahy o Tsara'oo  
le ho nihomak' amy hasotriakoy.

93 Tsy ho haliñoko ka o fepè'oo,  
fa iereo ro nanotrafa'o ahiko.

94 Kanao azo raho, rombaho;  
fa nitsikaraheko o fepè'oo.

95 Fa hañè-doza amako o lo-tserekeo,  
fe ho tsakorèko o taro'oo.

96 Nitreako te hene higadoñe ze atao safiry; fe  
toe milañelàñe o fandilia'oo.

\* 119:88 *Lamede*: 'L' Heb: Kobaiñe

‡ *Meme*†

97 Hirý! ty fikokoako o Tsara'oo‡!

Kinañeko lomoñadro.

98 Mampahihitse ahy ambone'

o rafelahikoo o fandilia'oo,

fa amako nainai'e.

99 Andikoareko an-kilala ze hene mpañok' ahy,

amy te ereñereko o taro'oo.

100 Milikoatse ty faharendreha' o taoloo ty ahiko,

amy te ambenako o fepè'oo.

101 Ampiholiareko amy ze lalan-draty iaby

o tombokoo;

hañorihako o tsara'oo.

102 Tsy nisitahako o fizakà'oo,

amy te Ihe ty mañòk' ahy.

103 Akore ty hamami' o saontsi'oo

an-dañilañiko ao,

lombolombo te ami'ty tantele

am-bavako ao!

104 O fepè'oo ro mampandrendrek' ahy,

fonga hejeko ze lalam-bilañe.

‡ *NòneS*

105 Failo amo tombokoo o tsara'oo,

naho hazavàñe añ'oloñoloko eo.

106 Fa nifanta raho vaho hajadoko

te hambenako o fizakà'o vantañeo.

107 Loho miatra-draha raho;

Ampisotraho amo tsara'oo

raho ry IEHOVÀ.

108 Iantofy ry IEHOVÀ

o banabanam-bavakoo,

† 119:96 Mem: 'M' Hebreo: rano ‡ 119:97 Toe Hake:  
a.113,119,127,163,165,167 S 119:104 None: 'N' Hebreo; fia,  
tabiry

vaho anaro ahy o fizakà'oo.

<sup>109</sup> An-tañako ao nainai'e ty fiaiko,  
fe tsy ho likofeko o Tsara'oo.

<sup>110</sup> Nampidreña-pandrike ho ahy  
o lo-tserekeo,  
fe tsy nivihako o fepè'oo.

<sup>111</sup> Linovako ho nainai'e o taro'oo,  
le irebeha' ty troko.

<sup>112</sup> Fa natokilako ty troko  
hañoriha'e nainai'e o fañè'oo,  
pak'am-pigadoña'e aña.

▢ *Sameke*\*

<sup>113</sup> Hejeko ty milolohe roe,  
fe kokoako o Tsara'oo.

<sup>114</sup> Ihe ro fipalirako naho kalan-defoko;  
o tsara'oo ro fisalalàko.

<sup>115</sup> Misitaha amako ry lo-tserekeo!  
hiambenako o fandilian' Añaharekoo!

<sup>116</sup> Tozaño amo saontsi'oo raho,  
soa te ho veloña;  
le ko ampisalareña amy fitamàko.

<sup>117</sup> Tohaño le ho tra-drombake,  
hitoloñaako amo fepè'oo nainai'e.

<sup>118</sup> Aforintseo ze mandifike  
amo fepè'oo,  
fa vande ty famañahia' iareo.

<sup>119</sup> Ado'o hoe taim-pira  
ze fonga tsy vokatse an-tane atoy;  
zay ty ikokoako o taro'oo.

<sup>120</sup> Mitititik' an-kahembañaña ama'o  
o nofokoo;  
fa mampañeveña ahy o fizakà'oo.

---

\* **119:112** Samekh: 'S' masioña Heb: fikalaña, fatike

♪ *Aine*<sup>†</sup>

121 Fanoeko ty hatò naho ty havantañañe,  
ko anga'ò amo mpañelok' ahio.

122 Tsoeho ho an-kasoa  
ty mpitoro'ò,  
ko ado'ò hanindria'  
o mpirengevokeo

123 Ìlesà' o masokoo ty fandrombaha'ò  
naho o saontsi'ò vañoño.

124 Anò am-piferenaiña'ò ty mpitoro'ò,  
vaho aòho ahy o fañè'oo.

125 Mpitoro'ò raho,  
toloro hilala handrendrehako o taro'oo.

126 Tondroke ty hitoloña' IEHOVÀ;  
fa nivalik' amo Tsara'oo iereo.

127 Toe kokoako mandikoatse  
o volamenao  
o fandilia'oo, ambone' ty volamena ki'e,

128 vaho iantofako te vantañe  
te amy ze he'e o fepè'oo;  
fonga hejeko ze lalam-bàlañe.

♪ *Pe*<sup>‡</sup>

129 Fanjaka o taro'oo;  
le ifahara' ty troko.

130 Minday hazavàñe ty famentarañe o tsara'oo;  
mampandrèndreke ty bànoke.

131 Nitañataña vava raho,  
nifosefo amy fisalalàko  
o fandilia'ooy.

132 Mitoliha amako le tretrezo,  
ie anoe'ò amo mikoko i tahina'oio.

133 Alaharo amo fetse'oo ty liako;

† 119:120 Aine: ze feo itolorañe; fihaino ‡ 119:128 Pe: 'P'  
ndra 'F' te Hebreo : Falie misokake



le ko apo'o ho fehen-kakeo  
inoñ'inon-draho.

<sup>134</sup> Jebaño ami'ty famorekekea' ondatio,  
hañorihako o fepè'oo.

<sup>135</sup> Ampireandreaño amy mpitoro'oy  
ty lahara'o,  
vaho aòho ahy o fañè'oo.

<sup>136</sup> Mikararake rano hoe torahañe  
o masokoo,  
ami'ty tsy fañoriha' iareo o Tsara'oo.

### ⚡ Tsady§

<sup>137</sup> Vantan-dRehe, ry IEHOVÀ,  
nahò vañoñe o fizakà'oo.

<sup>138</sup> Fa nafanto'o an-kahiti'e o taro'oo,  
nahò am-pigahiñañe ra'elahy;

<sup>139</sup> Mametrak' ahiko ty fahimbañako,  
ami'ty fandikofa' o rafelahikoo o tsara'oo.

<sup>140</sup> Vata'e niventèñe o nafè'oo,  
vaho ikokoa' ty mpitoro'o.

<sup>141</sup> Kede raho nahò mavoeñe,  
fe tsy haliñoko o fepè'oo.

<sup>142</sup> Toe marentane nainai'e tsy modo  
o havantaña'oo;  
vaho to o Tsara'oo.

<sup>143</sup> Tendrek' ahiko ty hasotriañe  
nahò ty haloviloviañe,  
fe mahafale ty troko o fandilia'oo.

<sup>144</sup> Vantañe nainai'e o taro'oo;  
toloro hilala hivelomako.

### ⚡ Kòfe\*

§ 119:136 Tsadike: 'Ts' te Hebreo: vantañe, vintañe

\* 119:144 Kofe: 'K' Hebreo. gadon-doha, masoandro

- 145 Fa nitoreo an-kaampon-troke:  
toiño raho ry IEHOVÀ; hañorihako o fañè'oo.
- 146 Mikanjy Azo, ehe rombaho,  
fa hambenako o taro'oo.
- 147 Mañampitso t'ie mitroatse  
naho mikaike; misalala o tsara'oo.
- 148 Mitamà o fijilovan-kaleño o masoko,  
mañereñere' o nafè'oo.
- 149 Janjiño ty feoko amo fiferenaiña'oo;  
isotrafo, ry IEHOVÀ, ty amo nafe'oo.
- 150 Fa mitotoke o mpikitro-draha ratio,  
o mitotse amo Tsara'oo.
- 151 Marine rehe ry IEHOVÀ,  
naho hene to o fandilia'oo.
- 152 Fa nirendreko haehae o taro'oo  
fa najado'o ho nainai'e.

### ↪ Rèse†

- 153 Vazohò ty fisotriako  
vaho imbao,  
fa tsy haliñoko o Tsara'oo.
- 154 Alañalaño ty entako, vaho jebaño;  
sotrafo ty amo nafè'oo.
- 155 Lavitse o lo-tserekeo ty fandrombahañe, fa  
tsy paia' iereo o fañè'oo.
- 156 Ra'elahy o fiferenaiña'oo ry IEHOVÀ;  
bodaño raho ty amo taro'oo.
- 157 Maro ty mampisoañe ahiko  
naho o malaiñ'ahio,  
f'ie tsy mivike amo taro'oo.
- 158 Treako o mivalikeo, toe hejeko;  
amy te tsy ambena' iareo o fetse'oo.
- 159 Vetsetseo ty fikokoako o fepè'oo;

† 119:152 Resh: 'R' Hebreo; añambone

velomo raho ry IEHOVÀ,  
ty amo fiferenaiña'oo.

160 Ty jabajaba amo Tsara'oo, le t'ie vañoñe,  
hene mijadoñe nainai'e o fizakà'o van-  
tañeo.

✠ *Sine*‡

161 Mampisoañ'ahy tsy aman-tali'e  
o roandriañeo,  
fe mañeveñe amo tsara'oo ty troko.

162 Firebehako o fetse'oo,  
manahake t'ie anjàam-bara bey.

163 Hejeko naho mañalik'ahy  
o lañitseo,  
kokoako o Tsara'oo.

164 Mandrenge Azo im-pito ami'ty andro raho ty  
amo fizakà'o mahitio.

165 Fañanintsin-tsoa amo mikoko  
o Tsara'oo, tsy eo ty hahatsikapy iareo.

166 Salalaeko i fandrombaha'oy,  
ry IEHOVÀ, hene ambenako o fandilia'oo.

167 Ambena' ty fiaiko o taro'oo,  
le toe kokoako.

168 Tanako o fepè'oo naho o taro'oo,  
aolo'o eo iaby o liakoo.

‡ *TàveS*

169 Ehe te hiatreke azo o toreokoo,  
ry IEHOVÀ;

andrendreho te fahareko o tsara'oo.

170 Hiheo añatrefa'o eo abey o halalikoo;  
avotsoro ty amo fetse'oo.

171 Hampipoñake fandrengeañe

---

‡ 119:160 Sin : 'S' ,Hebreo, vilo' masy, famotse S 119:168 Tav:  
'T' fiasiañe Hebreo; viloñe

o soñikoo, amy te anare'o ahy o fañè'oo.

<sup>172</sup> Hisaboe' ty lelako o nafè'oo,  
amy te hene vantañe o fepè'oo.

<sup>173</sup> Ee te ho veka'e hañimba ahiko  
ty fità'o, fa jinoboko o lili'oo.

<sup>174</sup> Fisalalàko i fandrombaha'oy, ry IEHOVÀ,  
mampinembanembañ'ahy  
o Tsara'oo.

<sup>175</sup> Sotrafo ty fiaiko handrenge azo,  
vaho ampañimbao ahy o fizakà'oo.

<sup>176</sup> Nivike hoe añondry motso raho;  
tsoeho o mpitoro'oo,  
fa tsy likofeko o fepè'oo.

## 120

*Sabo-Pionjonañe* <sup>1</sup> Zaho niampoheke,  
le nikanjy IEHOVÀ, vaho tinoi'e.

<sup>2</sup> O ry IEHOVÀ,  
apitsoho an-tsoñin-dremborake ty fiaiko, boak'  
ami'ty lela mamañahy.

<sup>3</sup> Inon-ty homeañ' azo,  
ino ka ty hanoeñe ama'o  
ty lela letra'e tia?

<sup>4</sup> ana-pale masiom-panalolahy,  
nahy forohan' andrabey!

<sup>5</sup> Hankañe amako te mañialo  
e Mèseke\* aña,  
nahy ty fimoneñako an-kiboho'  
i Kedare† ao !

<sup>6</sup> Loho hatr'ela'e ty nitraofam-piaiko  
ami'ty kivoho' o malaim-pilongoañeo.

---

\* **120:5** Meseke: kinezotse an-kère'e    † **120:5** Kedare:  
hamoromoronaña, haniña

<sup>7</sup> Toe mpitea filongoan-draho;  
fa ie ivolañako, aly avao ty onjone' iereo.

## 121

*Sabo-Pionjonañe* <sup>1</sup> Andrandrako mb'amo vo-  
hitseo  
o masokoo,  
aia ty hiboaha' ty fañimbañ' ahiko?  
<sup>2</sup> Hirik'am' IEHOVÀ o fañolorañ' ahikoo,  
I namboatse i likerañey naho ty tane toiy.  
<sup>3</sup> Tsy henga'e hasitse o fandia'oo,  
tsy hiroitse i Mpañaro azoy;  
<sup>4</sup> Eka, tsy hidròdreke, tsy hiroitse  
ty Mpitamiri' Israele.  
<sup>5</sup> IEHOVÀ ro Mpañambeñ' azo,  
IEHOVÀ ro fialofa' ty fitàn-kavana'o;  
<sup>6</sup> Tsy hipisañe ama'o i tariñandrokey,  
ndra i volañey te haleñe.  
<sup>7</sup> Hañaro azo amy ze fonga haratiañe  
t'IEHOVÀ;  
vaho ho tamirie'e ty fiaï'o.  
<sup>8</sup> Harova' IEHOVÀ ty fiengà'o  
naho ty fiziliha'o  
henane zao vaho nainai'e donia.

## 122

*Sabo-Pionjonañe. A i Davide.* <sup>1</sup> Nandia-taroba  
raho,  
te nanao' iereo ty hoe:  
Antao hiheo mb'añ'anjomba' IEHOVÀ.  
<sup>2</sup> Fa mijohañe amo lalam-bei'oo  
ty fandia'ay, ry Ierosalaime!

<sup>3</sup> Hehe t'Ierosalaime, rova niranjiefie  
soa-fifamatotse.

<sup>4</sup> Ie ty ionjona' o rofòkoo, o rofòko' IÀ-o,  
ty amy nitaroñañe am' Israeley,  
hañandriaña'iareo ty tahina' IEHOVÀ.

<sup>5</sup> Ao ty nampitroarañe fiambesam-pizakàñe, o  
fiambesa' i tarira' i Davideio.

<sup>6</sup> Mihalalia fañanintsiñe am'Ierosalaime: hiraorao  
o mikoko Azoo.

<sup>7</sup> Fañanintsiñe ty ho an-kijoli'o ao,  
naho fierañerañañe  
amo anjomba'o mitiotiotseo.

<sup>8</sup> O longokoo naho o rañekoo,  
le hataoko ty hoe: Fañanintsiñe ama'o.

<sup>9</sup> I anjomba' IEHOVÀ  
Andrianañaharentikañey,  
ho paiako ty hampibodobodo azo.

## 123

*Sabo-Pionjonañe* <sup>1</sup> Ampiandraeko ama'o o  
masokoo,  
ry Mpiambesatse an-dikerañe ao.

<sup>2</sup> Hehe te manahake ty fañentean' ondevo  
ty fitàn-talè'e,  
naho ty mason' anak' ampatañe  
ty fitàn-drakemba'e,  
ro iandràm-pihainon-tika  
t'IEHOVÀ Andrianañaharen-tika,  
ampara' te tretteze'e.

<sup>3</sup> Ferenaiño zahay ry IEHOVÀ,  
trettezo, fa loho natsafen-tsirika.

<sup>4</sup> Etsake ty fanivativà' o mpiaiñ'  
añoleñañeo o fi'ai'ao,

vaho ty inje' o mpirengevoko.

## 124

*Sabo-Pionjonañe. A i Davide.* <sup>1</sup> Naho tsy IEHOVÀ ty nañimba antika —ano ty hoe r'Israele—

<sup>2</sup> Naho tsy nañolotse' antika t'IEHOVÀ, ie naname an-tikañe ondatio,

<sup>3</sup> le ho nagodra' iereo veloñe ami'ty fisolebaran-kabosehañe;

<sup>4</sup> le ho nandempotse antika o ranoo, ho nisorotombak' amo ain-tikañeo i torahañey,

<sup>5</sup> Eka ho nalipo' o rano mitroñeo o ain-tikañeo,

<sup>6</sup> Andriaño t'IEHOVÀ, fa tsy napò'e tika ho fitsatsàm-pamotsi' iareo.

<sup>7</sup> Niborofotse tika hoe voroñe am-bitsom-pitsindro-boroñe, nipototse i fandrikey, le nibotafotse tika.

<sup>8</sup> Fañimbàn-tikañe ty tahina' IEHOVÀ, Andrianamboatsy i likerañey naho ty tane toy.

## 125

<sup>1</sup> Sabo-Pionjonañe Hambañe amy Vohi-Tsiôney

o mpiato am' IEHOVÀo, tsy hasiotse, fa himoneñe nainai'e.

<sup>2</sup> Manahake ty figoloboña' o vohitseo t'Ierosalaime, ty añañoña' IEHOVÀ ondati'eo, henane zao vaho nainai'e.

<sup>3</sup> Tsy hidok' ambone' ty tane' o vantaño  
 ty kobain-karatiaño,  
 tsy mone hañiti-fitaño ami'ty raty  
 o vañoño.

<sup>4</sup> Hasoao, ry IEHOVÀ, ondaty soao  
 naho o vantañ' arofoo.

<sup>5</sup> Fe ty amo mitsile mb'an-dalaño mikelokelokeo,  
 le ho kozozote' IEHOVÀ aña mindre amo  
 mpanao ratio.

Fañanintsiaño am' Israele.

## 126

<sup>1</sup> Sabo-Pionjonaño

Ie mampoly ty fandrohiza' i Tsiône t'IEHOVÀ;  
 le hanahake te mañinofy tikaño.

<sup>2</sup> Hitsitsihe' ty hehe o falien-tikaño,  
 naho ty rebeke o famelen-tikaño;  
 vaho hisaontsiaño amo fifeheañe ty hoe:  
 Nanao raha jabajaba ho a iareo t'IEHOVÀ.

<sup>3</sup> Eka, nitolora'IEHOVÀ raha ra'elahy,  
 lifo-kaehake tikaño.

<sup>4</sup> Afotero ty haondevo'ay ry IEHOVÀ,  
 manahake o torahaño atimo aña.

<sup>5</sup> Hitoly sabo an-kaehake  
 o mitongy an-drano-pihaino !

<sup>6</sup> Ty minday tabiry ho tongiseña  
 am-pirovetaño  
 ro hibalik' an-drebeke hanese  
 o fitoboroña'eo.

## 127

<sup>1</sup> Sabo-Pionjoña' i Selomò

Naho tsy IEHOVÀ



ty mandranjy ty anjomba,  
tsy manjofake ty itromaha'  
o mpandrafitseo.

Naho tsy IEHOVÀ ty mañambeñe i rovay,  
tsy vente'e ty hijilova' o mpigaritseo.

<sup>2</sup> Tsy vara te mañaleñaleñe  
naho hifonen-droro te haleñe,  
hikama ty mofom-pitoloñañe;  
amy te atolo'e rotse o kokoa'eo.

<sup>3</sup> Toe lova boak'am' IEHOVÀ o ajajao,  
ty toli-troke ro tambe.

<sup>4</sup> Hoe ana-pale am-pitàm-panalolahy  
o amorin-katora'eo

<sup>5</sup> Haha t'indaty naho atsak' irezay  
i trañon'ana-pale'ey;  
tsy ho salatse t'ie mifanaontsy  
amo rafelahi'eo an-dalam-bey ey.

## 128

### <sup>1</sup> Sabo-Pionjonañe

Hene haha ondaty mañeveñe  
am' IEHOVÀ, ie mañavelo amo lala'eo.

<sup>2</sup> Ho kamae'o ty fitoloñam-pità'o,  
le ho ehake vaho hierañerañe.

<sup>3</sup> Hanahake ty vahe mirotrarotra  
ty tañ'anjomba'o añ'akiba'o ao,  
hoe zeite\* tora'e  
miariseho ty fandambaña'o o ana'oo.

<sup>4</sup> Eka, zay ty fitahiañe ondaty  
mañeveñe am' IEHOVÀo.

<sup>5</sup> Hañasoa azo boake Tsiône ao t'IEHOVÀ  
le ho oni'o ty hasoa' Ierosalaime

---

\* 128:3 Ze'ite: hatae Oliva

amy ze hene andro hiveloma'o;  
<sup>6</sup> Eka, ho isa'o o anan' ana'oo.  
 Fañanintsiñe am' Israele.

## 129

<sup>1</sup> Sabo-Pionjonañe  
 Beteke nisilofen-draho  
 boak'ami'ty nahajalahy ahiko—  
 ano ty hoe r'Israele—  
<sup>2</sup> Beteke niforeforèñe  
 sikal'amy te zaho niajalahy,  
 f'ie tsy nahagioke ahy.  
<sup>3</sup> Nitrabahe' o mpitrabakeo  
 ty sakamamovoko,  
 nanoe' iareo lava o vavahalioo.  
<sup>4</sup> Vantañe t'IEHOVÀ;  
 navitso'e ty namahora' o lo-tserekeo ahy.  
<sup>5</sup> Hampolieñe an-kasalarañe  
 ze malaiñe i Tsiône.  
<sup>6</sup> Ie hampanahafeñe ami'ty ahetsse  
 an-tafo traño eo,  
 hiheatse aolo' ty hibeiza'e,  
<sup>7</sup> toe tsy hahaeneñe  
 ty fità' i mpanatakey,  
 ndra ty araña' i mpifehe' o fehe'eo.  
<sup>8</sup> Vaho tsy anoe' o mpandrioñeo ty hoe:  
 Ho ama' areo ty fañanintsi' IEHOVÀ!  
 Itatà'ay ami'ty tahina' IEHOVÀ!

## 130

<sup>1</sup> Sabo-Pionjonañe  
 Boak'an-dalek' ao ty nitoreovako  
 ama'o ry IEHOVÀ;

<sup>2</sup> Ry Talè, haoño ty feoko !  
Ampijanjiño o ravembia'oo  
ty feon-kalaliko.

<sup>3</sup> Lehe Ihe r'IEHOVÀ ro namolily hakeo,  
ia, ry Talè, ty ho nahafijohañe?

<sup>4</sup> Fe ama'o ty fañafahan-kakeo;  
soa te hañeveñañe.

<sup>5</sup> Mitamà IEHOVÀ raho,  
mandiñe ty troko,  
o tsara'oo ro salalaeko.

<sup>6</sup> Mitamà i Talè ty fiaiko  
mandikoatse ty mpandiñe maraindraiñe,  
eka, ty mpandiñe maraindraiñe.

<sup>7</sup> O Israeleo, mitamà IEHOVÀ,  
am' IEHOVÀ ao ty fikokoa-migahiñe  
ama'e ty fijebañañe mihenehene.

<sup>8</sup> Ie ty hijebañe Israele  
amo fonga hakeo'eo.

## 131

<sup>1</sup> Sabom-Pionjonañe, a i Davide  
Ry IEHOVÀ,

tsy mirenge ty troko,  
tsy miandra o masokoo;  
tsy ahoako o raha loho jabajabao,  
vaho ze loho sarots' amako.

<sup>2</sup> Toe nampipendreñe naho  
nampitsiñe ty fiaiko raho,  
manahake ty ajaja notaen-drene'e,  
ie hoe ajaja maota ty fiaiko.

<sup>3</sup> O ry Israeleo, itamao t'IEHOVÀ  
henane zao vaho nainai'e.

# 132

- <sup>1</sup> Sabo-Pionjonañe  
Ry IEHOVÀ, tiaho t'i Davide  
ty amo falovilovia'eo.
- <sup>2</sup> Ty nifantà'e am' IEHOVÀ,  
ty nititiha'e amy Tsitongerè' Iakobey:
- <sup>3</sup> Toe tsy hizilik' an-kibohon-  
trañoko ao raho  
ndra hijoñe am-pandreako  
nivelareñe ho ahiko ao:
- <sup>4</sup> Tsy homeiko roro o masokoo,  
tsy hidrodreke o voho-masokoo,
- <sup>5</sup> ampara' te hahatreavako toetse t'IEHOVÀ,  
akiba ho a i Tsitongerè' Iakobey.
- <sup>6</sup> Jinanji'ay e Efrata\* zay,  
tendrek' an-kodobo' i alay :
- <sup>7</sup> Antao hionjoñe mb'an-Kivoho'e ao;  
antao hitalaho  
am-pitongoàm-pandia'e eo.
- <sup>8</sup> Miongaha ry IEHOVÀ,  
miheova mb'am-pitofà'o mb'eo,  
Ihe naho  
i vatam-pañinan-kaozara'oy.
- <sup>9</sup> Ho lafihen-kavantañañe  
o mpisoro'oo,  
hipoñak' an-kaehake o noro'oo.
- <sup>10</sup> Ty amy Davide mpitoro'oy, ko ampitolihe'o  
añe  
ty lahara' i noriza'oy.
- <sup>11</sup> Nifanta mahity amy Davide t'IEHOVÀ,  
vaho tsy hafote'e, ty hoe:  
Hampiambesareko

---

\* 132:6 Efrata; havokarañe

ami'ty fiambesam-panjakà'o eo  
 ty boak' am-pañova'o ao;  
 12 lehe ambe' o ana'oo i fañinakoy  
 naho ty taroko anareko iareo,  
 le hiambesatse amy fiambesam-panjaka'oy  
 nainai'e o ana' iareoo.  
 13 Toe jinobo' IEHOVA ty Tsiône, i fañiria'e ho  
 fimoneña'ey:  
 14 Etoy ty fitofako nainai'e tsy modo;  
 atoa ty himoneñako, fa fisalalàko—  
 15 Hogogoeko ty riha'e, ho eneñeko mahakama o  
 mahàtra'eo.  
 16 Hampisikineko fandrombahañe  
 o mpisoro'eo,  
 hisabo an-drebeke o noro'eo.  
 17 Ao ty hampitiriako ty tsifa' i Davide;  
 ao ty nañajariako failo' i norizakoy.  
 18 Haombeko hasalarañe o rafelahi'eo,  
 fe hipelapelatse añambone'e eo  
 ty sabaka'e.

## 133

1 Sabo-Pionjonañe, a i Davide  
 Akore ty hasoa naho ty hafanjàka' ty fitraofañ'  
 ìna' o mpirahalaho!  
 2 Manahake ty solike sarotse  
 añambone'e eo,  
 miroroñe an-tsomotse,  
 an-tanteahe' i Aharone mb'eo,  
 mitsiritsiok' añ' olon-tsaro'e mireparepay.  
 3 Hambañe ami'ty mika' i Kermone  
 mivotrak' amo vohi' i Tsiôneo;  
 amy nañoriza' IEHOVA fitahiañey,

eka! haveloñe nainai'e.

## 134

<sup>1</sup> Sabo-Pionjonañe

Antao! hañandriañe IEHOVÀ ry hene mpitoro'  
IEHOVÀ mitoroñe haleñe añ'anjomba'  
IEHOVÀO.

<sup>2</sup> Zonjono mb'an-toetse  
miambake mb'eo o fità' areoo,  
vaho Andriaño t'IEHOVÀ.

<sup>3</sup> Hitahy azo hirik'e Tsiône ao t'IEHOVÀ  
mpandranjy i likerañey naho ty tane toy.

## 135

<sup>1</sup> Treño t'IA. Bangò ty tahina' IEHOVÀ;  
mandrengea, ry mpitoro'IEHOVÀ,

<sup>2</sup> Ry mpijohañe añ'anjomba'IEHOVÀ,  
an-kiririsan' anjomban' Añahareo,

<sup>3</sup> Rengeo, t'IA, amy te soa t'IEHOVÀ;  
sabò i tahina'ey ty amy volonahe'ey.

<sup>4</sup> Amy te jinobo' IA ho am-bata'e t'Iakobe, ho  
vara'e t'Israele.

<sup>5</sup> Fantako te ra'elahy t'IEHOVÀ,  
le mandikoatse ze atao 'ndrahare  
iaby t'i Talè.

<sup>6</sup> Manao ze satri'e t'IEHOVÀ,  
an-dindiñe aña naho an-tane atoy,  
amy riakey vaho an-tsikeokeoke ao.

<sup>7</sup> Ampionjone'e hirik' añ'olon-tane aña  
ty mika; anoa'e helatse o oraño  
vaho akare'e boak'an-driha'e ao ty tioke.

<sup>8</sup> Zinama'e o tañoloñoñoña' i Mitsraimeo, ndra  
ondaty ndra biby.

9 Nañiraha'e viloñe naho halatsañe  
mb'añivo'areo ao, ihe 'nio, ry Mitsraime,  
amy Parò vaho amo mpitoro'e iabio.

10 Narotsa'e ty fifeheañe maro,  
binaibai'e o mpanjaka fanalolahio,

11 i Sikone, mpanjaka' o nte Emoreo,  
naho i Oge, mpanjaka' i Basane,  
vaho o fonga fifeleha' i Kanàneo;

12 Le natolo'e ho lova ty tane' iareo,  
ho lova' Israele, ondati'eo.

13 Ry IEHOVÀ, tsy modo ty tahina'o,  
ty fitiahiañ' azo ry IEHOVÀ,  
le nainai'e donia.

14 Fa homei' IEHOVÀ to ondati'eo  
le ho tretteze'e o mpitoro'eo.

15 Volafoty naho volamena  
o raham-pahasive' o kilakila 'ndatioo,  
ty sata-pità' ondaty.

16 Ie manam-bava, fe tsy mirehake,  
ama-maso, fe tsy mahatrea;

17 aman-tsofy, fe tsy mahatsanoñe,  
vaho tsy mahakofòke o vava'iareoo.

18 Ho hambañe am'iereo o mpanao iareoo, Eka,  
ze hene miato am'iereo.

19 Ry anjomba' Israele,  
Andriaño t'IEHOVÀ;  
ry akiba' i Aharone, andriaño t'IEHOVÀ;

20 ry kivoho' i Levio, andriaño t'IEHOVÀ;  
ry mpañeveñe am'IEHOVÀ,  
andriaño t'IEHOVÀ.

21 Andriaño boak'e Tsiône ao t'IEHOVÀ,  
ry mpimoneñe e Ierosalaimeo.

Treño t'IA.

# 136

- <sup>1</sup> Andriaño t'IEHOVA  
 amy te Ie ro soa;  
 nainai'e ty fiferenaiña'e.
- <sup>2</sup> Andriaño t'i Andrianañaharen-  
 droandriañe.  
 Nainai'e ty fiferenaiña'e.
- <sup>3</sup> Andriaño ty Talèn-talè:  
 Nainai'e ty fiferenaiña'e.
- <sup>4</sup> Ama'e, toe ie avao ro mitolon-  
 draha ra'elahy tsitantane,  
 Nainai'e ty fiferenaiña'e.
- <sup>5</sup> Ie nanao i likerañey amy hilala'eiy,  
 nainai'e ty fiferenaiña'e.
- <sup>6</sup> Ie namelatse ty tane toy  
 ambone' i riakeiy,  
 nainai'e ty fiferenaiña'e.
- <sup>7</sup> Ie namboatse o hazavàñe jabajabao,  
 nainai'e ty fiferenaiña'e,
- <sup>8</sup> i àndroy hamehe te antoandroo,  
 nainai'e ty fiferenaiña'e,
- <sup>9</sup> i volañey naho o vasiañeo  
 hifelek' an-kàleñe;  
 nainai'e ty fiferenaiña'e.
- <sup>10</sup> Ie nanjamañe o tañoloñoñoñan-  
 te Mitsraimeo,  
 nainai'e ty fiferenaiña'e.
- <sup>11</sup> vaho nañakatse Israele am' iereo ao,  
 nainai'e ty fiferenaiña'e.
- <sup>12</sup> an-dela-pità'e maozatse  
 naho an-tsirañe natora-kitsi'e;  
 nainai'e ty fiferenaiña'e.
- <sup>13</sup> Ie nampisalahañe i Riake Menaiy,



nainai'e ty fiferenaiña'e.

<sup>14</sup> vaho nampisorohe'e mb'añivo'e  
mb'eo t'Israele,  
nainai'e ty fiferenaiña'e.

<sup>15</sup> Fe naopo'e amy Riake Menay  
t'i Parò naho o lahin-defo'eo;  
nainai'e ty fiferenaiña'e.

<sup>16</sup> Ie niaolo ondati'eo hiranga i tane  
babangoañey,  
nainai'e ty fiferenaiña'e.

<sup>17</sup> Ie nandrotsake  
o mpanjaka fanalolahio,  
nainai'e ty fiferenaiña'e.

<sup>18</sup> naho nanjevoñe  
o mpanjaka nanan-kasiño:  
nainai'e ty fiferenaiña'e.

<sup>19</sup> i Sikone mpanjaka' o nte Emoreo,  
nainai'e ty fiferenaiña'e.

<sup>20</sup> i Oge mpanjaka' i Basane,  
nainai'e ty fiferenaiña'e.

<sup>21</sup> vaho natolo'e ho lova ty tane' iareo,  
nainai'e ty fiferenaiña'e.

<sup>22</sup> ho lova' Israele mpitoro'ey.  
nainai'e ty fiferenaiña'e.

<sup>23</sup> Ie nahatiahy antika  
amo hasotrian-tikañeoy,  
nainai'e ty fiferenaiña'e.

<sup>24</sup> naho nañaha antika  
amo rafelahin-tikaño,  
nainai'e ty fiferenaiña'e.

<sup>25</sup> Ie mamahañe ze hene raha veloñe.  
nainai'e ty fiferenaiña'e.

<sup>26</sup> Andriaño t'i Andrianañahare'

i likerañey!  
Nainai'e ty fiferenaiña'e.

## 137

<sup>1</sup> Tañ'olon-tsaka e Bavele eo,  
ty nitoboha'ay naho nirovetse,  
t'ie nahatiahy i Tsiône.

<sup>2</sup> Amo sohihy añivo'eo ty nandradoradoa'ay o  
marovani'aio,

<sup>3</sup> Teo ty nihalalia' o mpanese anaio sabo, naho  
nipaia' o mpampisoañ' anaio

rebeke, ami'ty hoe :

Isabò o sabo' i Tsiôneo.

<sup>4</sup> Aa vaho akore ty hisaboentika  
ty sabo' IEHOVÀ an-tanen' ambahiny atoy?

<sup>5</sup> Naho haliñoko rehe ry Ierosalaime,  
le angao ho kombimba ty sirako havana.

<sup>6</sup> Adono hipitek' ami'ty lañilañiko  
ty lelako, naho tsy mahatiahy azo raho,  
lehe tsy aonjoko ambone' ze  
mahafale ahiko iaby t'Ierosalaime.

<sup>7</sup> Tiahio ry IEHOVÀ ty kabò'o  
amo nte Edomeo tañ'andro' Ierosalaime:  
Rotsaho! hoe iereo,  
akoromaho pak'amo mananta'eo!

<sup>8</sup> Ry anak-ampela' i Bavele, harotsake rehe, haha  
ty hañavak'azo amy  
nañondroha'o ama'aio.

<sup>9</sup> Fale ty handrambe o anak'ajaja'oo,  
handretsake iareo an-damilamy eo.

## 138

<sup>1</sup> Sabo' i Davide

Andriañeko rehe ry IEHOVÀ,  
 an-kaliforan-troke,  
 ho saboeko añatrefa' o jomakeo.

<sup>2</sup> Mibotreke mb'amy anjomba'o  
 miavakey raho  
 naho mibango ty tahina'o  
 ty amy fiferenaiña'o naho ty hatò'o,  
 amy te nonjone'o i tsara'oy,  
 i tahina'oy ambone' ze he'e.

<sup>3</sup> Nanoiñe ahiko rehe  
 amy andro nitokavekoy;  
 nosihe'o an-kaozarañe ty fiaiko.

<sup>4</sup> Hañandriañ' Azo  
 ze hene mpanjaka' ty tane toy, r'IEHOVÀ,  
 naho janjiñe'iereo o entam-palie'oo.

<sup>5</sup> Ho saboe' iereo o lala' IEHOVÀo,  
 fa ra'elahy ty enge' IEHOVÀ.

<sup>6</sup> Ndra te onjoneñe t'IEHOVÀ,  
 mbe haoñe'e ty mireke,  
 le arofoana'e o mpirengevokeo.

<sup>7</sup> Ndra t'ie manjenge añivo'  
 o faloviloviaño,  
 Ihe ro mameloñe ahiko,  
 atorakitsi'o mb'ami'ty  
 haboseha' o rafelahikoo ty fità'o, vaho man-  
 drombak'ahy ty fità'o havana.

<sup>8</sup> Ho henefe' IEHOVÀ ty nisafirie'e ho ahy,  
 nainai'e, ry IEHOVÀ ty fiferenaiña'o,  
 ko ado'o o tolom-pità'oo.

## 139

<sup>1</sup> Ho a i Talè, Sabo' i Davide.  
 Ry IEHOVÀ, fa nitsikarahe'o raho,

mbore arofoana' o.

<sup>2</sup> Arofoana' o ty fitobohako

naho ty fiongahako;

oni' o ty ereñeren-troko

ndra te tsietoitane añe.

<sup>3</sup> Vandroñe' o o liakoo,

naho o fandreakoo;

hene arofoana' o o lalakoo.

<sup>4</sup> Ie mbe tsy an-delako ao ty fivolako,

Hete! ry IEHOVA, kila arofoana' o.

<sup>5</sup> Nifahera' o raho—

aolo eo naho amboho ao;

vaho nisazoha' o fitañe.

<sup>6</sup> Loho fanjàka amako i hilala zay, abo, tsy takako.

<sup>7</sup> Aia ty hombako hisitak' amy Arofo'oy?

Aia ty hibotitsihako o lahara'oo?

<sup>8</sup> Ie mionjom-b'an-dikerañe mb'eo raho,

eo rehe;

naho alafiko an-kerakerak' ao

ty fandreako, hehe t'ie eo;

<sup>9</sup> Ie rambeseko o ela' i maraiñeio,

naho mitoetse añ' olon-driake

tsietoitane añe,

<sup>10</sup> eo ka ty hitehafam-pità' o ahy,

naho hanazok' ahiko ty fità' o havana.

<sup>11</sup> Ie anoeko ty hoe,

Toe hanafotse ahy ty ieñe,

vaho hivalike ho haleñe

ty hazavañe amako,

<sup>12</sup> Fe ndra o hamoromoroñaño

ro tsy maieñe ama' o,

mireandreañe hoe i àndroy ty haleñe,

hàmbañe ty hazavañe naho ty ieñe.

<sup>13</sup> Tsinene' o o añovakoo;

nanenoñ' ahy an-tron-dreneko ao.

14 Andriañeko rehe,  
fa an-karendreveñañe naho halatsàñe  
ty nitsene'ò ahiko;  
fanjàka o satam-pità'oo,  
toe apota' ty fiaiko.

15 Tsy nietak' ama'ò o taolakoo, ie nanoeñe an-  
kafitse ao,  
naho nitseneñe an-kahimbañe  
an-kalalefan-tane ao,

16 Nivazohom-pihaino'ò  
o nanoeñe ahikoo,  
naho nipatereñe amy boke'oy  
ze hene andro norizañe ho ahy,  
ie mboe tsy teo ty raike.

17 Miheotse amako o fivetsevetse'oo  
ry Andrianañahare!

Mienene t'ie mitraoke !

18 Ie imaneako iake, le andikoara'e ty ia' o  
faseño.

ie tsekake, le mbe ama'ò eo.

19 Ehe ohoño loza o lo-tserekeo,  
ry Andrianañahare !

Mihankàña amako arè,  
ry ondaty mpampiori-dioo,

20 Injè' iareo an-keloke rehe,  
manoñoñe Azo tsy vente'e  
o malaiñ'Azoo;

21 Tsy hejeko hao o tsy tea azoo,  
ry IEHOVÀ?

Tsy hifangantoreko hao  
o miatreatre ama'oo?

22 Toe hejeko am-palai-mena;  
fonga volilieko ho rafelahiko.

23 Tsikaraho raho, ry Andrianañahare,

arofoano ty troko;  
tsoho vaho arendreho  
o fitsakoreakoo.

<sup>24</sup> Vazoho, he amako ao ty fiolañe,  
vaho iaolò mb'an-dalañe nainai'e mb'eo.

## 140

<sup>1</sup> Ho a i Talè, Sabo' i Davide.  
Avotsoro am' ondaty lo-tserekeo raho, ry IEHOVÀ;  
arovo am' ondaty piaroteñeo;

<sup>2</sup> o mikilily añ'arofe' ao  
nahò mikitrok'aly lomoñandroo.

<sup>3</sup> Nisioñe' iereo ty famele' iereo hoe mereñe;  
an-tsoñi'iareo ty vorem-pandrefeala. Selà

<sup>4</sup> Arovo tsy ho am-pità' o lo-tserekeo raho ry  
IEHOVÀ;

arovo amy 'ndaty mitrotrofiakey,  
ty mikinia hampidorasitse o liakoo.

<sup>5</sup> Nañetake fandrike ho ahy  
o mpikavokavokey; nahò taly;  
nahò namelara' iareo harato  
añ'olon-dalañeo vaho  
nampibitsoke fandri-boñe amako. Selà

<sup>6</sup> Hoe raho am' IEHOVÀ,  
Ihe ro Andrianañahareko.  
Janjiño, ry IEHOVÀ,  
o feon-kalalikoo.

<sup>7</sup> Ry IEHOVÀ Talè,  
faozaram-pandrombahañe ahiko,  
Mpanaroñe ty lohako  
añ-andron-kotakotake.

<sup>8</sup> Ko toiñe'o, ry IEHOVÀ,  
ty fisalalà' o tsy vokatseo,  
ko osihe'o ty fikililia'iareo

tsy mone hirohake. Selà  
 9 Le ty loha' o miarikoboñ' ahikoo:  
 ho rongoñeñe  
 ty fikotrihan-tsoñi'iareo,  
 10 naho hararadrarak' am' iereo  
 ty foroaha mirekake;  
 vaho havokovoko añ'afo  
 an-koboñe ao, tsy hitroatse ka.  
 11 Tsy hitoera' ty mpikatramo ty tane toy;  
 ho vandroñen-doza  
 ondaty mpiloa-tiñakeo.  
 12 Fantako te mpanozañe o misotrio  
 t'IEHOVÀ, naho ty zo' o rarakeo.  
 13 Toe mañandriañe ty tahina'o  
 o vantañeo,  
 vaho himoneñe añatrefa'o eo o vañoñeo.

## 141

1 Sabo' i Davide  
 Ry IEHOVÀ, mikanjy azo raho,  
 mb'etoa an-taentaeñe;  
 toloro ravembia ty feoko te koiheko.  
 2 Ano rame añatrefa'o eo o halalikoo,  
 hoe soron-kariva ty fizonjo' o sirakoo.  
 3 Ampijadoño mpañambeñe ty vavako,  
 ry IEHOVÀ,  
 ambeno ty lalambein-tsoñiko.  
 4 Ko avi'o mb'an-karatiam-beo ty troko,  
 hitoloñako sata-raty rekets' ondaty mitolon-  
 katsivokarañeo;  
 ko apo'o ho haneko  
 ze raha mafiri' iareo.  
 5 Ee te handraratehak'ahy an-kalèn-tro  
 ty vañoñe, naho hañendak' ahy,

toe solik' añambone zay,  
 lonike te tsy hifoneñan-dohako;  
 Fa tsy apoko ty halaliko ty amo sata rati' iareoo.  
<sup>6</sup> Ie avokovoko añ'ilan-kereretsak' ao  
 o mpizaka'iareoo,  
 le ho tsanoñe' iareo te nañeva o volakoo.  
<sup>7</sup> Hambañe ami'ty fitrabahañe naho  
 fitrobohan-tane,  
 ty fampivarakaihañe am-bavan -  
 kibory ao o taola'aio.  
<sup>8</sup> Fe mitolik' ama'o o masokoo,  
 ry IEHOVÀ, Talè;  
 fa ama'o ty fipalirako—  
 ko alonga'o ty fiaiko.  
<sup>9</sup> Arovo raho amy fandrike  
 nampibitsöheñe ho ahikoy;  
 naho amo fandri-bo' o mpanao ratio.  
<sup>10</sup> Hivariñe an-karato' iareo avao o lo-tserekeo,  
 te zaho miary eo.

## 142

<sup>1</sup> Fañòha' i Davide; ty Halali'e tan-dakato ao  
 Mitoreo am-peo am' IEHOVÀ raho,  
 hihalaly tretre am'IEHOVÀ ty feoko.  
<sup>2</sup> Adobako añatrefa'e ty toreoko;  
 volañeko añatrefa'e o mahaferenaiñe ahikoo.  
<sup>3</sup> Ie nitoirañe añ'ovako ao ty troko,  
 niarofoana'o ty liako,  
 amy lalan-tsileke fijelanjelañakoy  
 ty nañetaha' iareo fandrike.  
<sup>4</sup> Toliho mb'an-tañan-kavanako  
 le vazohò, te tsy eo ty mañaon' ahy.  
 tsy eo ty hipalirako;



tsy ahoa'ondaty ty fiaiko.

<sup>5</sup> Nitoreo ama'o raho ry IEHOVÀ,  
ami'ty hoe : Ihe ro fitsolohako, ty anjarako an-  
tanen-kaveloñ' ao.

<sup>6</sup> Janjiño ty fikaikaihako  
fa loho mirèke; hahao amo mpanao  
samplerak' ahiio, fa fatratse te amako.

<sup>7</sup> Akaro am-balabey ao ty fiaiko hibangoako ty  
tahina'o;  
hiropak' amako o vañoño  
ami'ty fatariha'o amako.

## 143

<sup>1</sup> Sabo' i Davide

Ry IEHOVÀ, janjiño ty filolohako,  
atokilaño mb'amo halalikoo  
ty ravembia'o ty amo figahiña'oo naho o havan-  
taña'oo.

<sup>2</sup> Ko ampanesefe'o an-jaka ty mpitoro'o;  
fa tsi-mbia tsy ho añañatrefa'o ty veloñe.

<sup>3</sup> Fa nampisòañe ty fiaiko o rafelahio,  
nigorè'e an-tane ty haveloko;  
nampitoboheñe añ'ieñe ao,  
manahake t'ie nilolo ela.

<sup>4</sup> Aa le mitsikorak' amako ty troko;  
mioremeñe ty añaño ao.

<sup>5</sup> Tiahiko o andro taoloo,  
niniheko iaby o fitoloña'oo tsakorèko o satam-  
pità'oo.

<sup>6</sup> Ahitiko mb'ama'o o tañaño;  
limpoañe ty ama'o ty fiaiko hoe tane mi-  
varàkivaràky. Selà

<sup>7</sup> Toiño masika ry IEHOVÀ;

fa mimoremoretse ty troko.  
 ko aeta'o amako ty lahara'o  
 hera hanahake o mizotso  
 mb'an-kaly aoo.

<sup>8</sup> Ampitsanoño ahy ty fiferenaiña'o  
 te maraiñe,  
 amy te Ihe ro iatoako.  
 ampandrendreho ty lala hambako,  
 fa ama'o ty fañonjonañe ty fiaiko.

<sup>9</sup> Ihahao amo rafelahikoo,  
 ry IEHOVÀ; Ihe ro fitsolohako.

<sup>10</sup> Anaro ahy ty hanao o satri'oo,  
 Ihe ro Andrianañahareko;  
 le ampiamolò ahy an-tane mira  
 ty Arofo'o soa.

<sup>11</sup> Isotrafo amy tahina'oy, ry IEHOVÀ,  
 afaho amo hasosorañeo,  
 ty amy havantaña'oy.

<sup>12</sup> Aitò amako o rafelahikoo  
 ty amy fiferenaiña'oy, vaho  
 fonga rotsaho o mitsibore ty fiaikoo,  
 fa mpitoro'o raho.

## 144

<sup>1</sup> a i Davide

Andriañeñe t'IEHOVÀ lamilamiko,  
 mpañoke o tañakoo hialy,  
 ty rambon-tañako hihotakotake,  
<sup>2</sup> i mpiferenaiñe ahy naho rovakoy,  
 ie tambohoko abo  
 naho ty Mpañahañ'ahy,  
 ty kalan-defoko naho fipalirako,  
 mpampiambàne' ondatikoo amako.

- <sup>3</sup> O ry IEHOVÀ,  
 inoñ' ondatio te haoñe'o,  
 naho o ana'ondatio t'ie tsakorè'o?  
<sup>4</sup> Fa hoe kofòke t'indaty; talinjo mihelañe o  
 andro'eo.  
<sup>5</sup> Avohoro o likera'oo ry IEHOVÀ  
 le mizotsoa;  
 paoho o vohitseo hahatoeñe.  
<sup>6</sup> Ahiririño mb'eo ty helatse  
 hampiparatsiahe'o,  
 iraho mb'eo o ana-pale'oo  
 hampibaibay iareo.  
<sup>7</sup> Ahitsio hirik'añ'abo aña ty fità'o; avotsoro raho  
 naho hahao  
 amo alon-driake ra'elahio,  
 naho am-pità' o ambahinio,  
<sup>8</sup> fa bodiak' avao ty falie' iareo, vaho fitàn-  
 kavanam-pamañahy  
 ty fitàn-kavana' iareo.  
<sup>9</sup> Ho saboeko sabo vao rehe  
 ry Andrianañahare;  
 hititihako marovany folo-taly  
 hibekobekoako fandrengeañe,  
<sup>10</sup> ie tolora'o rombake o Mpanjakao, naho  
 mamotsotse i Davide  
 mpitoro'oy ami'ty fibara mijoy.  
<sup>11</sup> Hahao raho naho avotsoro  
 am-pità' ondaty alik'amakoo,  
 fa mandañitse avao ty falie' iareo, vaho ty fitàn-  
 kavana' iareo  
 ro fitan-kavanam-bìlaña.  
<sup>12</sup> Soa te ho hatae toratora'e o anadahin-tikaño  
 ami'ty hatora' iareo  
 vaho ho fahan-kotsoke niranjiefne

ami'ty satan' anjomba  
o anak-ampelan-tikaño.

<sup>13</sup> Le ho pea o rihantikaño,  
mañakatse ze hene karazam-bokatse,  
nahô hitombo añ'arivo  
o añondrin-tikaño,  
le añ'aleale ty an-teten-tikañ'ao;

<sup>14</sup> Le hitohetse iaby ty añomben-tika,  
nahô tsy ho an-keba'e o kijolio,  
tsy ama'e ao ty hasese añe,  
vaho tsy ho an-dalan-tikañe ey ty koi-doza.

<sup>15</sup> Haha t'indaty mitoetse hoe zay;  
fale t'indaty nahô  
IEHOVÀ ro Andrianañahare'e.

## 145

<sup>1</sup> Sabo Fibangoañe. A i Davide  
Honjoneko rehe,  
ry Andrianañahareko, ry Mpanjaka,  
hibango ty tahina'o mb'an-jafe'afe'e.

<sup>2</sup> Handriañeko boak' andro,  
le hibango ty tahina'o nainai'e donia.

<sup>3</sup> Hinakinake t'IEHOVÀ, rengèñe añ'abo,  
tsy taka-tsikaraheñe ty hajabahina'e.

<sup>4</sup> Ho bangoe' ty tariratse raik' ami'ty ila'e o tolon-  
draha'oo;

nahô hitaroñe o fitoloña'o jabajabao.

<sup>5</sup> Ty ha'raelahim-bolonahe' ty enge'o vaho o  
tolon-draha'o mahalatsao  
ro fitsakoreako.

<sup>6</sup> Ho talilie' ondatio ty haozaram-panoe'o mam-  
pañeveñe,  
vaho ho taroñeko ty hajabahina'o.

7 Ho talilie' iereo ty fitiahiañe o havokaran-  
kaso'a'o;

hirebeha' iereo ty havantaña'o.

8 Matarike t'IEHOVÀ, naho lifo-tretrè,  
malaon-kaviñerañe  
vaho lifo-piferenaiñañe.

9 Kila hasoà' IEHOVÀ;  
ambone' ze hene anoe'e o fitretreza'eo.

10 Fonga handrenge Azo o tolon-draha'oo, ry  
IEHOVÀ;

vaho hañonjoñe Azo o noro'oo.

11 Ho saontsie' iereo  
ty volonahem-pifehea'o,

vaho hitalily o haozara'oo,

12 hampandrendreke o ana' ondatio  
o fitoloña'e ra'elahio,  
naho ty hafanjàka' ty enge' i fifehea'ey.

13 Fifeheañe tsy modo ty fifehea'o,  
naho manitsike o tariratse iabio  
ty fameleha'o.

14 Songa tohaña' IEHOVÀ o mikorovokeo,  
sindre atroa'e o mibokok' ambaneo.

15 Kila fihaino miandrandra ama'o,  
vaho anjotsoa'o mahakama an-tsa'e.

16 Manoka-pitàn-drehe mañeneke  
ty fañiria' ze hene raha veloñe.

17 Vantañe amo lala'e iabio t'IEHOVÀ  
naho matarik' amy ze hene fitoloña'e.

18 Marine' ze mikanjy aze iaby t'IEHOVÀ;  
ze hene mikanjy aze an-katò.

19 Ho henefa'e ty fisalalà'  
o mañeveñe ama'eo;  
ho janjiñe'e ka ty toreo' iareo  
vaho ho rombahe'e.

20 Ambena' IEHOVÀ ze hene mikoko aze,  
fe fonga ho rotsahe'e o lo-tserekeo.

21 Hivolam-pandrengaña am' IEHOVÀ ty vavako,  
le kila nofotse ro hibango ty tahina'e  
masiñe nainai'e donia.

## 146

1 Treño t'IA!

Rengeo t'IEHOVÀ, ty troko.

2 Ho rengeko t'IEHOVÀ kanao veloñe;  
hisabo an'Andrianañahareko  
te zaho mbe atoy.

3 Ko iatoa' areo o roandriaño,  
naho o ana-ondatio  
fa tsy maha-rombake.

4 Miakatse mb'eo ty kofò'e,  
mimpoly mb'an-tane ao;  
modo amy andro zay avao  
ty fañereñerea'e.

5 Haha naho t'i Andrianañahare' Iakobe  
ro mpañimb' aze.  
naho IEHOVÀ Andrianañahare'e  
ro fisalalà'e,

6 I nanao i likerañey naho ty tane toiy,  
i riakey, naho ze he'e ama'e ao,  
i mitan-ty hatò nainai'ey,

7 I mpañomey to o volevoleñooy,  
i manjotso mahakama  
amo salikoeñooy.

IEHOVÀ ro mpañaha o mirohio,

8 Mampibeake ty goa t'IEHOVÀ;  
onjone' IEHOVÀ o mivohotseo,  
kokoa' IEHOVÀ o vantaño.

9 Ambena' IEHOVÀ o ambahinio,

onjone'e ty bode-rae naho ty vantotse,  
fe akelokelo'e ty lala' i lo-tserekey.

<sup>10</sup> Hifehe nainai'e t'IEHOVÀ, Andrianañahare'o,  
ry Tsiône,  
mb'am-pigadoñan-tariratse aña,  
Treño t'IÀ.

## 147

<sup>1</sup> Treño t'IÀ! Amy te soa ty fijejoañe  
aman' Añaharentika;  
toe fanjàka naho mañeva  
ty fandrengeañe Aze.

<sup>2</sup> Ampitomboe' IEHOVÀ t'Ierosalaime :  
atonto'e o añombelahi-mavo'  
o nte-Israeleoo.

<sup>3</sup> Jangane'e ty mikoretse añ'arofa, ho bandie'e o  
fere'eo.

<sup>4</sup> Volilie'e ty ia' o vasiaño;  
songa kanjie'e ami'ty añara'e.

<sup>5</sup> Jabahinake i Talèn-tikañey,  
ra'elahy an-kafatrarañe;  
tsy taka-jehèñe ty hilala'e.

<sup>6</sup> Tohaña' IEHOVÀ o mirèkeo,  
gorè'e an-tane ty lo-tsereke.

<sup>7</sup> Sabò am-pañandriañañe t'IEHOVÀ;  
Rengeo t'i Andrianañahare  
am-piarahañe marovany,

<sup>8</sup> Ie ty mpandafike rahoñe  
an-dikerañe eña,  
naho mpañajary oraña an-tane atoy,  
naho mampitiry ahitse am-bohitse ey.

<sup>9</sup> Fahana'e haneña o bibio,  
naho o ana-koàke migagakeo.

<sup>10</sup> Tsy ty haozara' o soavalao

ty mahahaha Aze,  
tsy ty kitson-dahilahy ro ifalea'e.

<sup>11</sup> Ondaty mañeveñe ama'eo  
ro noro' IEHOVÀ,  
o mpitamà ty hafatram-pikokoa'eo.

<sup>12</sup> Rengeo t'IEHOVÀ, ry Ierosalaime;  
onjono t'i Andrianañahare'o, ry Tsiône.

<sup>13</sup> Fa nampifatrare'e  
o sikadan-dalam-bei'oo;  
tahie'e o ajalahy ama'oo.

<sup>14</sup> Ampierañerañe'e o efe-tane'oo,  
vaho ampieneña'e ampemba\* soa.

<sup>15</sup> Ahitri'e mb'an-tane atoy o fetse'eo, mipiriritse  
o taro'eo.

<sup>16</sup> Anjotsoa'e oram-panala  
hoe volon' añondry;  
afiafia'e hoe lavenoke ty fanala.

<sup>17</sup> Afitse'e ami'ty minjikio'e ty havandra'e, ia ty  
mahafijohañe miatreke  
ty fangoratsaha'e.

<sup>18</sup> Irahe'e mb'eo o tsara'eo  
le mitranake iereo;  
ampitiofe'e o tio'eo, vaho  
ampidoañe'e rano.

<sup>19</sup> Talilie'e am' Iakobe ty tsara'e;  
am' Israele o fañe'eo naho o fepè'eo†.

<sup>20</sup> Tsy nanoe'e zay o tane ila'eo;  
tsy fohi' iereo o nafè'eo.

Treño t'IA.

---

\* **147:14** Kità: Karazam-bare-boley † **147:19** Rom 2:20, 3:2,  
9:4



## 148

<sup>1</sup> Treño t'IA. Rengeo t'IEHOVÀ,  
hirik'an-dindiñe añe,  
jejà ry an-dikerañeo.

<sup>2</sup> Treño ry hene anjeli'eo,  
jejà ry lahialen-dikerañeo.

<sup>3</sup> Treño, ry andro naho volañeo,  
mandrengea aze,  
ry vasiañe mipelapelatse eñeo.

<sup>4</sup> Treño ry likerañe an-tiotiotseo  
naho o rano ambonen-dikerañeo.

<sup>5</sup> Bangoeñe ty tahina' IEHOVÀ,  
amy t'ie nandily, le nioreñe iereo.

<sup>6</sup> Toe noriza'e tsy ho modo nainai'e;  
nampijadoñe lily tsy ho lilareñe.

<sup>7</sup> Rengeo t'IEHOVÀ boak' an-tane  
ry fañane jabajaba an-driak' ao  
naho ry laleke iabio,

<sup>8</sup> ry helatse naho havandra,  
fanala naho tsitsiñe,  
ry tio-bey mañeneke o tsara'eo,

<sup>9</sup> ry vohitseo naho ze hene haboañe,  
o hatae miregoregoo naho  
o mendoraveñe iabio\* ,

<sup>10</sup> ry biby lio naho ze fonga hare,  
ry biby milalio naho voroñe mitiliñeo,

<sup>11</sup> ry mpanjaka' ty tane toio  
naho ze kila ondaty,

ry roandriañe naho mpifehe' ty tane toio,

<sup>12</sup> ry ajalahy naho somondrarao, ry androanavy  
naho ajajao;

<sup>13</sup> Hene mibango ty tahina' IEHOVÀ;

---

\* **148:9** Eretse: hatae bey

fa i tahina'ey avao ro onjoneñe;  
 ambone' ty tane toy  
 naho o likerañeo ty enge'e.  
 Ty enge' o noro'e iabio,  
 o ana' Israeleo 'nio,  
 ondaty marine azeo.  
 Treño t'IA!

## 149

- <sup>1</sup> Treño t'IA.  
 Takasio sabo vao t'IEHOVÀ,  
 ty enge'e ami'ty fivori' o noro'eo.
- <sup>2</sup> Hifalea' Israele i Mpañoreñ' azey;  
 hirebeha' o ana' i Tsiôneo  
 ty Mpanjaka' iareo.
- <sup>3</sup> Hibango i tahina'ey an-tsinjake,  
 ho saboe' iereo am-pititihañe  
 marovany naho kantsañe.
- <sup>4</sup> Fa mahafale IEHOVÀ ondati'eo;  
 hampihamine'e fandrombahañe  
 o mirèkeo.
- <sup>5</sup> Hampipoña-pandrengañe o noro'eo,  
 hisabo an-kaehak' an-tihi'iareo eo.
- <sup>6</sup> Ho am-palie' iareo ty fañonjonañe  
 an' Andrianañahare,  
 vaho am-pità' iareo  
 ty fibara sambe-lela'e,
- <sup>7</sup> hamale fate amo fifeheañeo,  
 naho handilo ondatio,
- <sup>8</sup> handrohy o mpanjaka' iareo  
 an-tsilisily,  
 o roandria'iareo an-dangoke viñe,
- <sup>9</sup> hametsahañe am' iereo i zaka pinatetsey;  
 ho fandrengeañe ze hene noro'e.

Treño t'IÀ.

## 150

<sup>1</sup> Treño t'IÀ.

Mandrengoa an'Andrianañahare  
an-toe'e miavake ao;

Jejòeñe ty hajabahinan-kaozara'e!

<sup>2</sup> Rengeñe o fitoloña'e maozatseo;

Jejò i hajabahina'ey!

<sup>3</sup> Irengao am-pipopòn' antsiva;

Jejò an-dokanga naho marovany !

<sup>4</sup> Irengao an-tsinjak'

arahen-kantsàñe,

Jejò amo maro-talio naho an-tsoly!

<sup>5</sup> Irengao ami'ty fikantsàn-kantsàñe;

Jejò ami'ty figodebom-pinga bey

<sup>6</sup> Hene mandrengoa IÀ

ze mahakofòke.

Treño t'IÀ !

**Saontsin' Añahare**  
**The Holy Bible in the Tandroy language of**  
**Madagascar**  
**La Sainte Bible en langue tandroy de Madagascar**  
Copyright © 2023 Steve Lellelid  
Language: Tandroy (Malagasy, Tandroy-Mahafaly)

DRAFT VERSION

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-04-23

---

PDF generated using Haiola and XeLaTeX on 23 Apr 2024 from source files dated 23 Apr 2024

25d648f1-3cb3-5c21-a9e0-49038eca9d1c